

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR NINTH SITTING ON MONDAY, THE 28th MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPER

2. **Pu C. NGUNLIANCHUNGA**, Minister to lay on the Table of the House a Statement of Correction on the reply given on the 22nd March, 2016 to Starred Question No. 169, Ballot No. 68 asked by Dr. K. Beichhua and Er. Lalrinawma regarding "Ran lak luh chungchang.

PRESENTATION OF REPORT

3. **Pu R. VANLALVENA** to present to the House the Third Report of Committee on Government Assurances, 2016.

FINANCIAL BUSINESS

DISCUSSION AND VOTING ON DEMANDS

4. **Pu R. ROMAWIA**, Minister to submit to the Vote of the House various Demands under his charge.
5. **Pu LAL THANZARA**, Minister to submit to the Vote of the House various Demands under his charge.

NGURTHANZUALA
Secretary

.....

SPEAKER : Pathianin thiltih zawng zawng chungah ro a la rel dawn si a, thil inthup engkim, a chhia emaw a tha emaw te pawh, tih hi.

(Thuhritu 11:14)

Tunah zawhna Starred Question No. 119-na kan la ang a, a question neitu MLA zahawm tak Pu Lalruatkima zawt turin i sawm ang.

Pu LALRUATKIMA : Pu Speaker, ka lawm e. Ka Starred Question No.119-na Social Welfare Department changtu Minister zahawm tak chhan atan:-

- (a) Kum 2011-2015-ah Anganwadi Centre engzatnge awm a, naupang enrollment engzatnge an nih? A year wise ve ve in?
- (b) Nutrition-te hi centre/naupang enrollment azirin pek a ni em? A nih chuan thla khata centre/naupang pakhat quota engzat te nge?
- (c) Nutrition item thenkhat hi a hlui tawh/chhe tawh centre/naupang hnenah pek a ni em? An nih chuan engnge a chhan tih ka zawt e.

Pu P.C. LALTHANLIANA, MINISTER : Pu Speaker, member zahawm tak Pu Lalruatkima zawhna chhanna chu hei hi a ni.

- (a) Kum 2011-ah Anganwadi 1980 a awm a, enrollment 215861. Kum 2012-ah Anganwadi 1980 a awm a, naupang enrollment 214153. Kum 2013-ah Anganwadi awm zat 2244, enrollment zat 73372. 2014-ah Anganwadi awm zat 2244, enrollment zat 77174. 2015-ah Anganwadi awm zat 2244, naupang enrollment zat 70081.
- (b) Nutrition beneficiaries atan hian kum tirah CDPO tin te survey neih tirin , an survey report te chu Directorate-ah compile in, chumi hmanng chuan project wise allotment chhut thin a ni a. Feeding instruction te pe in, chuta tang chuan Project Officer in centre wise allotment an lo siam ve leh thin a ni. Nutrition

beneficiaries te tan hian daily ceiling hi nutritional norms a awm a, hetiangin :-
Naupang pangngai tan nikhatah ₹6. Naupang tlema normal lo deuh hriselna
tha lo deuh tan nikhatah ₹9, nu naupawm leh nau pai tan ₹7 a ni. Tichuan,
daily ceiling atangin item tin te a rate azirin daily dose chhut chhuah thin a ni
a. Chuvangin thla khata centre/naupang pakhat quota hi sawi a har a, naupang
pangngai thla khat quota hi Rs. 150 ang vela chhut a ni.

- (c) Nutrition expire tawh Anganwadi Centre-a sem chhuah a nih loh na turin
Department-in theihtawpin hma a la thin a. Eng emaw avanga thleng palh a lo
awm hlah pawhin lak let leh niin a thaa replace hram hram thin a ni.

Anganwadi Centre-a lo kawl rei avanga lo expire palh a awm
pawhin sem lova paih mai turin instruction pek thin a ni tih hi ka chhanna a ni
e, Pu Speaker.

SPEAKER : Awle, a zawhna neituin supplementary question a nei a, i lo
sawm ang.

Pu LALRUATKIMA : Pu Speaker, ka lawm e. Hei 2012 leh 2013 ah khan
naupang hi 50000 dawnin an tlahniam mai a, hei hi engnge a chhan tih kha ka
zawhbelhna pakhatna ni se la.

Ka zawhbelh lehnaah chuan Anganwadi sak that leh repair tum a ni em tih
a ni a.

Tin, a dang lehah chuan lawmman hi engzatnge worker hnenah pek a nih a,
helper hnenah engzatnge pek an nih. Lawmman hi minimum wages anga pek an ni em
tih leh Dal dum leh Chana uih kha, ni e, kan minister zahawm tak khan a sawi tawh a,
thawk khat lai khan an dawng niin ka hria a. Khang mihring tana eitlak loh kha hnueh let

zel leh supplier hnen atanga reject, bill pek loha tih theih mai a ni em tih kha ka zawh belhna ni sela.

Tin, Pu Speaker, Vitamin te, Protivit te, Multivitamin leh Calcium te an dawng thin a. Hengte hi expire thei leh a dahna hmun avanga fel lo thei te a nih avangin Wadi repair chungchang kha min ngaihtuah ran sak thei em tih kha ka zawh belhna a ni, ka lawm e.

Pu P.C. LALTHANLIANA, MINISTER : Pu Speaker, member zahawm tak rawn zawh belhna kha thil awm tak niin ka hria a. Kum 2012-13 ah hian Anganwadi hi 264 kan neih belh a. Chuti chung chuan 2013 atang hian naupang enrollment hi a sing telin kan tlahniam a ni. Hei hi a chhan hrang hrang tam tak a awm a. Kum 2013-ah hian Ministry of Child Welfare hian household survey neiin naupang Anganwadi-a kal tur zat survey fel taka nei turin a rawn ti thar a. Format te pawh engkim a rawn siam danglam a. Chutianga naupangte an ina kal a household survey han tih a, Anganwadi hi engzatnge kal dawn survey fel vek a ni a. Anganwadi ah hian thla 6 atanga kum 6 thleng kal tura ngaih an ni a. Amaherawhchu, tunlaih hian English Medium te hi kan lo nei nasa tawh a. Tah chuan nu leh pate han zawh chawtah chuan kum 3 atanga kum 6 hi English Medium-a kal tir hi kan lo duh deuh fur mai a ni. A hma kha chuan Anganwadi-ah an va kal tir a, sikul an kal pah emaw, khatianga khan enrollment te va ti siin Anganwadi ah khan an awm deuh vek thin a. Amaherawhchu, khatianga han tih a han zawh tak chawtah chuan sikul lamah kum 4 atanga kum 6 inkarte hi chu an kal tam em em a. Chuvang chuan uluk tawka khatianga survey han neih ah chuan a rawn tlahniam ta a ni deuh ber niin a lang a.

Tin, Education lamah school-ah naupang nei tlemte chu school khara amalgamation kalpui khaw tam takah a ni a. Chuvang chuan zirtirtute hian naupang neih loh hlauvin Anganwadi-a kal, kum 6 thleng kal tur an nih lai khan kum 5 te, kum 6 te pheikha chu an school-ah te an lo sawm ve thin a. Chuvang chuan Anganwadi lamah

naupang kha a tlahniam ve chauh niin a lang deuh ber. Thil fello tih tehchiam avanga tlahniam ta thut kha a ni hranpa lova, kan nihphung a taka a rawn lan dan deuh niin a lang deuh ber a. Chu chu ka chhan theih dan a ni.

Tin, pahnihnaah chuan Anganwadi te thawm that leh siam that tum a ni em tih a ni a. Pu Speaker, Anganwadi te hi vawi khat sak tawh chuan a sak that lehna hi central-in min pe ngai lova. Chuvangin sakna rei tawh tak, thawm that ngai tam tak a awm a. Heng atan hian vaibelchhe hnih leh nuai 25 central-in min pe a. Tunah hian project tin atangin siam that a ngaih dan te, tin, nichina member zahawm tak, a zawttuin a, a zawhna anga Anganwadi centre-a nutrition dah thatna tur, thingrem a ni emaw engemaw khatiang thleng pawha an mamawh siam dan tur report kimchang thehltur turin kan ti a. CDPO tin te chutianga an mamawh dan azir chuan pek kan tum dawn a ni.

Worker leh Helper hlawh hi engzat nge, minimum wages rate a pek a ni em tih kha worker ten ₹3000/- an hlawh a, helper ₹1500/- an hlawh a, hei hi chu central-in ICDS helper te hlawh tura a fix ve a ni a. Helai kan minimum wages nen chuan a kaihhnawih thei lo a ni tih kha ka chhanna ni se la.

Tin, nutrition item-ah dal te leh khatiang tha tawh lo deuh hlek a awm thin ni a an sawi te kha, Pu Speaker, Zoram pumah khaw te ber thlengin Aganwadi kan nei vek a, rin aiin a har khawp a. A sem chhuah dan te an han thlen dan te hi. Kan CDPO thenkhatte chuan an bial fan pahin an phur lawp lawp a, motor hire a va phurh tham ni bawh si lo te kha a ni a. Rinai tak chuan Pathian khawngaihna a zarah kan kal tluang thei viau zawk e kan ti a. Tin, member ten kan hriat tlan atan sawi duh ka neih chu dal te pawh tunah chuan mimal pe lovin MIZOFED hi an harsatna sorkar anga kan lo puih theih nan tiin tender lovin kan pe a ni. Dal tih te, motor chana tih te, ground nut tih te, masutdar sugar te, edible oil te a ni.

Tun kuma nutrition atana Central atanga pawisa kan hmuh nuai 1551.5 (sangkhath zanga sawmnga pakhat leh sing nga)-ah hian MIZOFED ringawt hi vaibelchhe 8 chuang kan pe a ni. Chuvangin MIZOFED hi tha takin an kal thei a ni. Chutiang chuan nichina member zahawm takin a rawn sawi item te pawh kha MIZOFED-a kan pek an ni a, anni hi an ti tha khawp mai. Tin, Pu Speaker, kan hriat zau vena atan nutrition-ah hian bawnghnute hi a tam thei ang ber pek kan tum a. Hmanni chanchinbu-ah khan Congress sorkarin NLUP hi an mang ti ang tu a ni an ti a, ti mangangtu nihte pawh kha a that leh that lohna a awm thei a. Tunah chuan a lawmawm lam a ni a. Bawnghnute hi kan manganpui tan a ni tih kan hotuten an sawi a. Chuvangin MULCO kaltlang hian Aizawl khawpuiah pheh chuan naupangte hnenah fresh milk pe ila kan ti a, tun kum ringawtah pawh MULCO hnenah ₹5,20,000/- kan pe nghe nghe a.

Tin, Champhai-ah te, Kolasib-ah te, pawh CHAMUL a ni emaw, TAMUL a ni emaw khangho khan bawnghnute a lo pung chho a, harsatna an neih takin kan ti a. Fresh milk hi naupang te hnenah kan sem theih dawn chuan lei sak te pawh kan tum a. Chutiang chuan nutrition-ah hian bawnghnute lo tam hi chu kan chhawk zangkhai thei turah kan ngai a. Nutrition kan pek dan te, kan supply tir dan te kha kan hriat tlan ve hrim hrimah ka han sawi pah duh a ni e. Ka lawm e.

SPEAKER : Awle, kan duh tawh ang a, zawhna No. 120-ah kan kal ang a. A chhanna hian hun a duh rei dawn a, pheh thum lai a awh a. I zawt dawn em ni? Zawh belhna maw, awle, Pu Nihar Kanti Chakma.

Pu NIHAR KANTI CHAKMA : Pu Speaker ka lawm e. Ka zawh duh chu ka bial chhungah Sedailui leh Thanzamasora hian Lungsen CDPO atangin nutrition hi an la thin a. A kawng hi a harsa em em a, a hla bawh si a, chuvangin Chawngte atangin nutrition hi a lak theih em tih ka zawt e.

SPEAKER : Minister-in chhang se.

Pu P.C.LALTHANLIANA, MINISTER : Pu Speaker, nichina kan chhan tak ang khan project wise a allotment hi pek a ni a. Amaherawhchu chutiang harsa bik chu Thanzamasora leh Sedailui hi chu Chawngte atangin a hnai zawk mai thei a, Lungrang V/C hnuai in ni a. Engpawhnise khatiang zawnga awlsam dan tur a bik takin kan lo enpui dawn nia.

SPEAKER : Awle, No. 120 ah kan kal ang a. Hei hi chu Unstarred a lo dah mai tur a ni a, kan lo dah laklawh si a, a neitu khan khawngaihin zawhbelhna lam kha lo uar lem lo mai la a thain ka hria a. Tunah zawhna neitu Pu Lalruatkima lo sawm ila.

Pu LALRUATKIMA : Pu Speaker ka lawm e. Zawhna

- a) Tripura Refugee Camp-a Tuikuk ten Mizorama kir turin eng thil nge an phut? Sorkarin an thil phutte hi tihhlawhtlinsak a tum em?
- b) Mi engzatnge Refugee Camp hrang hrangah hian la awm a, Refugee Camp hrang hrang ami te hi Mizoram Electoral Roll ah engzatnge hming chuang mek ?
- c) Tuikuk Mizoram mi leh sa dik tak ko kir turin Ministry of Home Affairs, Tripura leh Mizoram sorkarin inremna an siam em ? Koh kir leh a nih pawha lo kir duh lote hi Mizoram Electoral Roll atangin paih/thaibo tum an ni em ?
- d) Tunhnaia laklet tum an nih khan mi engzatnge lo kir ? Ministry of Home Affairs-in senso atan engzatnge a rawn pek a, engzatnge sum sen a nih tih ka zawt e.

SPEAKER : Awle, Department changtu Minister zahawm tak Pu R.Lalzirliana ilo sawm ang.

Pu R.LALZIRLIANA, MINISTER : Pu Speaker member zahawm tak Pu Lalruatkima zawhna chhanna chu:-

- a) Tuikuk Reang(Bru)-te thil phut :

- 1) Tuikukrawn kir leh te, chhungkaw tin hnenah, an intundinna tura ram pek.
- 2) Khaw khatah a tlem berah chhungkaw 500 tal awmin, electric, tui, school, anganwadi, damdawi in, kawng tha etc. te nen.
- 3) Reang (Bru) ten venhimna tha an neih theih nan Central Para Military Force (CPMF) dah turin, hemi tur hian Reang (Bru) mi leh sa lak ni se.
- 4) Reang (Bru) lo kir chhungkaw tinin IAY an dawng tur a ni.
- 5) Kashmiri Pandits leh Tamil Refugees te anga sum tanpuina dawn ve.
- 6) 1995 E/Roll chauh nilovin Tripura sorkarin anmahni chhinchhiahna tura a siam document pawimawhte pawh hi Reang (Bru) lo kir leh turte endikna atan hian hman ni rawh se.
- 7) Thlai chi sem ni rawh se.
- 8) Ministry of Tribal Affairs hnuaiah Primitive Tribal Group (PTG) nihna Reang (Bru) te hi pek ni rawh se.
- 9) Pu RCA Jain, IAS MHA Special Secretary leh Pu Naveen Verma, IAS, Joint Secretary (NE), MHA ten kum 2011-ah leh kum 2009-ah an lo tiam tawh angin Reang (Bru) te tan Permanent Development Project siam ni rawh se.
- 10) Tanpuina sum ₹80,000/- hi tih san ni se, ₹1,50,000/- ni rawh se tih leh free ration hi kum 2 atan sem ni rawh se.

Heng an thil phut te hi a hma pawha an lo phut tawh kha a ni a. Central sorkar chuan free ration hi kum 2 chhung sem turin ruahmanna a siam tawh a. Mizoram sorkar chuan Special Development Project for Western Belt DPR peih fel vek tawh chu DONER hnenah thawn a ni tawh a, sanction nghah mek a ni.

b) Tun dinhmunah mi engzat chiah nge la awm mek tih hriat a ni lo va. Sorkar-in Road Map-4 a siam ang chuan mihring (puitling 9264 + naupang 11446) = 20710 awm anga dah a ni a, mahse hei pawh hi Refugee Camp-a awmte hi a lu nung mal te te a

chhiar a awm lova, chhungkaw pakhatat adult 2.5 leh minor 3.5 zel awm anga chhutin mihring awm zat hi chhut (assumption) a ni.

Mizoram Electoral Roll ni 15/1/2015 ang chuan Reang (Bru) voters 11019 an awm.

Mamit District	-	8514
Lunglei District	-	756
Kolasib District	-	1749
Total	-	11019

c) Inremna engmah siam a ni lo. Reang (Bru) te'n Supreme Court- a sorkar an khinnaah Central, Mizoram leh Tripura sorkar-te hmalak mekna ah an lungawi thu an thlen avangin dt. 6.11.2015 khan Court-a thubuai chu tihtawp a ni.

Central, Mizoram leh Tripur sorkar-te inbiakna hnuhnung ber dt.8.1.2016-a an rel angin a hma thei ang bera Reang (Bru) lak let hna hi tan leh tur a ni a. Movement Plan pawh 31.5.2016 hma-a peih fel hman tura ruahmanna siam a ni.

Electoral Roll-a thun leh paih hi Election Commission of India (ECI) thuneihna a ni a, state sorkar chuan a duh chu ngenna siamin ECI-ah a thlen thei a, thutlukna erawhchu ECI thu thu a ni.

d) Tunhnaia laklet tum an nih khan tumahrawn kir an awm lo. Road Map-4 ang chuan Reang (Bru) lak letna tura sum mamawh ruahmanna chu a vaiin ₹68.50 crore a ni a. Hemi atang hian Ministry of Home Affairs chuan installment-in tum hnih ₹4.7 crore leh ₹. 5.00 crore a rawn pe tawh. A hmasa zawk ₹4.7 crore atang hian ₹ 46,57,369/- hman ral a ni tawh.

Hetah hian a chhanna hi a la kim lo fo a. Ka sawi zel mai ang a. Speaker khan a zawttu kha a ngen bawk si nen. An thil phut serial no. 1&2 hi chu an demand ang hian Mizoram ram pek tur a awm lova. In 500 khaw khatah awm se tih a ni a. Tin, 1,2 & 8 te hi hnam bil in duhsakna tura ruahman an ni a. Hetiang ruahmanna siam hi dan dinglai bakah, Mizorama khawtlang inrelbawl dan nen a inmil theih dawn loh avangin ngaihtuah sak theiah kan in ngai lo a ni. Tin, an thil phut no. 3-na anmahni veng tura CBMF din tih kha Mizoram police te hi sorkar chuan a ring tawh a. Chuvangin CBMF dah kher hi senso a tam bawk si nen a tulin kan hre lo a ni.

Tin, thil phut No. 4&7-na hi chu an lo kir leh dan azirin ngaihtuah sak theih an ni ang a. An thil phut 5 & 10-na te hi chu central sorkar ngaihtuah tura dah a ni a. free ration chu nichina kan sawi ang khan kum 2 atan an phal tawh a ni. Tin, serial no. 9-na hi chu Permanent Development Project tih hi a dikan kan hre lova, hei hi lo tih tawh pawh ni se la an lo chhuak kim vek a nih chuan one time development project kha thil tih awm takah kan ngaih sak a ni. Tin, an thil phut no. 6-na hi chu MBBPF ten ni 18.1.2012 khatih laia Union Home Minister hnena memorandum an thehluh demand no.1- ah khan chiang takin Mizoram mi ni lo Reang (Bru) Tripura camp-a pianga khawsa ve a ni tih a lang chiang a. Mizorama tlanhhia ni lo te lam atanga mi rawn belhtu tam tak awmin hriat a ni a. Hemi avang hian Tripura sorkarin camp-a awm te chhinchhiah nana a hman document te anmahni endikna atana hman hi a fuh lovin kan hria a.

Point no. c-na ah hi chuan Mizoram sorkar chuan NGO Co-ordination Committee hnenah ni. 8.4.2014 khan Tuikuk Mizoram mi leh sa dik tak koh kir leh an nih pawha lo kir leh duh lo te chu Mizoram Electoral Roll atanga paih/thaibo an nih theih nan Mizoram sorkar-in hma a la ang tiin a hriattir a ni. Tripura a Reang (Bru) E-Roll revision neih tura ECI in ruahmanna a siam pawh kalpui lo turin Mizoram sorkar chuan ngenna a siam tawh bawk a ni.

Tin, point no. d chhannaah hi chuan State Level Core Committee chuan hei hi chu pawisa hman dan tur kha a ni mai a, a ho ang reng deuh a, Security Border Outpost sak nan hian cheng nuai 46 hi ruahman a ni bawk a. Tin, crore 5 hi tun maia sanction a ni a. Finance Department kutah a la awm rih a ni.

Pu LALRUATKIMA : Pu Speaker khawngaihin zawhna pakhat chiah, tunhnaia sawi hlawh tak Reang Development Area kha din tum a ni em? An hmasawwna tura ruahmanna siam Official Higher Authority Meeting lama sawilan kha engnge ni a awmzia tih kha ka'n zawt tel a ni.

Pu K. SANGTHUAMA : Pu Speaker, ka zawh tur pakhat chu an rawn zawt a, Reang ho Development Council din tumna a awm em tih kha tuna zawh ka'n tum kha a ni a. Pakhat leh chu MP thlan hnunung bera NGO in boycott an tum laia Reang ho, Tuikuk ho lo kir duhlo te chu E-Roll atanga paih ni se tih kha a ni a, hei hi central lam khan tih theih mai ni awm taka an chhan vang ni awm tak a ni a. Chuvangin inthlan kha boycott a ni ta lova, khalai kal zel kha han hrilhfiah theih deuhna te a awm em? Ngaihtuah zui engmah a awm ta lo nge ni a, Mizorama lo kir lo te kha Roll-a la thunte kan la tum niin a lang a, hei hi a thun loh theih loh em ni? Nge EC atang hian engmah chhanna mumal a awm ta lo em ni tih kha min han hrilhfiah leh teh se.

S P E A K E R : Le, Minister zahawm tak chhang turin sawm ila.

Pu R.LALZIRLIANA, MINISTER : Pu Speaker, member zahawm takte zawh belhna kha Reang Development Area hi sorkar angin engmah kan hre lova. Committee pakhatin hnam hnufual deuhthe chawikanna tur atan tiin an lo ngaihtuah a. Chu pawh chu hei hi in ti dik lo a ni kan ti a. Tih dikna kha an rawn chhuah leh tawh a. Chuvangin, hei hi chu hlauhthawn turah kan ngai lova. Reang Development Area bik siam tumna a awm lo tih kha kan chhanna a ni a.

Tin, E Roll-a thun tur hian central lamin min rawn ti leh tho a. Ama'rawhchu, E Roll-a thun hi a pawl lutuk lohna a awm awm mang e aw tih ngaihtuahna kan neihah chuan kan duh loh ber chu Tuikuk te hi kan duh lo ni lovin, Tripura atanga election apianga vote an rawn thlak ve hi a tha lo a ni. Khulaiah khuan intlansiakna diklo a awm a ni tih hi kan ngaihdan chiang tak a ni a. Chuvangin, ECI (Election Commission of India) pawhin an lehkhah hnuhnungah khan MP leh MLA inthlanah chuan Mizoram atang chauhin vote an thlak tawh ang tih an rawn ziah avangin, nichina kan sawi tawh ang khan E Roll-a thun hian (Tripura atanga khulai camp a rawn awm belhte thun chuang lova) helai atanga chhuk ho an thlahte, an fa-te zel kan thun a nih chuan hlauhawmna a awmin kan hre lo.

Pu K. SANGTHUAMA : Pu Speaker, a dik maithei a. Mahse ECI-te khu kan ngam leh thin lova. Ka rin dan chuan inthlang leh mah ila, vote thlak turin an lo la chhoh si loh chuan min la ti lui leh thova rinna ka nei a. Chuvangin, a Roll-a thun hrim hrim hi chu tuman kan hnial hleinem, Mizoram khua leh tui an nih phawt chuan a thun hrim hrim hi chu kan hnial theih pawh a ni lova. Ama'rawhchu, Tripura-a vote zuk inthlaktir daih mai te hi chu thil fello lian tak mai a ni a. Hei hi chu sorkar in ngun deuh zawka central lam-te pawh hi mumal deuh hlek zawka kan ram tan a that loh zia hi ngaihtuahna thui tak nei leh zel turin zawhna ni lovin, chu chu ka rawn duh a ni e.

Pu R.LALZIRLIANA, MINISTER : Kan sawi belh leh duh chu hei hi sorkar in ngun takin a ngaihtuah a. Anmahni lehkhah ngeiin MP leh MLA election ah chuan Tripura-a vote thlak tawh lo tura an rawn sawi avangin, hemi tan chhan hian sorkar chuan theihtawpin a bei ve dawn a ni tih kha member-te hian hre tlang ila a lawmawm khawp ang.

S P E A K E R : Starred Question No. 121-na zawt turin zawhna neitu MLA zahawm tak Dr.K.Beichhua i lo sawm ang.

Dr. K.BEICHHUA : Pu Speaker, ka lawm e. Health & Family Welfare Department changtu Minister zahawm tak hnena ka zawhna chu – Tuna Mizoram chhunga kan damdawi in neih mekte hi Mizoram Clinical Establishment (Registration and Regulation) Rules, 2014 ang thlapa din leh register an ni em ?

S P E A K E R : A Department changtu Minister zahawm tak Pu Lal Thanzara chhang turin sawm ila.

Pu LAL THANZARA, MINISTER : Pu Speaker, Saiha bialtu zahawm tak Dr. K.Beichhua zawhna chhanna chu – The Mizoram Clinical Establishment (Registration and Regulation) Rules, 2014 hmang hian registration tih mek a ni.

S P E A K E R : Zawh belhna a question neituin a zawt ang a, tichuan, Pu Rinawma'n a zawt chhonzawm dawn nia.

Dr. K.BEICHHUA : Pu Speaker, kan hriat angin ram in hma a sawn a. Medical Science thiamna-te pawh a sang chho zel a. Chutih rual chuan kan ramah hian private hospital te pawh a pung chho ve zel a, a lawmawm a. Chutihlai chuan kan fimkhur a ngai hle-in ka hria a. Kan damdawi in te hi damdawi in tura plan ni lem lo, private hospital te hi mi in luah chawp a, phuahchawp a damdawi in deuh vek an ni a. Chumi a nih avang chuan chhiatrupna leh engemaw thleng thei hi a nih deuh reng avangin, ka zawh belhna-ah chuan State Medical Council hian 2014 atanga vawiin thleng hian meeting vawi engzatnge an neih tawh tih ni se.

Pahnihna-ah chuan District Registering Authority din an ni em? Din ni ta se, tu-te nge member ?

Pathumna-ah chuan tuna private hospital emaw, kohhran an ni emaw, sorkar an ni emaw penalty appeal te an awm tawh em? Tin, private damdawi inah RSVY leh Health Care Scheme-a empanel lo te an awm tih kan hria a. Sorkar hian compulsory-a ti ve ngei tura tih an nei em?

Er. LALRINAWMA : Pu Speaker, ka lawm e. Ka zawhbelhna chu RSBY angah te chuan Insurer Company hian package rate a rawn nei vek a. Rate a rawn bithliah vek a, kan hria a. Kan natna chi hrang hrang azirin, private hospital-a heng damlo enkawlna man hi sorkar hian bithliah a nei em tih hi pakhatna ni ta se.

Pahnihna atan chuan medical reimbursement hi private hospital-ah pawh a va tih theih ta a. Hengte hi an rate rawn tih ang ang hi kan pawmpui mai em ni? Chung rate te chu bithliah sak tumna a awm em tih hi ka zawh belhna a ni e.

Pu JOSEPH LALHIMPUA : Pu Speaker, hospital chungchang a ni a, kan Minister-in min chhan sak thei tho turah ka ngai a. Kan House Leader zahawm tak, kan Chief Minister hi kan ring bawk a niang chu, mipuite tana tangkai tur 'ka ti ang' a tih chu thutiam a ding thin kan ti a, kan sawi mai a. Zobawk-ah hospital, PHC din hi in mamawh hle mai, kan din dawn nia a ti a. Kan mipuite hnenah pawh hospital kan nei dawn e tiin kan lo sawi ve thin a. Kan Health Minister zahawm takin min din sak thei dawn ta em, kan Chief Minister thutiam ang khan tih leh engnge ni tuna a dinhmun tih kha ka'n zawt belh ang e.

S P E A K E R : Zawh belhna tam tak a ni tawh a, chhang turin kan Minister zahawm tak Pu Lal Thanzara lo sawm ila.

Pu LAL THANZARA, MINISTER : Pu Speaker, zawhna neitu member zahawm tak Dr.K.Beichhua zawh belhna-te kha ka chhang mai thei lova. Ama'rawhchu, wawiinah hian ka demand sawi tur a ni a. Ka demand sawi hunah kan la sawi chiang ang

a. Tin, penalty pek an awm em tih kha chu penalty pek an la awm lova. Tin, empanel ngei ngei tura tih an ni em tih kha hmanni-ah private hospital ho kan ko khawm a, tahchuan kan sawiho tawh a. Tlawmngaih chhuaha han ti ve ngei turin kan ngen mek a ni.

Tin, Er. Lalrinawma rawn zawhna RSBY ah chuan bithliah a ni a. Tunah hian sorkar in bithliah a nei em tih kha, bithliah chu kan nei a, mahse, kan bithliah ang hian an rawn tih loh chang a tam a. Tin, an rawn tih ang ang kha kan pawm mai lem lo a ni.

Tin, member zahawm tak Pu Lalhimpuia zawhna Zobawk-ah PHC sak tumna a awm em tih chu sak kan tum a. Tunah hian a contractor tur pawh kan thlang tawh a, bul an tan thuai ang tih kha ka chhanna a ni e, Pu Speaker.

Dr. K.BEICHHUA : State Council Rules-ah kha chuan at least once in three months meeting an nei tur a ni tih kha a ni a. Chuvang chuan kan la nei lo te a nih pheichuan helai hi kan Minister in min lo ngaih pawimawh sak se, a pawimawh hlein ka hria.

Tin, District Registering Authority kha an awm leh ta in ka hria a. District Registering Authority hmalak dan nichina ka zawhna nichin ami kha chiang takin ziaka min pek theih chuan a lawmawm viau-in ka ring a. Ka sawi tawh ang khan chhiatrupna thleng thei thil. thil tha a nih laiin thil tha lo te pawh thleng thut thei a nih avangin fimkhur a tul hlein ka hria a, kha kha min lo ngaih pawimawh sak atan ka chah a ni.

S P E A K E R : Minister-in han chhang leh sela.

Pu LAL THANZARA, MINISTER : Pu Speaker, tih kan lo tum dawn nia.

S P E A K E R : Starred Question No.122-naah kan kal thei ta a. Member zahawm tak, Er. Lalrinawma zawhna neitu leh Pu R.Vanlalvena te zawhna intawm a ni a, a hmasa zawkin lo zawt mai se, Pu Rinawma sawm ila.

Er. LALRINAWMA : Pu Speaker, member zahawm tak Pu Vena khan a zawt dawn a ni ang a, kan inhlan fel tawh a.

S P E A K E R : Aw, in tih ang chuan Pu Vanlalvena lo sawm ila.

Pu R. VANLALVENA : Pu Speaker, ka lawm e. Er. Lalrinawma, member zahawm tak nena kan zawhna intawm nilovin zawhna inang, zawhna kan thehluh ve ve kha a lo inang a, chuta kan zawhna chu hei hi a ni. Health Department Minister zahawm tak chhan atan –

- a) Tun dinhmunah damdawi tha leh tha lo enna laboratory nei turin eng chin nge hma lak a nih tawh?
- b) Eng hunah nge neih theih beisei a nih tih a ni.

S P E A K E R : Minister zahawm tak Pu Lal Thanzara, a changtu Minister sawm ila.

Pu LAL THANZARA, MINISTER : Pu Speaker, member zahawm tak Er. Lalrinawma leh Pu R.Vanlalvena te zawhna inang chhanna chu -

- (a) Kum 2009 atangin damdawi tha leh tha lo enna khawl laboratory kan neih theih nan Detailed Project Report (DPR) siam in hma lak a ni tawh a, tun tlingen a hlawhtlinna kan la hmu thei lo a ni.
- (b) Neih theih hun tur hi sawi mai theih a la ni rih lo tih a ni a.

Pu Speaker, helaiah hian memberte hriat atana kan sawi zau duh chu tunah hian central sorkarin 'Strengthening of Drugs System in India' tih hnuaiah 'Draft Allocation State thenkhat thlan bik atan 7.5 crore hi khawl lei nan min pe dawnin kan hria a. Tunah hian beiseina sang tak neiin kan awm mek a ni.

S P E A K E R : Zawh belhna a awm tawh lo maw? A lawmawm e. Zawhna No. 123-naah kan kal ang a, a zawhna neitu MLA zahawm tak, Pu T.Sangkunga'n zawt se, i lo sawm ang.

Pu T. SANGKUNGA : Pu Speaker, ka lawm e. Ka Starred Question No. 123-na Health Minister zahawm tak chhan atan:-
Heng PHC-ah te hian engtikahnge doctor dah a nih ang ?

- 1) Khawbung P.H.C.
- 2) Bungzung P.H.C.
- 3) Sesih P.H.C.

S P E A K E R : Le, Minister zahawm tak Health Department changtu chhang turin i lo sawm ang.

Pu LAL THANZARA, MINISTER : Pu Speaker, member zahawm tak Pu T.Sangkunga Starred Question No. 123-na chhanna chu -
Heng hnuaia PHC

- 1) Khawbung P.H.C.
- 2) Bungzung P.H.C.
- 3) Sesih P.H.C.-ah te hian doctor dah tum a ni a, amaherawhchu, doctor indaih lohna vangin dah hun tur sawi theih a ni lo tih kha a chhanna kan neih chu a ni. Pu Speaker, tunah hian member zahawm tak lo hriat atan - Khawbung PHC-ah hian doctor dah turin hmalak mek a ni a, tun atanga reiloteah NHM hnuaia atangin doctor kan pe ang a, chumi chuan heng a khaw bul hnai Sesih PHC te hi a va vil tel

dawn a ni. Tin, tunah hian doctor specialist 6 kan la thar dawn a, chungte chu Anaesthetist - 3, Gynea – 2 leh Pediatrician - 1, an vaiin 6 lak thar turin ruahmanna a kal mek a, tun atanga reiloteah hengte hi kan lak mai theih kan beisei a ni, Pu Speaker.

Tin, hei bakah hian pension te leh thi te hmun ruak post thar create tur pawh nilovin M.O. 5 tunah hian lak dilna sorkar-ah kan theh lut mek a, heng hi kan hlawhtlin ngei pawh kan beisei a. Chubakah chuan specialist doctor 3 tunah hian lak tumin hma kan la baw k a ni. Hengte hi kan tihhlawhtlin theih hunah chuan kan ngaih pawimawh zualah te hi chuan tlem azawng chu dah chhoh theih kan beisei.

Tin, chutih rual chuan Pu Speaker, kan member te hnena ka ngen duh chu National Health Mission hnuai atang hian doctor kan la thei reng a, Amaherawhchu, kan doctor passed chhuak tam zawk hian thingtlanga awm ai chuan Aizawl-ah mahni in lum atanga private hospital-a thawh an duh zawk avangin lak tur kan hmu thei mang lova. Khawbunga kan han dah tur te pawh hi hetiang atanga lak tur tho a ni a. Chuvangin kan member ten doctor pass chhuak thar hmelhriat in nei a nih chuan, chutiang chuan tlawmngaih chhuah turin lo sawm tura kan ngen duh baw k che u a.

Chutih rual chuan Pu Speaker, doctor zir tur kan thlan danah hian an zir dawn hian inkaihhruaina dan hi kan lo lekkawh chiah lo nge ni ? MBBS an pass chhuah veleh sorkar quota-a zir te chuan, sorkarin mamawhna a nei a nih chuan a reilo berah sorkar hnuai a kum 2 tal an thawk tur a ni tih kha lo telh tawh thin a nih a, kan lekkawh tha lo a nih pawhin, lekkawh tha leh zual turin tunah hian hma kan la mek a ni, Pu Speaker.

S P E A K E R : Aw, Pu Sangkunga, a neitu.

Pu T. SANGKUNGA : Pu Speaker, kan Minister zahawm tak chhanna kha a lawmawm hlein ka hria a. Heng PHC pathum a doctor awm lohna chhan hi transfer thu ah dan fel loh vang a ni a. Vety. ah te pawh a ni tho mai a; kan bial lamah te chuan doctor pakhat an transfer hian aiawh an dah lo a. MCS te a dang te han en ila, aiawh hi an dah zel a ni. Doctor hi an tlem vang nge, heng PHC pathum (3) a doctor awmte hi an transfer in an aiawh dah loh vek an ni a, Sesih hi doctor a la awm ngai lo emaw an ti a, hmannah kan Minister nen kan sawi a, Sesih-ah hian Health Department-a ka awm laiin ka dah tawh a ni. Champhai-ah doctor chu an attached daih a, a bang a, Durtlang-ah a thawk leh a, khami hnu lamah khan doctor an awm ta lo reng reng a, Assam hun lai atangin BDO awmna ah chuan mihring doctor, Vety. doctor, Agriculture AEO te, Social Welfare ah ICDC officer an awm vek thin a. Tunah hian Khawbunga a doctor ber han awm ta lo hi kan Minister pawhin a ngai pawimawh khawp a, ka sawipui zing tawh a. Doctor an lak leh hunah chuan Khawbung-ah hian NHM mai lo deuh te pawh hi dah theih ni se. Doctor nghet te pawh hi sem rualin NHM doctor te hi kil deuha dah a a nghet chin hi BDO hqrs-ah dah a tha in ka hria. Kan Minister-in hma a la chak a, hmanni lawka doctor 80 lai an dah nghet te kha a ropui a. Doctor nghet lo ho a nghet khatianga quota neih tir ang maia an han pe te kha a ropui a, khang zing ami te kha siam rem theih ni sela, BDO awmna ah hi chuan tih ka'n ngen belh duh a. A dang pawh hi, hmanni lawkah Bungzung ami an sawn chhuak a, aiawh awm lo bawkin an ti leh a, hei hi kan buaina a ni a, a official te hi kan pawimawhin ka hria a, hmanhmawh deuhin Minister a thlen hi chuan lo approve fo a, official te hriat tur chu hetiang officer pawimawh transfer an nih hian an aiawh tur suggest reng reng lo a an tih hian nghawng a nei a, pu te kan venna lai tak tur pawh niin ka hria a. MLA tan pheih chuan doctor sawn bo hi zahthlak deuh mai a nia. Chu chu kan Minister hi doctor an lak ngheh hunah chuan, a pangngai tak te leh NHM hi chu Khawbung bakah PHC dangah min dah sak hram a thei ang em tih kha ngen pahin kan zawt a nih chu.

S P E A K E R : Zawhna leh ngenna. Er. Lalrinawma hian zawh belhna a nei ve a ni, zawt nghal mai rawh se.

Er. LALRINAWMA : Pu Speaker, ka lawm e. Zawh belhna - (1) Ngentiang PHC-ah hian engtik hunah nge doctor dah a nih theih ang? (2) NHM hnuai contract nurse ho hi central atangin an hlawh tur engzat nge bithliah sak an nih? Tun dinhmunah engzatnge pek an nih tih a ni e.

S P E A K E R : Pu T.T.Zothansanga a phar hmasa a.

Pu T.T.ZOTHANSANGA : Pu Speaker, ka lawm e. Hnahlan Hospital kan hawn tum khan Diltlang, Murlen, Pamchung, Lungphunlian leh Aiduzawl-ah te Health Clinic Centre pek kha tiam kan ni a. Nikum kum tawp lamah khan Directorate lam atangin lehkha kan dawng a. Pek chu in ni tho ang a, tun dinhmun takah a la rem lo ve, tih kha a ni a. Tun financial year chhung hian kan nei thei angem tih ka zawt a ni.

S P E A K E R : Awle, Dr.K.Beichhua.

Dr. K. BEICHHUA : Pu Speaker, ka zawh belhna chu – (1)Heng lak tum te hi NHM 3 F nge an nih a MPSC hnuai lak tur ? (2) Advertisement chhuah a ni tawh em ? (3) 2013-ah khan 88 lai kan la a, khang kan lak zing ami panel list a la awm ho kha tunah hian kan la nei em ? Khang ami te kha lak theih an ni ang em tih ka zawh belhna a ni e.

S P E A K E R : Awle, Minister-in chhang khawm mai sela a tha ang e. Pu Lal Thanzara i sawm ang.

Pu LAL THANZARA, MINISTER : Pu Speaker, Pu T.Sangkunga ngenna kha chu kan lo enzui ang a, tihhlawhtlin sak ngei kan lo tum ang e.

Tin, Er.Lalrinawma, member zahawm takin Ngentiang ah engtikah nge doctor kan dah theih ang tih kha, kha pawh kha kan indaih veleh kan dah ang. Tin, NHM hnuaia nurse hlawh hi ka sawi thei mai lo va, nakinah demand sawi hunah rawn hrilh hriat ka tum dawn nia.

Pu T.T.Zothansanga zawhna chhanna - Murlen PHC hi tun financial year ni 4 ni 5 vel lek la awmah hi chuan kan dah theih ka ring lo.

Tin, Dr.K.Beichhua zawhna doctor lak thar tur te hi MPSC kal tlanga lak tur em ni tih kha, MPSC kaltlanga lak tur an ni ang Specialist 6 te kha. Tin, a dang kan dil te pawh hi MPSC kal tlanga lak tur vek an ni ang. Tin, advertisement chhuah loh a la ni. Panel list kha a la nung a nih chuan chung te pawh chu an lut thei ang chu.

S P E A K E R : Zawh belhna a tam tawh em mai, duh tawh ang aw. Zawhna No. 124-na, a zawhna neitu MLA zahawm tak Pu R.L.Pianmawia zawt turin i sawm ang.

Pu R.L.PIANMAWIA : Pu Speaker, ka zawhna No. 124- na Home Minister zahawm tak chhan atan –

Home Department hian Ekin kalthei lei tumna a nei em ? Lei tum a nih chuan engzatnge lei a tum, a man tur engzatnge ?

S P E A K E R : Awle, Home Minister zahawm tak Pu R. Lalzirliana chhang turin i sawm ang.

Pu R. LALZIRLIANA, MINISTER : Pu Speaker, member zahawm tak Pu R.L.Pianmawia zawhna chhanna chu -

Home Department hian Ek in kalthei lei tumna a nei lo va. Lei tura rawtna pawh tun dinhmunah chuan a nei lo a ni.

S P E A K E R : Zawhbelhna a awm lo a. No. 125-ah kal ila, zawhna neitu Er.Lalrinawma, MLA zahawm tak zawt turin i sawm ang.

Er.LALRINAWMA : Pu Speaker, ka lawm e. Tourism changtu Minister zahawm tak hna ka Starred Question No. 125-na –

- (a) Tun dinhmunah tourist facilities engzatah nge upper ceiling price siam a nih ?
- (b) Tourist facilities hming leh upper ceiling price zat min hrilh thei em ?
- (c) Privatization of facilities chungchanga upper ceiling price hi eng rule tlawhchhana siam nge a nih ?
- (d) Upper ceiling price siam a nih avanga sorkar sum hloh tur zat hi chhutchhuah a ni em tih a ni e. Ka lawm e.

S P E A K E R : Awle, department neitu Minister zahawm tak Pu John Rotluangliana chhang turin sawm ila.

Pu JOHN ROTLUANGLIANA, MINISTER : Pu Speaker, member zahawm tak Er.Lalrinawma Starred Question No.125 na chhanna chu –

- (a) Tun dinhmunah tourist facilities 8-ah upper ceiling price siam a ni.
- (b) Tourist facilities hming leh upper ceiling price zat te chu henge hi an ni :
 - 1. Tourist Lodge Bairabi - ₹ 3,000
 - 2. Tourist Lodge Saitual - ₹ 3,000
 - 3. Picnic Spot Sairang - ₹ 1,000
 - 4.
- (c) Upper ceiling hi rule tlawhchhana siam a ni lo tih a ni a. Tilai hi kan sawifiah duh chu Pu Speaker, hei hi a rules tlawhchhana siam ni lo mahsela

administrative approval, Finance concurrent leh Law-ah vetting a tih vek a ni e.

(d) Upper ceiling price siam a nih avangin sorkarin sum hloh a nei lo.

S P E A K E R : Zawhbelhna Pu Rinawma.

Er. LALRINAWMA : Pu Speaker, ka lawm e. Kan Minister zahawm tak khan sorkarin sum hloh a nei lo a ti a. Amaherawhchu, he tourist facilities tender, a hma lawkah khan tender chhuah a ni tih kan hria a, hmanni demand sawinaah kan sawi tawh a. Khatah khan Travellers Inn Vairengte atan hian a chhang sang ber hian tender rate hi ₹ 70,100 per month in a chhang. Mi 16 in an chhang a, mi 15 hian upper ceiling price leh a aia sangin an chhang vek a ni. Tin, Tourist Resort, Hmuifang hi upper ceilingah ₹15,000 per month siam a ni a, min chhan ang khan. Tender changtu hian ₹50,500 per month in a chhang a. Tin, a chhangtu mi 8 zinga 7 hian upper ceiling leh a aia sangin an chhang vek a ni. Tin, Highway Restaurant, Thingdawl-ah hian upper ceiling-ah ₹5000 siam a ni a kan hriat ang khan. Amaherawhchu, helaia tender chhuah a nih hian a chhang sang ber hian ₹41,700 in a chhang a. Tichuan, heng a chhangtu mi 16 hian upper ceiling aia sangin an chhang vek nghe nghe a ni. Ka'n sawi duh lai chu helaiah hian tender, min kan luah ang tihna rate a awm tawh vek laia, a aia hniama luah tir tum tlat hian sorkar chawi tur zat hi chu a chiang viau ah a ngaih theih a ni. Helaia sorkarin chawi tur a nei lo tih lai kha chu a ngaihtuah tham deuh lo maw kan ti a.

Tin, nichina 3 a tih kha Tourist Resort 8 laiah hian upper ceiling siam a ni a, hei expression of interest-ah hian a lang a, khalaite kha helaia rule awm lo a sorkar chawina zawnga rate lo siam mai lai hi ennawn a tha lo maw tih kha Pu Speaker, ka zawhna a ni e.

S P E A K E R : Zawhbelhna dang a awm em? Aawm loh chuan Minister zahawm takin chhang se.

Pu JOHN ROTLUANGLIANA, MINISTER : Pu Speaker, ka demand sawi ni khan ka sawifiah tawhin ka hria a. A hmasa in upper ceiling kan siam hma khan hetilaia a rawn sawi, sang tak tak a chhangte kha an ni a. Uluk takin department lam ten an han zirchiang a. Mithenkhat, mi tha vak lo te i ti mai ang, khangte khan a nihna tur anga hman tum lo va, engemaw zu zawrh nan te leh thil dang tih nana hman tum an ni ang tih tur khawpa sang khan an rawn chhan avangin hei hi chu a fel lo kan ti a. Chuvang chuan, kha kha kan differ a, tichuan upper ceiling kha siam a ni ta a ni.

Tin, upper ceiling kha pariat kan siam a, a dik a. Amaherawhchu, kan pek tak kha pathum chauh a nih avang khan pek chuan loh kha chuan siam loh tlukah ka ngai deuh a, tih that leh tur a nih avangin. Chuvang chuan kha kha ka rawn sawi lang ta lova.

Tin, Pu Speaker, hetiang a Tourist Lodge kan han tih a privatization kan han tih rual hian a nihna takah chuan hmanna ka sawifiah ang khan a management contract ang chauh hi a ni. Tuna hetiang a privatise tura kan han tih a, a contract tura kan han tih hian a tirah tak phei chuan 16 kan thlang chhuak a. Kan han tender a, pali phei chuan chhangtu kha a hmu lo reng reng a. Tin, a hnua kan han pek leh pawh kha pahnihte khan an rawn decline leh a. A awmzia chu tourist facilities pek chhuah kan tumte hi ka sawifiah tawh thin ang khan a building te chhe em em tawh mai, ceiling pawh tla deuh vek tawh, a then chhia, chokut mawih tih vel te a ni a. Chutiang avang chuan repair tur a tam si a, a bul an tanna tur atan hian engpawhnisela, sorkarin hek lovin heti zat hian in luah mai thei lawm ni kan ti mai a ni. Tin, hei hi nakinah tlema an lo inbenbel ve hnu ah chuan kum thum hnu ah a rate pawh hi kan ennawn leh ang kan ti a ni.

Tin, Pu Speaker, Lai, Mara leh Chakma District-ah te pawh kan va kal a, hmannia ka sawi ang khan Council ho te pawh, 'min laksak rawh u, in Council chhung ami hi min enkawlsak rawh u,' kan tih pawhin pakhatmah min enkawlsak thei an awm lova. An duh lai tak chu district headquarters ami zel kha a ni bawk si a, khatilai tak kha kan phal loh lai a ni ve bawk si a. A dang kha an la duh bawk si lova. Tunhmain Tourist Lodge kan lo sa teuh teuh mai si a, a enkawlina lamah kan harsa tawh si a. Chuvangin tihian a management contract ang zawng hian ti ila kan ti a, tichuan thenkhat kan han pek chhuah te pawh hi an lo hlawk deuh a, an stable deuh hunah chuan a rate te pawh kan enthat sak ang kan ti a ni.

Vawiinah hian sawrkarin pakhatmah hloh kan nei lova. Tuna kan han tih hote pawh hi thla khatah heti zat hi revenue an rawn chhung, sangnga an rawn chhung te an ti a. A revenue lo lak te maia kha chu sangnga a ni a. Mahse, expenditure lam han ngaihtuah kha chuan MR pakhat ringawt pawh sangruk chuang an lo ni, tui bill leh electric bill, cable te an lo pawt ve a, chutiang zawng zawng nena tih chuan thlatin chawina vek kha a ni a. Chuvang chuan tuna ceiling kan han siana hetia kan han ti pawh hi an ngam awm tawh velin 'in luah ve thei mai lawm ni,' kan ti a, kan va offer a ni zawk mah mah e. Pu Speaker, ka lawm e.

Pu K. SANGTHUAMA : Pu Speaker, khawngaihin, office thenkhat kan khar mek a, heti khawpa a hlawk loh si chuan engemaw hlawk lo ang ho then hi chu khar leh mai Pu Speaker, a tha lawm ni tih kha ka'n zawt leh lawk duh a ni.

SPEAKER : Rawtna a ni mai lo'm ni? Zawhna...khar mai a tha tih rawtna a nih chu.

Pu JOHN ROTLUANGLIANA, MINISTER : Pu Speaker, eng office te nge ka hre lova, ka chhan tur chi a ni em tih pawh ka va hrethiam lo ve.

Pu K. SANGTHUAMA : Ka sawi chiang lo deuh a, Corporation pathum lai kan khar a, hengte pawh a hlawk loh vanga khar kan ni a. Chuvang chuan tuna kan Tourist Lodge hlawk lo zual ti mai ila, a awmna lai kil deuh hlek, mi pawh thlen lohna hi chu khar ngam leh mai ila a tha lawm ni? A theih ang em tih kha ka'n zawt a nih chu, Pu Speaker.

Pu JOHN ROTLUANGLIANA, MINISTER : Pu Speaker, hetiang zawnga hma la chho mek chu kan ni e. A tul ang zelin kan la ti chho ang.

SPEAKER : Tunah Zawhna No. 126-naah kan kal ang a, zawhna neitu Dr. K. Beichhua i lo sawm ang.

Dr. K. BEICHHUA : Pu Speaker, ka lawm e. UD&PA Department changtu Minister hnena ka zawhna chu –

- (a) UD&PA hnuaia Siaha Meisatla-a field laih mek hi pawisa cheng engzatnge ruahman a nih?
- (b) Tun dinhmuna physical leh financial achievement engzatnge?
- (c) Pawisa hi eng Ministry atanga hmuh nge a nih?

SPEAKER : Awle, a Department changtu Minister zahawm tak Pu Zodintluanga sawm ang.

Pu ZODINTLUANGA, MINISTER : Pu, Speaker, kum dangah chuan heng zawhna lo kal tawh kan chhan tawhsa hi chu zawh lo mai thin kha a ni a. Amaherawhchu, nanging chhang tura min tih chuan ... (SPEAKER : In chhan tawh a lo ni maw?)

Demand-ah pawh khan kan sawi tawh a. Starred Question 126-na chhanna chu -

- (a) UD&PA hnuaia Siaha Meisatla field laihna atan hian a hranpa a ruahmanna siam a ni lo. Amaherawhchu, sorkar thahnemngaihna '10% lumpsum grants' hnuaia Siaha Development Scheme thawhna savings atangin ₹ 100 lakh ruahman a ni. Tin, tunah hian stadium puitling din theihna tur DPR ₹ 2498.14 lakh hi Ministry of Urban Development-ah thawn niin sanction nghah mek a ni.
- (b) Savings atanga sum awm thei zat atanga thawh chin tur chu thawh zawh a ni tawh.
- (c) He project hi Ministry of Housing & Poverty Alleviation atanga hmuh a ni Ka lawm e.

SPEAKER : Chhan tawh a ni a, i la zawt leh dawn em ni?

Dr. K. BEICHHUA : Pu Speaker, chhan tawh hi a hlawhtlin si loh a rualawh a nat si chuan zawh belh zawh belh mai loh chuan tih kha ka rawn sawi duh a. Hmun dangah Sports & Youth Services atang tein artificial turf an phah te nitin kan hmu ve reng a, rualawh hi a na duh ting mai si a. Ka zawt ka zawt dawn a ni, hei hi min siam sak hma loh chuan Pu Speaker. (SPEAKER : I zawt dawn nge i nawr dawn?) Contractor hi lak a ni em tih ka zawhna pakhatna ni ta se. Tin, tuna UD&PA atanga DPR kan thehluh kha lo fuh lo palh hlauh ta se engtinge sports lam changtu a ni tho a, hmalak dan tur dang min dap sak dan tur kawng a awm ang em tih kha ka zawhna a ni a.

Kan hriat angin hmanni MFA tournament-ah pawh khan khitiang field atang khian Serchhip-ah final kan lut a, 1-0 in kan chak lova. Tukinah ngei pawh hian Tata Football Academy-ah trial neiin ka mikhual pahnih te pawh an la awm a.

SPEAKER : Zawhna hun a tawp ta e. I zawt sei deuh a, a chhang hman ta lo a ni.

Dr. K. BEICHHUA : Pu Speaker, chhanna kha member-te i zawt thin emaw ka ti a, ‘hun a tawp tawh a, chhan in phal em?’ i ti thin khan ka hria a.

SPEAKER : Awle, Minister zahawm takin chhan tur a neih chuan, a nih leh, i chhan tir lawk ang aw.

Pu ZODINTLUANGA, MINISTER : Pu Speaker, saw project saw national tender chhuah a ni a, national tender an chhuah hnua contractor-ten an chhan a ni a. An hnuaiah tute nge sub-contract an pek leh pek loh chu kan hre lova. Amaherawhchu, tender chhuah thlap, engkim national a e-tender a ni nghe nghe in ka hria, chutianga chhuah chu a ni. Tin, tuna Saiha project hi kan beisei khawp a. Helai hi a lo chhuak lo te a nih chuan kan member zahawm tak kha a dil thiam dan azirin ngaih pawimawh te kan nei dawn nge dawn lo chu kan la ngaihtuah tha ang chu.

SPEAKER : Zawhna hun hi chu Minister zahawm tak te chhan laklawh lai a nih lem loh chuan pawhsei tehchiam a ngailo tih kha hria ila.

Aw le, vawiinah hian kan zingah Parliamentary Secretary zahawm tak pahnih, Lt.Col.Z.S.Zuala leh Pu K.S.Thanga ten he House-a awm loh phalna an rawn dil a, kan phalsak a. Lt.Col.Z.S.Zuala hi niminah khan a nau hmeichhia a thi a, churang chuan vawiinah hian a chawlh a ngai a ni. Tin, Pu K.S.Thanga hi a pile na doctor-in zai ngaiin an hria a ni tih kha hria ila.

Tin, thil pakhat House hriat atana kan duh chu Committee on Govt. Assurance nikuma Zokhawthiang daia an ambush ni kha vawiin hi a ni tih kha hria ila. Kan police huaisen thi ta te kan hre reng a, kan member zahawm tak te thlabarna te pawh kan hre reng a ni tih kha hria ila a tha ang e.

Pu C.Ngunlianchunga'n paper lay tur a nei a,han lay sela. A paper lay-na chhan te pawh khawngaih in amahin han sawi nghal mai teh se.

Pu C.NGUNLIANCHUNGA, MINISTER : Pu Speaker, paper lay-na hun min pek avangin ka lawm e. Ka paper lay tur chu, 22.3.2016-a Starred Question no.169-na, ballot no.68-na, Dr.K.Beichhua, MLA zahawm tak leh Er.Lalrinawma, MLA zahawm tak te zawhna, 'ran lakluh chungchang' tih a ka chhanna ah khan tihsual palh a lo awm a, chu chu khawngaih takin correction siam min phalsak turin he House-ah hian paper chu kan lay a ni.

Pu Speaker, ka'n sawifiah lawk ang a a siamthat ngai lai te kha. Zawhna 'a'-na ah khan, 2014-15 chhungin ram pawn atangin vawk, bawng, ui leh ar engzat nge kan lakluh tih chhanna 1(3)-naah, NLUP bik atangin vawk note 28810 tih kha 28110 tih tur a ni. Khalai ah khan 88 nilovin 28110 tih tur a ni a. Tin, a tawp ka khaikhawmnaah khan maktaduai nilovin vaibelchhe 74 nuai 55 sing 44300 ti a siam tur a ni e, Pu Speaker. Ka lawm e.

SPEAKER : A tihdikna copy kha member-te hnenah sem ni se. Awle, tunah chuan 3rd Report of Committee on Govt. Assurance, 2016 he House-a present turin Pu R.Vanlalvena, MLA zahawm tak i sawm ang.

Pu R.VANLALVENA : Pu Speaker, ka lawm e. I phalna leh i remtihna in he House zahawm takah hian Committee on Govt. Assurance-in min pawmpui angin, 3rd Report of Committee on Govt. Assurance chu ka rawn present e. Ka lawm e.

SPEAKER : A copy kha member zahawm tak te hnenah sem ni se.

Aw le, vawiin chu kan Minister zahawm tak te Pu R.Romawia leh Pu Lal Thanzara te demand hrang hrang sawiho a vote kan lak ni a ni a. A pahnih hian kan la

kawp mai thin a, vawiinah pawh hian Minister zahawm tak te pahnih chan hi vawikhatah la kawp ve mai ila a tha ang e. Tichuan Minister zahawm tak Pu R.Romawia kan sawm ang a, Demand No.6,12, 21,23-na te he House-ah hian rawn submit sela, amah i sawm ang.

Pu R.ROMAWIA, MINISTER : Pu Speaker, on the recommendation of the Governor of Mizoram and with your permission, Sir, I move the Demand No.6,12,21 and 23 for Rs.2,19,37,46,000.00 for meeting expenses during 2016-2017 in respect of the following departments-

Demand No.6 - Land Revenue & Settlement Deptt.	₹ 28,33,98,000.00
Demand No.12- Parliamentary Affairs Deptt.	₹ 54,15,000
Demand No.21- Higher & Tech Edn. Deptt.	₹ 1,81,73,06,000
Demand No.23- Art & Culture Deptt.	₹ 8,76,27,000
Total	- ₹ 2,19,37,46,000.

Thank you.

SPEAKER : Tunah chuan Minister, Pu Lal Thanzara, Demand No. 24, 26, 48-na te submit turin i sawm ang.

Pu LAL THANZARA, MINISTER : Mr. Speaker Sir, on the recommendation of the Governor of Mizoram and with your permission Sir, I move the Demand No.24, 26 & 48 for ₹4,42,69,35,000 only for meeting expenses during 2016-2017 in respect of the following departments -

Demand No.24 - Health & Family Welfare Deptt.	- ₹ 4,14,28,26,000.
Demand No.26 - Information & Public Relations Deptt.	- ₹.14,19,96,000
Demand No.48 - Information & Communication Technology	- ₹ 14,21,13,000
Total	- ₹ 4,42,69,35,000

Thanking you Sir

SPEAKER : Kan Minister zahawm tak pahnih Pu R. Romawia leh Pu Lal Thanzara te demand hrang hrang chu he House-ah hian submit a lo ni ta a. Tunah a pahnih hian a sawihonaah khan kan kawp leh dawn a ni. Khawngaihni, sawi thin ang khan, a hnung lam nih kha inchuh lem lo ila, hun hian min nghak si lova. Pu Hmingdailova Khiangte. Chair kan inthlak lawk, i sawi hma in.

DEPUTY SPEAKER : Sawi rawh le.

Pu HMINGDAILOVA KHIANGTE : Pu Deputy Speaker, kan Minister zahawm tak pahnihte demand hi mipuite tana pawimawh ngawih ngawih Deptt.-te an ni hlawm a, support pawh an phu khawp mai. Pu Deputy Speaker, ka rawn support thiam ang em aw! maw. Amaherawhchu, ka support pah hian duhthawhna lam kan uar zaw mah ang a. Kan Minister zahawm tak takte pahnih ngeng hi ka lo chhun na palh anih pawhin an ngaihnathiam ka'n dil nghal a ni.

A hmasa berin demand no.6 Land Revenue & Settlement ka sawi duh a. Kan chenna in te leh eizawn nana kan hman, huan leh leilet te, pass, ramri engkim min enkawlsaktu an nih avangin an pawimawh hle mai a. Chutih lai chuan, an siamchhuah thin LSC hi, miten loan an lak nana LSC-te hi a tam ni awm takin an sawi a. Hengte hi hun hmasa a awm thin kha a ni a, a la awm zel em tih te pawh hi a changtu kan Minister zahawm tak hian min chhang theiin ka ring a. A la awm zel a nih chuan tih tawp chi a nih ka ring bawk a.

Tin, compensation hi Mizoramah kan uar viau mai a, genuine taka lak tul te pawh a awm ngei ang a. Compensation lak dawn chuan survey a lo ngai a, survey hi a pawimawh hle mai a, a surveyor-te hi an pawimawh lehzuol a. Huan leh ram neitu dik tak ten compensation lak nan uchuak takin surveyor-te nen 50-50 agreement an siam thin ni a kan hriatte hi ram tan hmelma an ni pha in ka hria a. Tin, chu mai a ni lo, ram nei hauh lova compensation lak dawna ram nei chawp mai thei te hi an awm zel bawk a.

Hengte hi surveyor-te, VC-ten mawh an phurin ka ring a. Hengte pawh hi ram hmelma a ni lo thei lovang. Tin, ram nei hauh lovin compensation lak beiseiin mi ramte pawh an lei bawk a. Tin, ram ruak atangte pawhin LSC-te pawh an siam thei mai bawk a.

Example kan sawi hnem tawh viau a, Tuirial Hydel Project kha kum 1997-98 vel khan buatsaih a ni a, Japanese Overseas Company-te nen agreement sign fel vek a ni a, a lungte pawh phun a ni a, pawisa pawh vbc.376 vel neihsa vek a ni a. Amaherawhchu, compensation lam kan uar luatah kha Tuirial Hydel Project kha, Mizoram tana asset tha em em tur, MW 60 thar thei kha, compensation in a ei hlum thak mai a. Compensation uchuak kha awm lo ta se 2004-05 khan kan commission tawh ang a, vawiin te hian chu asset chu kan hmang tangkai hle tawhin a rinawm a ni. Chutah, central sorkar zarah kan han chhonzawm leh a, vbc.900 a lo ngai tawh a. Ram in a thatpui tur kha a chhiatpui lamah kan kal thui viauin a lang a. Tin, compensation in min tihbuai em em lang chiang chu, Bairabi atangin Sairang thlengin 51 km lek rel kawng siam tur a ni a, compensation uchuak avangin, 2014-15-a commission theih tur kha 2019-ah kan beisei deuh dar dar chauh mai a. Heng hian kan ram asset tur, kan ram hmasawmna tur hi a khawih chhe hnem lutuk a ni tih hi Pu Deputy Speaker, vawiinah hian auchhuahpui tha in ka hria a, thiam lo takin ka rawn sawi ve a ni.

Tin, chu lo leh ah 1998 atanga 2003-2008 inkarah khan Serkhan-Bagha Road hi tlang daih tawh tur a ni a, ka tih awmzia chu, metal tawh chu 75 km nia report siin 14 km chauh mai metal te kha a dik lo nasa lutuk a. Tin, chu mai ni lovin, tunah hian compensation uchuak lutuk bawk avangin fur hi chu kan tuar leh hrim hrim dawn in ka hria a, a pawh hle in ka hria. Hengte hi a intanna chu survey a ni tlat a, chu chu Pu Deputy Speaker, thiam lo takin, uar taka han sawi tha in ka hria a.

Tin, chu lo lehah chuan, demand no.21-na Higher & Technical Education hi school naupangte tana scholarship petute an ni a. Tin, zirlai standard sang buaipuitute an ni bawk a. A tlangpuiin hma kan sawnin ka hria a, sawisel tur a vang viauin ka hria a.

Amaherawhchu, tlem han sawi uar ka duh leh duhthawhna lam chu, Congress term hmasa, 2008-13 inkarah khan, Polytechnic School Mizoram panga(5) kan dawng a, pakhat chu Kolasib District-ah pek a ni a, chu chu Thingdawl khuaah dah a ni, building-te pawh an sa rang a, an sa tha khawp mai a. Amaherawhchu, problem pahnih a awm a, building hmasa ber chu Administrative Building a ni a, a building pawh a chhe lo, pahnihna chu Electrical training nan, pathumna chu Mechanical training na tur a ni a, a pali na hi Hall leh Library an ti a. Lo commission tehreng mah ila, Pu Deputy Speaker, staff quarter tur pakhatmah a awm lo tih hi vawiinah hian ka sawi chhuak duh a. Tin, nikum kum laihawl vel khan report ka dawn avangin ka va tlawh a. Electrical wiring kha an ru zo deuh vek a, vengtu an awm lo em ni ka hre lo. Chu dinhmuna ding chu, vawiin hian kan Minister changtu hian eng angin nge ro min rel sak ang, min hawn sak mai dawn em tih hi ka zawt duh a. Pu Deputy Speaker, min lo hriatsak la ka lawm khawp ang.

Ka'n zuang deuh zawr zawr ang a, demand no.24-na ah ka'n kal lehngal mai ang a. Health & Family Welfare-in Mizoram tana hna a thawh that nasatzia hi sawisen a ni lovang a. Nitin mai, darkar tin mai, minute tin mai hian kan mamawhna hi sawisen loh a ni. Chuvang chuan, khati lam kha thui tak sawi lo turah in ngai ila. Ka sawi duh lai erawh chu, Congress term hmasa 2008-13 ah khan Health Worker training-na kha a awm a. Khata training na hmasa bera pass kha Lungmuat khua-ah sawn nula pakhat hna hmu lo a la awm a. Tin, saw khua-ah sawn Health Worker mipa leh hmeichhia awm turah mipa chauh kumkhat dawn lai a awm tawh a. Chu hmeichhia nula chu a khua ami te chuan an tangkaipuiin an tibuai hle a, chumi chu lak ngal mai theih ni se a va tha dawn em Pu Deputy Speaker, tih kha kan rawt duh a. (DEPUTY SPEAKER : Minute khat i la nei) Awle, ka lawm e.

Tin, nichina Polytechnic School building ang bawh khan Nurse Training Centre kan ti dawn nge, school Thingdawla awm bawh khu an in thenawm nghe nghe a. Hei kan Minister zahawm tak pu thlan piah lawk khu a ni

nghe nghe a. Khu pawh khu a electrical wiring kha an lo tichhe vek a, an lo ru hlawm bawk a, ka zuk tlawh a. Building hi an zawhna a rei tawh si a, a hawn te hi a hun tawh mai lawm ni tih hi Pu Deputy Speaker, ka rawn zawt a ni. Heng hi duham taka support paha duhthawhna lam hliir ka rawn sawi hi min lo ngaithiam sela, kan department dang zawng zawng pawh hi sawisen loh an ni a. Ka support vek a ni tih kha Pu Deputy Speaker, ka rawn sawi ve e, ka lawm e.

DEPUTY SPEAKER : Dr. Ngurdingliana

Dr. NGURDINGLIANA : Pu Deputy Speaker, ka lawm e. Demand te hi sawi vek ka duh a, hun in min daih chuan. A hmasa-in thil lawmawm lam, tunthla March ni 15 ah kan ramah rel lian chi bungraw phur a lo lut a, niminah mihring phur chi thlawhna lian chi a lo lut bawk a ni. Hei hi rorelna dik, rorelna langtlang sorkarna hnuaiiah chuan a lo lut mai thin a ni tih kha member te kan hriattir nawn leh a ni. (Deputy Speaker : Thlawhna kha Delhi direct flight a ni maw) Mi 168 phur thei, hei hi kan sorkar hmalakna a nih avangin kan tarlang hmasa ani e.

Demand No. 6-na Land Revenue & Settlement Department-ah khan luh nghal chat ka duh a. Anni hi Pu Deputy Speaker, a langa mipui nawl khawih si lo, amaherawhchu, ram hnuk tak tak, kan ram himna thui tak kalpui thei department a nih avang hian an hmalakna hi a lang viau lo na a, an thawkrim hle a ni tih hi kan hriat ka duh a. A tawi zawngin kum 2009 atanga kumin 2016 thlenga khua leh tui te him dam taka kan awm theih nan Dan, Rules, Acts, Ordinance te hi an siam tam em em a, hei hian an thawhrim zia a tilang a, chungte chu han tarlan kan duh a ni Pu Deputy Speaker.

Pakhatna-ah chuan The Mizoram Land Survey Operation Rules, 19th March 2009 khan an lo siam fel tawh a. The Mizo District Transferring Land

Amendment Bill, 23rd March, 2009 khan an lo chhawpchuak leh tawh bawk a. Tin, The Mizoram Land Revenue Bill, 3rd April 2015 leh tun session kal mekah hian kan Minister zahawm tak khan Ordinance a rawn pulut bawk a. Chu chu The Mizoram Land Acquisition, Rehabilitation & Resettlement Ordinance, 2005 a ni. Heng hian he kan Department hian lian hluaia lang si lovin, kan ram, kan hnam tana hna an lo thawhna nasa tak hi a lawmawm ka ti a, ka appreciate zia ka rawn tarlang duh a ni.

Art & Culture Department-ah khan kan lut leh zawk ang a, Pu Deputy Speaker, tuna hmalak mekna TAGORE International Culture Beraw tlanga an thawh mek pawh saw kan ram kan hnam tan chuan ro tling ni tak zet in ka hria a. Cheng nuai sangkhat zanga man lai hi zo rang thei hram se, mamawhna a nasa si a tih kha kan sawi nawn pah ni se.

Tin, Art & Culture Department in an tih that em em thingtlang lama library an siam kha fund a tlem nge, tuna an hmalakna hi ka hre chiah lova. Hei hi a tangkai em em mai a. Naupang atanga puitling thlengin adult literacy 100% achieve tura hma kan lakna ah pawh nasa takin a pui a ni tih hi kan Minister hian min lo hriatsak sela, tun aia nasa zawkin khaw kilkhawra bun chho zel turin hma la se tih kha duhthawhna in kan ngen bawk a ni.

Tin, pi leh pu te sulhnu preservation of old heritage monuments khatianga neih thin kha tunah hian hma kan la zau vak lo nge, fund a tlem nge ka hre lova. Hei pawh hi uar deuh deuh ni se, Mizoram hmun hrang hrangah hian khatiang chi veng/khua in kan neih te pawh kha dapchhuah hna han chhonzawm thei zel sela ka'n duh a ni.

Tin, hemi piaha ka vei em em pakhat chu, Mizoram State Museum saw a chhunga thil awm a that tehluul nen Pu Deputy Speaker, a hmun hma

sawn min hip lo hrim hrim mai a. Mi rama State Museum an neih te chu an culture, an hnam ziarangin a building te pawh an siam a. A chhungah fountain te, eng eng emaw kha, tlawh chak awm em em, va tlawh pawha rilru pik deuha kal tan pawh zangkhai taka chhuah theihna, khatiang boruak te kha an siam a. Tuna kan neih saw chu building a awm tawp a, a bul field-ah inkhel an awm a, an zi nuai nuai mai a, min hip thei deuh tur ang, hmun thengthaw nuam deuh ah kan Department/Minister hian hma la se, chumi atan pawh chuan DPR uluk deuh, architect design changkang deuhin hma la thei se duhthawhna-ah ka'n sawi a ni.

Tin, kan festival neih Chapchar Kut kan hman danah te hian a lawmawm em em a, kan hmalakna ah. Amaherawhchu, tun aia nasa zawka ram pawn leh ram chhung ami hip theih nan programme te pawh felfai takin, an lo kal a, transportation leh accommodation ruamhmanna mumal tak nei thei turin ka'n ngen bawk a ni.

Higher & Technical Education ah hian Pu Dy. Speaker, Mizoram sorkar hnuaiah hian College 22, Teachers Training College 2, Collegiate Boys & Girls Hostel 2, Polytechnic 1, Mizoram Polytechnic, Lunglei 1 leh MZU, Mizoram University leh affiliated Pachhunga University College te kan nei a. An hmalakna a lawmawm a. Amaherawhchu thian thenkhatte ka han kawmnaah, tun kum hnih/thum chhung hian college level ah hian duhai chuan tlemin hma kan sawn a ngai deuh a ni lawm ni ka ti deuh a. Amaherawhchu, UGC norms in a phut angin institution chhungah teaching hour darkar 4 tal zirtirtute hi an awm tur a ni tih a ni thin a. Amaherawhchu, thawkkhat lai atang khan engnge a chhan ka hre lova, zirtirtute lamah institution, college hriatpui lo an awm nualin a lang a. Tin, an hmalakna kal chho zelah zirlaite chu an thluak kan sawizawi reng tur a ni, zirtirtute pawh chutiang bawk in hma la tho mahse duh aiin symposium te, workshop te, conference-te hi tunai chuan tam thei deuh se a duhawm khawp mai.

Vanneihthlak takin tunah hian Mizoram sorkar hian Higher Education enkawlina turah hian a sum hlawm kan va pek a hi chu hlawh a ni.

Kan lecturer, kan zirtirtute hlawh hi a tam khawp mai a, nuai khat chuang a ni mai a, a hming chu sawitel lo ila, tuna kan hotu lo chhuak tawhin a sawi dan pheih chuan, 'kan hlawh hi a tam lutuk a, hmusit vang nilo in police constable paruk hlawh leh kan hlawh hi a in ang a ni,' a ti e, an ti a. Chutihruah chuan sorkar atanga tha tak UGC norms, UGC pay an enjoy avang hian tha thawh ve se tih hi ka thahnemngaihnaah ka lo beisei thin a. Tunah hian National Accreditation & Assessment Council kaltlang lo chuan college hmasawna reng reng hi pek tawh loh a ni a. Ka hriatsual loh chuan tunah hian Zawlnuam College leh Khawzawl College chiah hi UGC in a thuneihna a va pek NAAC kan ti mai a, an la endik loh awmchhun pahnih chiah an la awm a. Central atanga sum lo kal khu a grading an pek ah chuan A,B,C a ni ta a. A-Grade college kan nei nual a. Pahnih chauh kan lam ang a, Pachhunga University College leh Hrangbana College saw tunah hian A-grade ah an awm in ka hria a. Khang A-grade a awm thei tur khan tehfung criterian hrang hrang a awm a, khami an phak kha chuan tlem min pek belh mai teh Pu Deputy Speaker, department dang pawh a la awm. (DEPUTY SPEAKER : Hmanhmawh deuh hlek in.) Khatiang khan tehfung an rawn nei a, kha kha Mizoram sorkar atanga sum tam tak lut lo khan khami accreditation stage-ah A-level a awm kha infrastructure development atan pawh sum a awm a ni. Zirtirtute inthlahdah lohna turin hemi chhung hian lehkhabu 4/5 i publish tur a ni a. Tin, Symposium/ Conference i attend tur a ni a, tih te a keng tel a. Chuvangin kumin ngeiah pawh Khawzawl leh Zawlnuam College pawh hi NAAC kan tih hian an rawn en dawn a ni awm a, heti zawng hian hma la thei se ka duh a.

Tin, Principal leh Lecturer chungchangah chanchin lawmawm deuh mai kan lo hria a, a lawmawm a. Associate Professor 6 lai tunah Professor-a

kaisang turin MPSC-ah recommendation a lut tih te pawh kan lo hria a. Tin, chutih rualin Principal post hi kumin chhung ngei hian dah ngheh theih ni hram sela, a chhan chu Principal post kan han dah hian kum 5 chhung a ni ve tlat tawh a. Kum 5 chhung hian mi thahnemngai chuan a enkawl college kha plan mumal tak nen academic achievement khithah a kal pui thei a ni. Chuvangin hei hi chu kumin chhung ngeia chinfel theih ni se a lawmawm ngawt ang.

Tin, Higher & Technical Education pawh hian hmalakna tam tak a nei a Pu Deputy Speaker. Polytechnic tunah Kolasib leh Champhai pheih chu peih a ni tawh a. Kumin chhung ngeiin Lawngtlai te, Mamit te, Saiha te, Serchhip te din an tum lehngal a, a hmalakna hi ka rawn ziak chhuak vek a, a tam a, a tawi zawngin Higher & Technical Education in a kan ram (DEPUTY SPEAKER: I hun i hmang zova, tih tawp tum deuh tawh la a tha ang a.) Health-ah pawh ka la lut lova, a pawl lo Pu Deputy Speaker, minute 20 kha lo ni se a that dawn tehlul nen. Engpawhnise Health Department te achievement a ropui a, achievement tam tak chhiar tur kan hriat tawh sa awm mahse ka lawmna em em pakhat chu vaccination chungchangah hian nau a nu pum chhunga a awm thleng leh kum a lo tlin thlenga vaccination an kalpui danah hian a fakawm thlawt a, India ramah hian kan ti tha ber emaw ni ka ti hial a ni. An achievement dang pawh an Day observation, Cancer Day a ni emaw, Disabled Day a ni emaw heng an huaihawt atang te a mipui nawlpuiin finna, thiamna kan lo neih belh te pawh hi sawi tur tam tak a awm. Labour-ah a ni emaw, information-ah a ni emaw, sawi tur ka la nei a, mahse a tha hliir a nih bakah a chhia pawh a awm ve tho a. Khang zawng zawng sawi chung si khan kan Minister zahawm tak te pahnih Pu R. Romawia Demand leh Pu Lal Thanzara Demand-te hi ka thlawp in pass ngei turin ka rawn pharh ve a ni e, ka lawm e.

DEPUTY SPEAKER : Le, tunge han sawi leh ang le? Pu N.K. Chakma.

Pu N.K.CHAKMA : Pu Deputy Speaker, ka lawm e. Vawiinah Minister pahnih Demand kan sawiho mek a. A hmasa berin Demand No.6- na Land Revenue & Settlement chungchang kha sawi ta ila. Pu Deputy Speaker, kan hriat theuh angin Indo-Bangladesh border fencing hi tunah kan hung mek a ni a, thui deuh an zo tawh a ni a. Indo-Bangladesh fencing hi Mizoram chhungah 318 km lai a ni a. Fencing vangin kan mipui ten an tuar nasat bakah kan asset, kan eizawna nghet te an tichhe nasa khawp mai a, chumi bakah guideline-a an tih angin hmun thenkhatah an ti miah lo a ni. Hei hi Revenue Department te pawh in ngun takin an ngaihtuah a ngai a, guideline-a an ziah ang ang khan from 0 point to 150 yard within the India boundary ah fencing an hung tur a ni a. Thenkhat chu an lokal thui khawp mai a, kha kha Revenue Department in ngun takin han en se. Tunah phei chuan an zo tep a, a taka an zawh hunah phei chuan kan buai nasa dawn a ni. A chhan ka sawi duh ber chu pawn lamah ram engzat nge kan chan dawn tih kha Revenue Department hian chhinchhiah ila. Chubakah han sawi ta ila ram tha, leilet an tichhe nasa khawp mai a, water lack in an awm nasa khawp mai a. Chu bakah Pu Deputy Speaker, ka'n sawi duh chu Indo-Bangladesh international border fencing an phun mek a ni a, a bik takin ka bial ang zawngin han sawi ta ila, veng hrang hrang an bifurcate a ni. Entirnan fencing an zawh hunah chuan an sawi dan chuan awm an phal miah lo ang a, khami a nih chuan khawiah nge kan awm ang? Chuvangin ngun deuha ngaihtuah a ngai, kan awm na tur Revenue Department in hma la se kan duh a ni. Problem lian tak mai kan face dawn a ni Pu Deputy Speaker, a chhan chu a chhungah khan lut ta ila ram hi an nei dawn miah lo a, khawnge kan awm dawn. Hei hi chu sensitive issue a nih bakah problem lian tak kan nei chho dawn a ni Pu Deputy Speaker. Chubakah tunah survey an zo a, Revenue-in dik takin an tifel a, tun thleng in compensation pawh dawng lo hi an tam khawp mai a, khang te pawh kha Revenue Department atangin min ngaihtuah sak sela ka lawm khawp ang.

Chubakah Pu Deputy Speaker, ka'n sawi duh chu cadastral survey an tih zawhna a rei tawh si a, tun thlengin an la tichhuak lo hi engnge a awmzia? Kha kha Minister-in min chhinchhiah sak se ka lawm khawp ang. Pu Deputy Speaker, Revenue Department hi a pawimawh khawp mai a, entirnan house tax te a la thin a, a awlsam thei ang ber a tih theih dan a awm lo maw tih kha sawi lan ka'n duh a ni.

Tawite in Health & Family Welfare Department Demand No. 24- hi sawi ta ila. Health Department hi mitin in kan mamawh a, an responsibility pawh a sang khawp mai a. Kan hriat theuh ang in Mizoram pumpuiah hospital 12 lai an nei a. Tlabung Sub-Divisional Hospital pawh hi Health & Family Welfare Department in an enkawl a, a building hi a hlui tawh em em a, U.T. hunlaia sak a ni a, sak that a hun tawh a ni tih kha ka sawi duh a ni.

Pu Deputy Speaker, Tlabung Sub-Divisional Hospital hi a area hi a zau a, doctor-te pawh an indaihlo em em a, SMO pakhat a awm a, Ayush doctor pakhat leh Medical Officer pakhat, an indaihlo hrim hrim a ni. Zawhna chhanna ah te pawh hon'ble Minister zahawm tak khan specialist 6 (paruk) hi lakbelh leh tur a ni tiin a sawi a, pakhat tal hi Tlabung-ah hian dah thei se ka lawm khawp ang. A chhan chu a area hi a zau lutuk a, chubakah Health Sub-Centre tinah hian mipa pakhat emaw, hmeichhia pakhat emaw chauhte an awm a, an indaihlo a ni; hmuntinah pakhat theuh chauh an awm a. Theih se chu mipa leh hmeichhia hmun khatah awm thei se chu kan duh khawp mai a, connectivity problem kan nei bawk a, kan area a zau si a.

Tin, Tlabung-ah hian staff nurse 4 (pali) chiah an awm a, 4 (pali) in hospital pakhat enkawl chu a hautak lutuk. Chuvangin, min dahbelh thei se. X-Ray technician hi kan la nei lova, Ophthalmic Assistant hi tunhma khan mit enna te pawh a awm thin a, an transfer hnu ah tun thlengin an la rawn dah lova. Tin,

Pu Deputy Speaker, Tlabung hi malaria awmna a ni a, ngun taka an enkawl loh chuan, chiang deuhvin data la ila chuan malaria vanga thi te pawh an awm nual a ni. Chuvangin, Sub-Divisional Hospital, Tlabungah hian a awm a ngai a ni, a bikin diagnostic equipment leh infrastructure te bakah manpower te pawh min ngaihtuah sak thei se a lawmawm khawp ang.

Pu Deputy Speaker, thil pakhat pawimawh tak chu Tlabung hospital bikah hian sawi ta ila, blood bank hi nei thei ila chuan mipui tan hian a tangkai khawp ang. A chhan chu Tlabung atanga Lunglei-a kal dawnin kawng a chhia a, darkar 6 lai kal a ngai a, hei hi problem lian tak a ni a. Tlabung atangin Lunglei-ah refer zel an ni a, kalkawngah vanduin a thleng fo thin a ni. Chuvangin, Pu Deputy Speaker, heng kan harsatnate hi min sutkian sak a, hmanrua te, doctor te, manpower te pawh min dah sak theih chuan a lawmawm khawp ang.

Lawmthute pawh sawi tur ka nei a, Ayush outdoor building hi Tlabung-ah sak mek a ni a, Minister chungah lawmthu ka sawi a ni. Pu Deputy Speaker, chu zawng chu ka sawi theih ni se, ka lawm e.

Pu HMINGDAILOVA KHIANGTE : Pu Deputy Speaker, correction siam lawk ka duh a, min phal sak thei em?

DEPUTY SPEAKER : Enge ni han sawi la.

Pu HMINGDAILOVA KHIANGTE : Pu Deputy Speaker, Land Revenue & Settlement Demand ka sawi rual khan Demand No. 1 ka tihpalh a, No. 6 zawk a ni a, kan Minister zahawm tak khan min lo chhinchhiah sak sela ka lawm khawp ang, ka lawm e.

DEPUTY SPEAKER : Tunge han sawi ve leh ang le. Er. Lalrinawma

Er. LALRINAWMA : Pu Deputy Speaker, ka lawm e. Vawiinah demand kan han sawi leh dawn a ni a, thil nihphung pangngai anga a kal hi a lawmawm hle in ka hria a. Vawiinah hian Demand No. 24, 26, 48 te leh 16, 12, 21 leh 23 te a ni dawn a. A vai chuan kan sawi sengin ka ring lova, kan sawi lohte pawh kha hun tlem vangah min ngaihsak ta ula tha in ka ring a, kan ngaih pawimawh loh vang a nilo a ni tih kha ka'n sawi duh a.

Kan Minister zahawm tak Pu Lal Thanzara chanah hian, ani hi a vannei khawpin ka hria a, nikum aiin tun kumah hian ₹ 8 crore velin a demand hi a pun belh a, 2% vela pung ang a ni a. Back gear an sawi deuh sup sup lain a ni hian forward gear lama a sawi thei hi a lawmawm hle in ka hria a ni.

Tin, a demand-ah hian Health & Family Welfare-a sawi ka duh chu sawi tur tam tak zingah RSBY chungchang hi sawi ka duh a. RSBY hi a pawimawh em em a, tunah chuan Health Care Scheme lian ber zing ami a ni emaw tih mai turin thingtlang miten kan tangkaipui a. Chutih rual chuan hmasawmna tur tam tak kan neiin ka hria a. Entirnan kan tender document-ah hian call centre din tur a ni, darkar 24 ni 7 chung tih te a lo ni a. Hei hi a pawimawh khawpin ka hria a, a chhan chu kan han thleng a, card vel lo buaipuitute, duty-te an lo indaih lova, zanlaih te pheih chuan koh chawp te an ngai a. Hengte hi company lam hi anmahni mi leh sa te dah tam thei tura nawr ni se, a kal apiangten an tih zung zung theih nan a tha khawpin ka ring a.

Tin, toll-free hi a pawimawh bawkin ka hria a. Tender chhuah a nih lai khan heng tender document pawmte kha tender chhang theitu tura tih an nih avangin heng tender document ami hi kan sawilo theilo a ni tih hi ka'n sawi duh a. Heng tender document-ah pawh hian toll-free number siam sak turin an ti a.

Amaherawhchu, toll-free number chu min pe thei ta chuang lova, phone number helai lehkha semah hian minrawn pe deuh thliah thliah a, hei hi phone bill chawite a ngai a. Tin, keini State-ah chuan Mizo tawng leh sap tawnga tih turte a lo ni a. Chutih rual chuan heng zawhfiah thu hlaah te pawh keini ngeite pawh a hminga bial nei kan lo nihnaah vawi tam tak kan zawt fiah tawh a, buaina ho te te, va sawia fel mai thei ang hi a tam em em a ni. Chuvangin hei hi hlu lehzuala mipuiten sam taka kan hriatthiam loh kan zawh zung zung theihna tur atan hma lak ni se a lawmawm khawp ang tih ka ring a.

Tin, lehkha minrawn pe a, a enkawl theihah hian ka sawi bang theilo a ni helai hi chu Pu Deputy Speaker, zu chungchang hi - Vawinah zu license nei hi 60,000 (sing ruk) chuang lai Mizoram-ah kan awm tawh a, chutihlai chuan an 'enkawl theih loh No. 8-naah hian mahni in tih nat, zu leh drugs nghei duh avanga enkawl na (detox) te a nih lai khan zu in thin hrim hrim kan han bansan tawp mai te. Tin, sorkar document-ah pawh awmlo, 'zu i in ngai em?' an ti a, in ve zeuh zeuh chuan dawtsawi kha kan lo hreh a, 'in ngai e, in ve zeuh zeuh e,' kan han ti a, min cut hmak hmak mai hi chu tender a ni a, bidding a nihna angin hei hi chu tender kan chhuah leh hunah vawiina tem ve zeuh zeuh te, zu in lo theilote dinhmun pawh kan ngaihtuah a ngai a ni. Damdawi In ah kal ila, zu in avanga case tam tak kan hmu a, khang khan RSBY hi an hmang thei si lova, retheih a ti zual a ni tih lai kha vawinah hian ka'n sawiduh a.

Tin, private hospital chungchang hi sawi ta ila. Nichin khan kan Minister zahawm tak kha ka zawt a, ka zawhna kha a hrefuh chiahlo a ni maithei a. Private hospital-te rate hi kan bithliah sak em tih kha a ni a. Private hospital chungchangah hian rate hi M.R. te pawh a tam lutuk, chuti khati kan ti a, an lo tih ang hi kan pawm mai nge ni? RSBY hi chu kan hriat dan chuan package anrawn nei vek a a insurer company ten, khami piahlam kha chu harsa an ti niin a lang a. Chuvangin, khatiang deuh khan private hospital-te pawh hi

rate mumal zawk neia kan enkawl a, awmze neia kan kalpui hi chu a va tha em tih hi ka'n sawi duh a ni. Formation Management Hopital tihah hian dan chi tam tak a awm a, a commission chungchangah pawh dan 14 (sawmpali) lai India ramah chuan a lo awm a.

Tin, a qualification chungchangah pawh dan 9(pakua) lai a awm a, damdawi in enkawl chungchangah pawh dan 8 (pariat), khatiang khan hospital commission chungchangah hian dan tam tak a awm a. Hengte pawh hi awmze nei zawka kan kalpui a, kan private hospital-te pawh hi tun aia awmze nei leh chianguang lehzual zawka kan kalpui a va tha em tih hi ka'n sawi duh a ni.

Hmanni lawkah Dr. Ambedkar Foundation-ah thil kan zuk buaipui a, document pakhat min demand chu heng damdawi in, private pawh ni se sorkar nena a in laichinna order emaw, notification emaw an phut ta a. Kan han zawng a, Civil Hospital-ah ngei pawh khatiang document kha a lo awm lova. Health Secretary ten lehkha te min lo siam sak a, private hospital-ah phei chuan khatiang order emaw kha a lo awm mumal lo mai a. Khang te kha kan document phuahkhawm na zelah pawh buai phah theih a nih avangin, khing dan dinglai, damdawi in kan enkawl na tur dan kan neih ang ang te pawh hi a pawimawh em avangin lekkawh lehzual ni se a tha awm mang e tih kha kan sawi duh a ni.

Tin, helai ah hian RSBY company insurer te'n a empanneled hospital te damdawi eng zat nge an bat sak tihah khan ₹ 2 crore dawnlai mai kha an lo bat sak a. Hengte pawh hi empanelled hospital ten kan damlo te an enkawl leh ti zel tur tan thil buaithlak tak a nih avangin tun aia chak zawk in hma min lo lak sak se tih kha ka'n sawi duh a. Tin, nurse te an hah em em a, nurse te pawh hi tun aia chak leh zual zawka lak theih ni se. Hmanni-ah Civil Hospital-ah kan va kal a, ortho-ah phei chuan zanah (ortho ah hian khum 30 vel a awm a) nurse pakhat chauh in a lo enkawl a, nurse a hah mai a ni lo, damlo te an khawngaih thlak a ni. Khatiang kha tam tak a awm a ni. Kan sawi seng

lova, hei a list kan la chhuak vek a. Engpawhnise nurse hi awmze nei a tun aia chak lehzuaw zawk a, anmahni an thawhrim chu thuhran ni se, mipui tan hian an pawimawh a ni tih kha kan sawi duh a ni. Kha kha Health-a ka sawi theih ni ta mai se.

A dawt leh atan chuan Land Revenue chungchangah hian Pu Dy. Speaker, ka'n sawi duh chu, kan han vak vel a. Ram hi kan sem nasa ti mai ila, ram hi mi pakhat in nei teuh teuh te an lo awm tawh a, Land Ceiling Act te hi kan neih ava tul ta em. Land Ceiling Act kan tih chu state jurisdiction hnuai a ni a. Kan State mawhphurhna liau liau a ni tih ka'n sawi duh a ni. Vawiinah hian thil tam tak kan sawi theilo mai thei a. Hei, 3 March, 1967-a Waralbari buaina tenau te rawn intan khan vawiinah chuan India ram pum a tuam tawh a ni. Chung zawng zawng in a nghawng lai chu ram insem dan fel loh vang niin a lang tlat a ni. Chutiang chu a nih avangin keini chuan vawiinah hian miin thingtlang ah ram tlem te kan hralh a, mi pakhat ah ram a lut teuh teuh mai a ni tunah hian. Chhiar ta chiah ila chuan mi pakhat ram ngah hi a tam ngawtin ka ring. Chuvangin, mi tlemte hnena ram lut zawng zelin ke kan pen zel niin a lang a ni. Hei hi thil pawl thlen hmian Pu Dy.Speaker, chhan chhuah kan va ngai em tih lai hi kan sawi duh a. Ram hi sem vek ang u, ka ti lova, amaherawhchu, mi pakhat in sum leh pai a neih vang ringawta ram tam tak a nei hi chu a fair bik lo a ni tih hi ka'n sawi duh a ni. Chuvangin, mobile pawh ka nei duh mai thei, bag pawh ka duh mai thei, company in a siam thei zel. Mahse, ram siam thei company pakhatmah khawvel-ah an la pian loh avangin, ram hi mihring ten kan mamawh zinga limited ber a nih si avangin a hlu em em a, a hlu na kan man phalo zawk a ni. Chuvang chuan, ram neih chungchang ah hian tun aia dan tha hi kan va mamawh em tih hi ka'n sawi duh a.

West Bengal-ah khuan sawi ta ila, Naxalite movement a nasa em em a. Ma'rawhchu, 1977-a CPIM an lo lal khan, 'Operation Barga' an ti a, chumi dan hmang chuan ram te an han sem chho ta a. A hmaa an ram mipui 4% in ram 60% an chan thin kha, 40% -in ram 80% an lo chang thei ta a thingtlang lamah. Chu chuan nasa takin Naxalite movement a ti hniam thla ta a ni. Helaiyah hian a document a awm a, sawi sual

palh te a awm thei a. Vawiinah pawh keini chuan ram hi mi tlem te te kuta lut zawnga ke kan pen lai hian, hemi chhanchhuah na kawng hi chu Pu Dy.Speaker, kan ngaihtuah hi ava ngai em! Tunah chuan kan la tlai lutuk lo mai thei, kum 20/30 tel a liam leh meuh ah chuan tih hleihtheih loh khawp in hun a kal dawn a ni. Ka duh dan takah pheih chuan, ka ngaihdan ah chuan, Aizawl-ah kan awm a, mahse thingtlangmi te tan chuan tuna an building sem tur a pawh kha a tih hleihtheih loh tih a ni a. Khatiang chiahin keini khawpuia awm te pawh hian, kan pem duh a nih loh chuan agriculture land hi neih theih lohna dan te pawh i siam hial ang u tih hi ka duh a ni. Thingtlang-ah ram zau tak tak kan nei a, kan enkawl bawk si lova, hmasawna dal tu a ni. Vawiina rural development tam tak kan khawih tur pawh hi mimal ram a tam tawh lutuk avangin hna kan thawk hleithei tawh lo a ni tih hi ka'n sawi duh a. Chu chu Land Revenue-a ka sawi theih ni ta mai sela.

Tin, Art & Culture lam hi han sawi leh daih ka duh a, Demand No.23-na hi. Hei hi department pawimawh tak a ni a. Ka ngaihdan tak pheih chuan department pawimawh i tih ber sawi rawh ti ta se 2-naa sawi chu ka ui viau ang ti tluk a keimahah chuan ka ngaih pawimawh a ni. A chhan chu hnam nun nen, kan nihna nen hian a inphaman tlat avangin kan dah te thei lo a ni. Chutih rual erawh chuan pawimawh hle mah se tih pur pur chu a harsa mai thei. Kan sawi duh lai subject pakhat bik chu, Art & Culture hian engang chiahin nge a ken ka hre lova, kan hriat angin Mizo te hian hla hrang hrang kan neiin Zo hnahthlak chi hrang te pawh hian hla hrang hrang te pawh kan nei a, hmanlaia kan pi leh pu te hla kan nei a, kan hlut em em a ni. Kalkhawm nikhuaah pawh kohhran function te a nih loh pheih chuan keimahni Mizo hnam zai hrang hrang te khan min awi tlei ber zawk a ni tih hi Pu Dy.Speaker, ka sawi duh a. Hei hi vawn that hi ava ngai tehlu em. Tunah chuan mi tlemte in cassette te siam in heng hlate hi kan lo hria a ni mai a. Ma'rawhchu hla tam tak, entirnan Darpawngi thinrim zai tih a ni emaw, Lalawithangpa kaihneim tihte, khatiang chi tam tak sawi sen loh kha a awm a ni. Mahse, chungte chu kan zawn chhuah loh chuan (a thu ringawt chu kan zawng chhuak thei ang) a thluk erawh hi chu a hria te an bo pil ni ah chuan kan zawng chhuak thei tawh lo ang. Chuvangin Mizo te hunpui kan neih reng renga min awi tleitu ber (Kohhran programme

a nih loh chuan) a nih si avangin vawiinah a thluk vawn that hna, a thluk zawn chhuah hi Art & Culture hmalak na atan hian avan tha em ve aw tih hi ka ngaihtuah a ni. Vawiinah mi tlemte in an sa a, a hla thu ril zia te chu han sawi ta ila. Hmanlai ah nupui pasal an han nei a, min i ngaihzaung nu hi ava hmelchhe em, i nupui avan hmelchhe tehreng em te kan lo intih te pawh hi hla in ril tak maiin, “Mi enah belmang i lo ni, kei ka enah thlangsap dar tui a luang e. Duhleng-ah parte maw ka thlang thin che” an tih ngat tawh hi chuan, tuman i nupui hi a hmelchhia a tih chi tawh lo reng reng a ni. Chuvangin, a hmeichhe tan pawh ‘ka bialpa hian min duh lo ang a, ka hmelchhe si,’ tih chi pawh a ni tawh lo. An dam tlang vek tawh mai a ni. Chutiang khawpa hla ril te chu a ni a ni.

Pu Dy.Speaker, tlem kan sawi leh zel teh ang. Chumai a ni lo, kan lo inngaizawng a, in duh ber te leh in hmangaih ber te pawh hi a lo inneih theih chuang hlei nem maw le, kan lo in then a, chungte pawh chu heng hla te hian mawi tak maiin kan lo inthlah liam a. ‘Keizawng ka liam ta’ng ni hnuai-ah, chhawl liliai nui mawi leng hnenah khan e, hnutiang hawi zelin maw a liam ti la” han tih chuan a thlahtu tan a ngaihthat thlak bawk, a thlah atan lah a ngaihthat thlak bawk, dam deuh in a thlah theih mai a lo ni tih te kha ka han sawi duh a.

Tin, Forest Department hi ka ngaihtuah thin a, ‘Green Mizoram’ hi kan han ti a. Thingtlang lama ramngaw chenchilh tu kan mi leh sa ten Green Mizoram tih hi an hrethiam lo. . Ramngaw te a kum telin a chereu tual tual zawk a. Chu ai chuan kan hnam ze mil leh kan hla te hian han campaign ta ila, han bei ta ila khang hla te pawh kha kan lo nei reng alawm Pu Dy. Speaker. ‘Ka thlawhlai pang pui chu fam lul suh, ka bel ang che ni van zawl dul loh chang in, awi maw va tinreng an kaina thum liai lui” han tih te chuan enge ram an hrin loh tehreng ang le tih hi ka ngaihtuah a ni. Chuvangin, kan thiam loh zawng in ramngaw humhalh campaign pawh kan bei a. Keimahni hnam zia rang leh hla ngeiin khang vawn that hna te kha bei ta ila chuan tun ai hi chuan kan ram ngaw te pawh hi a tha deuh lo maw le tih kha Pu Dy.Speaker, kan sawi duh a ni e. Kha kha ka sawi theih ni mai teh se, ka lawm e.

DEPUTY SPEAKER : Mi 2 phar lawk kan awm a. Pi Vanlalawmpuii Chawngthu kan ko hmasa ang.

Pi VANLALAWMPUII CHAWNGTHU : Pu Dy.Speaker, ka lawm e.

Demand No.6-na Land Revenue & Settlement department kha nichinah khan Pu Hmingdailova Khiangte, MLA zahawm takin a rawn sawi tawh a. Surveyor chungchang leh compensation chungchang kha ka vei ve ania, kha kha ka rawn thlawp a.

Tin, Demand No.23-na Art & Culture chungchangah sum dah hi a tlem ka ti a. Art & Culture te kan hnam tan a pawimawh zia te hi kan hre tawk lo nge maw ni, kan hmun hlui humhalh chungchang ah te hian thawh tur tam tak Art & Culture hian kan nei a. Chuvangin sum dah hi a tlem a ni tih ka rawn sawi ve duh a ni.

Demand No. 24-na Health & Family Welfare Department-ah khan a hmasain lawmthu ka sawi duh a. Kan bial chhung doctor la neih ngai miah lohna khuaah doctor te min pe a, Health Sub-Centre te leh clinic te min sak a, sister te min han pe a, lawmthu ka sawi a ni.

Tin, cancer chungchangah hian an thawk tha hle mai a, cancer veite hospital tih changtlung nan hian ka hriat sual loh chuan crore 44 chuang an nei tawhin ka hria a ni. Chutiang chuan quarter sakna tur pawh an dil mek niin ka hre bawk a. Mizoram- ah kan Health Minister kaihhraina hnuaiah hian a bik taka cancer ngaihtuah an ni hi a lang chiang hle in ka hria a. India ramah Mizoram hi cancer vei tamna ber a ni tih kan hriat angin hma pawh an la chak hle a, a lawmawm hle in ka hria a ni. Kan hriat angin doctor leh Health Worker lak belh tur tih an han sawi te kha a lawmawm em em a, a hminga thingtlang bialtu nih chuan doctor-te, Health Worker-te indaih lo thu hi kan zavaia kan sawi a ni a.

Chuvangin lak belh an ni tur hi lawmthu ka sawi duh a ni. Chumi a nih rual chuan nurse te pawh hi lak theih dan a awm lawm ni tih kan rawn ngen ve leh a ni.

Tin, nikum khan Women Commission angin maternity ward te kha kan va tlawh a, a fai em em a, nau neihna ward tawp ber tur ang ni si kha damdawi in a ni tih hriat loh khawp khan a fai a ni. Tin, an toilet te kha a fai em em a, tun hma kan ngaihdan chuan hospital toilet te hi kal loh theih hram dan kan ngaihtuah thin kha a ni a. Tunah chuan chutiang chu a ni lova, fel fai taka enkawl a ni tih han hmuh kha a lawmawm hle in ka hria a ni. Chuvangin a thawktu leh thuneitu te pawh an fakawm hle in ka hria.

Tin, RSBY kha MLA zahawm tak Er.Lalrinawma khan a rawn sawi a, hei hi a pawimawh em em a ni. Hemi hmanga damlo kan inchhawmdawl dan te a ropui em em a. Fiamthu in damlo tur hi chuan hausak a ngai kan ti thin a, tunah chuan a tu a te pawhin heng hman hian inenkawl na tha tak mai kan nei a, a lawmawm hlein ka hria a ni.

Tin, Referral Hospital te din in Medical College te din a ni chho dawn a, kan sawi fo thin a, politics-a inbeih nan pawh kan hman fo thin a ni. Kum sawm chhungin Referral chu ar vulh nan te hman a ni tih kan sawi fo thin a. Tunah Minister chak tak kan nei a, bul tan an ni chho leh a, Medical College hial din chho leh turin hma an la te hi a lawmawm ka ti hle a ni.

Tin, HIV chungchang han sawi ila, kan hre theuh va, MLA zawng zawng ten MLA fund atangin cheng nuai khat theuh kan pe a, hetiana HIV veite ngaipawimawhtu a changtu leh a thawhpui zawng zawngte hnenah lawmthu sawi ve a tulin ka hria a, ani zarah MLA te pawhin kan ngaipawimawh a ni a. Chutiang chuan bial tinah pawh hma an la chho mek zel a. HIV veite tana

hmasawna tur leh an inenkawlina ngaihtuah mek a ni te hi a lawmawm tak zet a ni. Tichuan, kan Minister pahnih te Demand hi karawn thlawp a ni, ka lawm e.

Pu S.LALDINGLIANA : Pu Deputy Speaker, ka lawm e. Sawi tur a tam viau va mahse kan sawi zo hman dawn lova. Demand No.21 Higher & Technical Education atang hian ka'n tan ang a, Department-ah work programme te kan han ti hi a lawmawm hle in ka hria a, Hrangbana College-te, Zirtir College-te model college atana siam theihna tura sum dah a ni te hi a lawmawm ka ti a. Tin, engineering college Mizorama kan neih theihna tur atana sum dah a ni te hi a lawmawm tak zet in ka hria a ni. Tin, hemi Department chungchanga sawi tel ka'n duh chu college Principal chungchang a ni a, tunah hian hmanni Dr.Ngurdlingiana zawhna chhanna atang te in college Principal te hi doctorate degree nei chauh dah tumna a kal chho mek in a lang a. Hemi chungchang hi uluk lehzul zawka kan ngaihtuah a tha em aw ka ti a. A chhan chu tunhma zawng zawng khan seniority in Principal post hi hnawh khah a ni thin a. Tunah hian ka hriat sual loh chuan college hrang hrang zirtirtute zingah hian mi 130 vel in doctorate degree an nei mek a ni. Tunah hian UGC norms ang hian all India open advertisement siama Principal post hi doctorate degree nei chauh tur a lo nih dawn tak ah chuan, kan zirtirtu senior tak tak te, rei tak college-a lo awm tawh, Principal lo beisei ve te hi mimal takin kan hliam ang tih ka hlau va. Chutiang a nih chuan zirilaite ah nghawng tha lo zawk te a awm palh ka hlau va. Chuvangin heti rup rup a kal lo hian 50:50 te pawh hian kal ta ila; entirnan - doctorate degree nei atangin 50% hi Principal ah lut ta se, seniority atangin 50% chang ta se tih ang chi te hian a fuh zawk ang em tih kha rilru-ah a lo awm deuh hlek a ni.

Tin, UGC norms hi uluk deuha kan han chhiar hian, UGC in a tum ber, heti khawpa incentive college zirtirtu a pekna chhan chu thil dang nilovin,

zirlai ten a zar zo se, zirlai ten thiamna tak tak an puak chhuah theihna turin zirtirtu te hi thiamna sang zawk, degree sang zawk te nei se tiin double increment hial UGC hian a pe a ni. A nihna tak ah chuan doctorate degree an neih hian Principal atan hian an tha bik e tih lam ai mahin naupang ten a benefit an seng tur zawk kha hria in UGC pawh hian hetiang incentive pawh hi a pe niin a lang a ni. Pu Deputy Speaker, tun dinhmunah hi chuan change pup pup lovin sawi tak ang hian 50:50 te hian kal rih ila a duhawm awm mang e ka'n ti a ni.

Tin, Demand No.23- ah hian ka hmaa member zahawm takin a rawn sawi kha ka thlawp a. He Department hi kan hnam ziarang lan na tha tak a nih laiin he Department-a sum hman tur dah erawh hi chu a tlem hle hian ka hria a ni. Tunlaih te pheih chuan kan thalaite zingah hnam ziarang ngaihhlutna a sang zual a, term hmasa atang tawh khan Art & Culture Minister Pu P.C. Zoram Sangliana hovin world record hial siamin cheraw kan ti chho va, khang atang te khan kan thalaite zingah hian kan hnam ziarang pholan chakna hi a lian chho ta hle a, state capital-ah Chapchar Kut urhsun takin kan hmang a a lawmawm em em a. Hetih lai hian heti lama hma kan sawn leh zual theihna tur atan hian district capital- ah te pawh hian sum leh pai te pawh tun aia tam zawk dah thei ila kan hnam ziarang pholanna leh hmasawn zel nan a tha ngawt ang.

Tin, Health & Family Welfare-ah hian sawi tur a tam hle mai a. A hmasa bera ka sawi chak chu Medical College, Mizoram Institute of Medical And Research chungchang hi a ni. Medical College kan han nei ve tur hi Pu Deputy Speaker, thil lawmawm tak a ni. Amaherawhchu, hemi chungchang thu ah hian sawilan loh theih loh awmin ka hria a. Hmanni khan kan opposition group leader Pu Zawma khan a rawn sawi zawk tawh a, kha kha thudik tak a ni a. Medical College kan neih theih nan hian he sorkar kallai mek leh kan sorkar liam ta MNF party sorkar leh Congress party sorkar hian kan tihtur hi kan ti lo deuh ve ve a ni. Hei hi zepthu pawh a awm in ka hre lo, Pu Zawma

sawi kha ka thlawp tlat a ni. Anni pawh an sorkar lai khan central ah NDA an sorkar a, thiltihtheihna chance tha tak an nei, mahse kha kha anni pawhin an avail bik lo a ni. Keini pawhin a nihna takah chuan central sorkar liam ta UPA sorkar-ah khan central goodwill kan nei tha em em a, mahse chu chu kan capitalize bik chuang lo. Hemi chungchangah hian tunah hian kan duhdan chuan Pu Deputy Speaker, i dinglama thu te leh i veilama thu te hian 100% central funded Medical College hi neih kan duh vek a ni. Amaherawhchu kan lo tlai ta deuh hlek a, tun dinhmunah hi chuan a lo theih tawh tak si loh ah chuan, kan mamawhna a san bawh si avangin Medical College neih tumin tunah hian kan Minister chak takin hma a la chho a, kan House Leader pawhin theihtawp a chhuah bawh a. Chutiang chuan tun dinhmun hi kan thleng a, a lawmawm em em mai a.

Kan hriat theuh angin 100% central funded Medical College AIIMS, NEIHGRIMS kan tih ang chi te a ni dawn lova, state-in a siam tanna, a bultanna chu central-in min tum mahse a recurring expenditure engemaw zat hi kan tum a ngai dawn a ni, hei hi chu a Chiang sa a. Chuvangin nakinah, hun a lokal ang a, kum nga kum sawm te a lo ral chuan engemaw inpuhmawhna, inchirhthehna hi a awm ang tih hi ka hlau tlat a. ‘Khatih hunlai ah pawh khan House-ah pawh kan sawi kan sawi alawm, 100% Central funded Medical College kan duh, hetiang hi kan duh a ni, hetiang hi kan duhlo kan ti a kan au a. Mahsela khatih lai sorkar te khan an tithei lova, hemi hi min tihpui a, min sirtlukpui alawm,’ tih te kha a awm leh ang tih ka hlau tlat a. Chuvangin Pu Deputy Speaker, i dinglama thu te leh i veilama thu te hian, 100% central funded AIIMS ang type te kan duh a ni. Mahse tun dinhmunah a theih tak si loh avangin leh a tulna a san tawh si avangin tunah hian he sorkar chak tak hian state bultum in kan han tan dawn a ni a.

Amaherawhchu, kan hriat tak ang khan college hrang hrang, Chandigarh-te, JIPMER-te, state-in a bul a han tum college pathum lai a awm in ka hria a, RIIMS te pawh a ni tho a ni. Hengte pawh hi NEC ataningin 1972 base- a dinchhoh a ni a, mahse 1975-ah chuan central sorkarin a la leh mai a ni. Chuvangin sorkarin hetiang

hma an lakna hi a tirah duhtusam chiah chu nilo mahse, engemaw sum leh pai pawh senso tur lo tam deuh pawh ni se, beiseina sang tak nen theihtawp kan chhuah chuan hetiang tho hian nakinah central sorkar hian min la laksak leh thei tho ang tih kha beiseina nen thlir tlang ila a tha in ka hria a ni.

Tin, Cancer Hospital chungchang thu a lo lang a, hemi chungchang hi Pu Deputy Speaker, sawi tur tam tak a awm a. Hundred bedded Cancer Hospital, Zemabawk-a kan han nei tur te, hemi atana sum leh pai ruahman a han awm ringawt mai te hi a lawmawm in ka hria a. Cancer chungchang thu ah hian kan sawi fo thin ang hian a chhan leh avang chiah hriat theih si loh hian Mizote cancer vei kan tam em em mai a. Pu Deputy Speaker, i hriat angin keimah ngei pawh ka ni a, khatiang kha a ni. Helaiyah hian Mumbai TATA-ah khuan Mizote Zoram hmun hrang hrang atangin dam duhin kan chhukthla a, a tam ber hi harsa tak tak, rethei tak tak, sum leh pai pukchawpa kal an ni hlawm a. Keimah ngei pawh Pu Deputy Speaker, a taka hmutu ka ni.

Hemi chungchangah hian sawi duh ka neih chu tunah hian Mizoram sorkar hian crore khat aia sang hret TATA Hospital-ah khuan liability kan nei a ni. Ka kal hnunnumber khan an Account Director te nen coffee kan in ho a, tah chuan min hrih a. Tuna kan liability hi kan clear theih chuan credit facility min pe ve thei dawn a, khatiang a nih kha chuan a lawmawm dawn hle in ka hria a.

Damlo kalthla te hi tam tak chu pukchawpa kal an ni a. Tin, sorkar hnathawk entirnan Police lam te, zirtirtute pawh hi GPF te pawh tam tak chuan an khawl ve a ni. Mahse non-refundable withdrawal hi tih an tum thin a, an tithei mang tlat lo, a harsa em em mai a ni. Chutiang a nih avang chuan kan sorkar chak tak hian heng kan liability te hi kan clear theih hlauh chuan damlo mangang harsa zawk ten credit facility an lo nei ve thei ang a. Hengte hi an pawimawhin ka hria, a ka han tarlang duh a ni.

Tin, Pu Deputy Speaker, kan House Leader zahawm tak hian District Hospital hi a vei em em mai a. Kan term hmasa atang khan a sawi tawh thin a, 'District Hospital te hi thum tha ila, thihna tlak Hospital-ah kan siam a ngai a ni,' a ti thin a. Vawiinah hian Zoram pumpui te pawh sawi a chakawm viau laiin hun a tlem si a Pu Deputy Speaker, Lunglei bik chauh kan sawilang ang a.

Lunglei Civil Hospital pawh hi kan House Leader zahawm tak hian chipchiar takin darkar thum dawn a tlawh a, kan term hmasa khan a fang vek tawh a ni. Tihchangtlun a duh em em a, amaherawhchu sum leh pai harsatna avang te leh chhan dang dang avang te pawh aniang, vawiin thleng hian Lunglei Civil Hospital hi a la tlabal em em a. Theih chu ni se department tinah hian specialist pahnih den den tal dah ni sela, chu chu MO pahnih ten han vil veleh sela. Khawl tha te dah ta ila; tin, kan casualty te pawh saw department puitlinga hlangkaiin 24 hours han function ve thei tawh sela, Pu Deputy Speaker, a lawmawm ngawtin ka ring a. Chutianga tih theih a lo nih ngai chuan Tlabung te, Chawngte te, Lawngtlai te, Saiha te leh a piahlam zawng zawng tan Referral Hospital a lo ni thei tawh ang a. Tichuan Aizawl-a kan overcrowded lutuk, khat lutuk pawh hi a lo ziaawm tawhin ka ring a. Chutiang chuan kan House Leader zahawm tak kan CM duhdan ang hi tihpuitlin theih ni se a va duhawm dawn em! hmasawna ropui tak a va ni dawn em tih kha vawiinah hian ka tarlang duh hrim hrim a. Chutiang chu kan duhthusam a nih laiin Pu Deputy Speaker, Lunglei Civil Hospital dinhmun hi tunah hian a la chhe em em a ni.

Kan Minister zahawm takin nichina zawhna a chhan ang khan hnimhlum doctor (Anaesthetists) pathum lakbelh tur tih a rawn sawilan kha ka rilruah a rawn lang zawk mai a, min rawn deng zawk mai a. A chhan chu term hmasa atang khan hnimhlum doctor hi dah belh kan tum ngat ngat a, kan dah belh thei tlat lo. Vawiin thleng hian doctor pakhat chauh Lunglei Civil Hospital sawn a la nei a, a hming te pawh Pu Deputy Speaker, sawi ta ila a sual lovin ka ring a Dr. BM-a kan ti mai a, Biakmawia. Ani saw a damloh palh hlauh emaw, a zinchhuah leh engemaw pawipang a neih hlauha Hospital a

kal loh vaih chuan zai tur awm zawnz zawnz saw Serkawn Christian Hospital ah sawn dah chhoh vek an ngai ringawt mai a ni. Chutiang te chu kan dinhmun a la ni a, chuvangin theih chu ni se department tinah sawi tak ang khan specialists pahnih den den, a puitu turin MO han dah ni thei se chuan chhim lam pumpui tan Referral Hospital ni thei ta se a duhthusam awmin ka hria a, chu chu Pu Dy. Speaker, kan tarlang a ni.

Tin, Pu Deputy Speaker, khawngaihin min ngaidam la, ka vawikhat sawina a ni a, tlemin min pekbleh la ka duh a ni. Health Worker chungchang hi tlem sawi ka duh a. Sorkar term hmasa tawp lam khan thingtlang, zokhua hmun hrang hrang ah Health Sub-Centre te, Clinic Centre te building sak a ni a, amaherawhchu khatih lai khan Health Worker dah hman a ni ta lova. Tunah hian kan Minister chak tak hian min bawhzui sak mek niin ka hria a, a lawmawm ka ti a. A bik takin kan Vety Minister zahawm tak demand kan sawi lai khan thingtlanga VFA te pawimawhzia, ran doctor ang mai a an function theih dan an sawi ang chiah khan Pu Deputy Speaker, health worker te hi an pawimawh a ni. A bik takin ka bial kan ti teh ang, pawilo ta sela, hei khaw sarh zet mai ke a kal ngai bial ka nei a. Chutiang khua-ah te pheih chuan anni ho hi an pawimawh em em a, dah theih thuai thuai ni se tih hi an nghakhlel em em hlawm a ni.

Tin, hemi chungchangah hian Health Care te nen pawh a inkaihnawih tho avang hian sawikai ka duh hram a. A bikin kea kal ngai thingtlangah chuan thlalatute hi an lo kal lo thin a, chumi a nih avang chuan he Health Care Scheme hmang tur hian an hmang ve thei lo thin a, chuvang chuan MLA te hian kan tuar lo thei lo a. Lunglei an kal lam te an haw lam te, an chaw man zawnz zawnzge kha pek a ngai ta thin a. Chutiang a nih avang chuan a theih hram chuan tunah hian Health Care atan thlakak runpui beih chhoh mek a ni tih ka hria a, khawpui-ah te, khawpui pawnah te. Ke-a kal ngai ah pawh hian fair takin Pu Deputy Speaker, kan thlalatute hi kal hram sela, tichuan, thingtlang chhengchhe tak tak ami te pawh hian he Health Care Scheme hi kan lo hmang tangkai ve thei ang tih kha ka ring a, ka beisei a.

Aw le, vawiinah hian kan Minister pahnih te demand hi ka rawn support a ni e. Pu Deputy Speaker, ka lawm e.

Pu R.VANLALVENA : Pu Deputy Speaker, ka lawm e. Kan Minister zahawm tak pahnih te demand hi vawiinah hian rawn thlawp ve ka duh a, a hmasa in hun min pek avangin lawmthu ka sawi duh a ni.

Hun kan nei tam lova, sawi zung zung tum ta ila, a tawi thei ang deuh in, a chhungril tak chu luh ka tum lova, kan sawi nasa tawh a. Revenue changtu Minister zahawm tak chanvo Demand No. 6,12,21 leh 23-na atang khan tawi te te theuh in sawi ka duh a. A hmasa berah chuan Higher Department-ah kan member zahawm tak khan RUSA-ah pawisa a awm thu te kha a rawn sawi a. Keini chu T.Romana College chungchang kan ngaihtuah chuan 'RUSA-ah pawisa a awm,' in tih hi chuan kan phu zawk zel mai a. Kan sorkar hmasa lam tawh ah khan term hmasa 1994 bawr velah khan kan hriat angin Mizoram hmun hrang hrangah college kan din a, rem vak lo chung pawhin mipui mamawhna avangin hmun zim takah kan han din a. Chumi zingah chuan Republic Veng-a T.Romana College khu a tel ve a. Kan hriat ang in a hmun a zim em em mai a, mimal in te sum tam tak sengin sorkar-in tunah hian a hire a. Building an sa ve a, sa zo mahse engmah a ni dawn chuang lo a anmahni ram a zim avangin. A thlangah khuan AH & VETY Department hian ram zau tak an nei a, an hmang tangkai em em lo a. Hei hi ka dil thin a, hei a ngawi tlat mai a, tarmit bun pakhat hi Pu Speaker, min phalsak duh si lo a, tlawn tinreng hian ka tlawnin ka hria a, kan tlawn fuh hun te hi a awm ang em aw, tlawn fuh hun hi awm se ka duh a.

RUSA hian kan hriat ang khan pawisa hman tur hi an ngah a, mahse, a ram leilung kha an neih a ngai si a. Ram leilung an nei thei si lo a, sorkar mawh takte pawh hi a ni in ka hria a, rem leh rem lo in, mipui mamawhna avangin kan lo din tawh a. Tunah tih thanlen zel a ngai a, sikul naupang kan hmu hnem si a, bathlar-ah hian dar insi thup hian an thu a, zitirtu te pawh chuti tho, chutiang chuan kan awm a. Building sakna tur ni

se pawisa an nei reng a, mahse, a ram neitu lam hi an ngawi tlat mai a. Khulai hmun khu T.Romana College tan hian min sahthlak thei se tiin he House zahawm tak kal tlang hian karawn ngen a. Kan Chief Minister pawh vawi tam tak ka sawi pui tawh a, a la ngawi chu a ni deuh a, a ngawih loh hun a la awm em ang chu maw! Pu Deputy Speaker, chu chu ka sawi a nih chu.

Art & Culture ah khan tawite in sawi duh ka nei a. Art & Culture hmalakna hrang hrang a lawmawm zia te, kan ram ro vengtu an nih zia te, kan hnam thuam chi hrang hrang chawi nungtu an nih zia te pawh kan hria a. Ka ngaihpawimawh deuh mai thil pakhat hi a awm a, Art & Culture bik a nih rualin a dangte pawh a ni thei tho ang a. Kan bungrua hi a neitu nihna patent emaw, G.I (Geographical Indication) kan neih a ngai khawp mai a, chuti lo chuan kan bungraw neih chhun hi kan patent emaw, kan G.I emaw loh chuan mi in min neih sak thei a ni. Tunah hian department-in G.I turin kan hnam thuam eng eng emaw ah hma an la niin ka hria a, kha kha enge kan thlen chin tih kan Minister zahawm tak hian min chhan theih ka beisei a.

Chutih rual chuan department dangah pawh hian a pawimawh ka ti a, Mizo chilli kan tih Mizo hmarcha te pawh hi Guwahati based nge ni hian a neitu nihna hi an lo nei daih mai a. Kan khumbeu te, kan thlai thar chi hrang hrangah te pawh hian hma kan lak tulin ka hria a. Chu chu a deparment pawn lam mah ni se a titu turte hi sorkar hian ruat ta ila, agency te hi inruat thei ta ila, kan thil neih chi hrang hrang hi a neitu kan nih theihna tura in register hi a ngaiin ka hri a, Art & Culture Department hmalakna pakhat sawi pah khan kan sawi zau duh a ni, Pu Deputy Speaker.

A dawt leh ah chuan ka ngaihpawimawh ber mai, Health & Family Welfare Department-in hmalakn an neih zawng zawngte kan sawi seng lo a, kan hmasawn zia te kan hria a. Aizawl Civil Hospital va kal ringawt pawh sawn kum tel hian hma kan sawn a ni tih a Chiang a. Tuna Minister zahawm tak hmalakna langsar tak mai pakhat zingah pawh Medical College kan nei tur te, Cancer Hospital tihchangtlun dan tur

te leh building thar kan neih dan tur thlengin kan hmu a, pawisa pawh beiseiawm tak tak a awm a ni tih kan hria a. hengte hi lawmawm ka ti a. Chutih rual chuan nikum lamah khan Generic Drug Store kan hawng a, miharsa zawk ten man tlawm zawk si a damdawi tha zawk an lei theihna turin rem lo tak chungin hma an la a, a lawmawm em em a. Union Budget kan thlir chuan Generic Drug Store hi India ramah 100 bawr vel hawn thar tum a niin ka hria a. Kan Generic Drug Store saw a tihlen ve theih ang em aw tih kha ka rilru ah a awm tel deuh a. Chu chu ka'n sawi kai duh a.

A dawt leh ah chuan, Clinical Establishment Act hemi House zahawm takah nikuma an rawn pharh tak kha sawi zau tulin ka hria a. Hemi chungchang hi Mizoram Gazette-ah, ni 6/6/2014 khan chhuah a ni tawh a. Tin, 24/4/2007 khan chhuah a ni tawh bawk a ni. Kan bawhzui chaklo deuh emaw ni chu aw ka ti deuh a.

Tin, Central Act hi 2010 ah khan a awm bawk a. Damdawi lama kan thawktute hian kan aware lo deuh em aw ka ti a. Hmanni ah kan MP zahawm tak Pu C.L. Ruala'n Ambedkar Foundation Medical Aids BPL tan tanpui an nih theihna tur dilna form min sem den den hlawm a, MLA leh mi dang dang YMA hruaitute pawh an sem bawk a. Chu chu kan han bawhzui a, dilsak turin Delhi-ah kan member zahawm tak Pu Rinawma nen hian an office ah te pawh kan zu kal a. BPL chhungkua, cancer leh dialysis ti laite leh natna khirh zual bik tan dil sak kan tum a. Tah chuan, sorkarin damdawi in a recognize-na certificate thil tel a lo ngai a, recognize certificate hi kan lo nei hauh lo mai a. Private Hospital leh Cancer Hospital-ah te, Civil Hospital-ah ngei pawh hian, phuahchawp deuh takin ti mai ang kan officer kan Secretary te thahnemangaihna in min han siam sak nawk nawk a. Kan thil tel a, kan theh lut a. Heta tanga daka kan thehluh phei chu a pil ta daih mai a, kan certificate kha an pawm lo em mawni chu aw ka ti rum rum a. Chu chu kan awm dan a ni a. Tin, kha Rules Clinical Establishment Act-ah khan certificate pek tur tih fiah takin a chuang a. Nichinah kan Health Minister zahawm takin hei hi tih tum mek a ni tiin min chhang tho nachungin duhthawh thil thu ah leh hma lak chak zawk ni thei se ka duh tak zet a. Tunah hian BPL natna khirh tak taka damlo tam tak an awm a. Khang

mite kha tanpui dawn ta ila kha certificate kha thil tel a ngaih tlat avangin kha certificate tel lo kha chuan tanpuina kha min rawn pechhuak thei lo a ni. Chuvangin kan medical officer te khan khawngaih takin min bawhzui sak rang ula thain ka hria a, ka'n ngen duh che u a.

Tin, medical reimbursement hi a tam khawp mai a. Opposition group leader zahawm tak khan hmanni khan a rawn sawi tawh a, midang hmingte pawh hian kan damlo a ni awm e an ti tawh a. Khatiang kha thil awm ve thei tak a ni. Kum 2005 atang khan private hospital hi kan din tan niin a lang a. Chungah chuan MR bill thei hospital kan ngah khawp mai a. Mizoram chungah 27 leh state pawnsah 44, a vaiin 71 kan nei a. Bill theihna lamah hian kan pawk mah mah em ni chu aw ka ti a, kan MR bill tam ta lutuk thin hi. Rules-ah khan a bill thei chin a awm tho a, khatiang khan tlemin inhrek deuh hret ta ila. Tin, khata bill thei lo te khan Health Care-ah te, RSBY-ah te an bill ve theihna tur kawng zau takin a inhawng tho a. Chutiang chuan sum hi tam tak kan save theih ka inbeisei a ni.

Tin, drug testing laboratory hi kan mamawh a ni. Kan ramah hian kan hria a, damdawi tha lo hi a lo lut niin a lang. Hmanni ah te pawh kan inmanchhuak tawh tih kan hria a. Hei hi kan mamawh em emin ka hria. Damdawi dik lo kan inchawh palh emaw, kan ei palh emaw chuan side effect a nei a, chu chuan natna dang a hring leh thin a ni tih Pu Dy. Speaker, doctor hote chu a hretu ber zawk in ni a. Chuvangin RIPANS hospital-ah sawn khawl tha tak tak, drug test-na tur laboratory an neiin ka hria a. Sawngte saw hman tawm theih a ni em? Laboratory kan neih hmaa lo hman tawm theih chu ni ta se a tha awm mang e aw, heti zawngte hian hma a lak theih lawm ni? Kan Minister zahawm tak takte leh kan officer te hian hma min lak sak thei ang em tih Pu Dy. Speaker ka'n zawt tel bawka a ni, Pu Deputy Speaker, ka lawm e.

DEPUTY SPEAKER :- Midang tan sawina hun a awm tawh lova, minute 2 vel chiah dar khat rik nan a la awm a. Kan chawl hma mai ang a. Dar 2 ah kan thukhawm leh dawn nia.

2:00 PM

DEPUTY SPEAKER : Kan sawihona kan chhonzawm leh tawh ang a, chawhma lam khan member pasarihin an sawi a. Tunge sawi ang le? Pu K.Sangthuama.

Pu K.SANGTHUAMA : Demand No. 6-na, Land Revenue and Settlement, ram pass pek hi a in thuah nasa em em mai a, tun chang pawh a ni lo. Tunhma atang khan Land Revenue-ah hian ram inpek thuah hi a tam em em mai a, buaina tam tak kan tawk hlawm a ni. Chuvangin chinfel dan ngaihtuah theih ni se tih hi ka sawi duh a. Chinfel har tak chu a ni mai thei a. Amaherawhchu ngaihtuah deuh hlekah Minister zahawm tak hian lo nei sela. Tichuan, kan inthuah te hi Court-a inkhin pheih chuan sorkarin a chawi nek duh zawk a, hmanah khan a inkhing tawh a. Tunge ram petu hi an ti a, a pe thuahtu chu sorkar a lo ni a, cheng tam tak kha an chawi tir a. Chuvang chuan, hetiang kawngah hian fimkhur leh zualin leh ram inthuah te hi enchiang leh zual turin kan Minister zahawm tak hi ka han ngen duh a ni.

Tin, pakhat leh ah chuan, hmannah pawh ka sawi tawh a, compensation rate hi, tunge a rate siamtu, tih te kan zawt a, a rate siamtu pawh kan hre lo ni awm tak a ni a. Mahse, a tlangpuiin tunhma kha chuan V/C area-ah hi chuan a rate siamtu chu DC an ni mai thei a, vawiin thleng pawhin an ni mai thei a. Chuvangin tuna rail kawng, rel loah pawh square ft. ah 200 ang hi chu a to deuh hlek niin a lang a. Compensation chu a phu niin a lang a. Dan pangngaia an lak dawn chuan an la mai tur a ni a, tuna lo sawisel chi pawh a ni lova, an ram a nih miau chuan. Amaherawhchu, a rate-ah hi chuan fimkhur deuh chu a ngai a. Hei hi sorkarin enzui se a thain ka ring a. Chuti a nih loh chuan ram a thang zel a, mi ram laksak kan duh a. Tichuan kan ti zel ang a, chumi hunah chuan harsatna kan tawk leh dawn niin a lang a. Hei hi mutmawh hnarmawh ah lo nei

sela. Per square feet-ah ₹200/- a nih chuan bigha khatah khan nuai 28,80,000 a ngai daih mai a ni a. Chuvang chuan hei hi chu a tha tehchiam lovin a lang a ni.

Tin, pakhat lehah chuan, Referral Hospital-a ram pek tih hi hmanni pawh kan sawi tawh a. Hei hi Minister hian lo enchiang leh se ka duh a. A chhan chu hetiang thil hi kal zel atan pawh a tha chiah lova. Hmanniah statement in an rawn ti tawh a, amaherawhchu, helaiah hian chumi hnu thleng pawhin sawi a la awm zel a, hun kal zel tur atan pawh Minister leh kan House tan pawha tha zawk a ni a, tha lehzuala lo enchiang turin ka chah leh duh a ni.

Tin, Demand No. 21-na Higher & Technical Education-ah hian han lut leh ta ila. Lunglei lamah hian University Campus hawn tur sawi thin a ni a. Hei hi an hawng tawh nge ni a awm zel dan ka chiang hauh lova, nakinah min hrilhfiah bawk sela. A theih hram chuan he lamah ngawt ni lovin saw lamah pawh campus awm se, a theih hram chuan kan sorkar hian ngaihtuahna a neih theih chuan a lawmawm viauin ka ring a. Tin, pakhat lehah chuan kan college building hi a chep em em mai a, naupang sangkhat te, sangkhat zanga te, sanghnih dawn te kan nei a, a tawt deuh vek mai a. Chuvangin hei hi mutmawh hnarmawha a lo neih ka duh a. Kan college te hi a tawt em em vek mai a, zirna lamah harsatna a awm thei a. Chuvangin Minister zahawm tak hian building chungchang hi lo enpui leh sela a that ka ring a. Tun aia changtlung deuh zawk leh thawl deuha an awm theihna ngaihtuah se a tha ngawtin ka ring.

Tin, pakhat lehah chuan NIT zirlai te hi hostel-ah hmanni khan harsatna a awm a, kan hre theuhin ka ring a. Driver pakhat pawh ban/suspend niin an sawi a, hei hi enge ni a kal zel ta? Tin, PMO atangin House Leader te an in phone niin sawina te a awm a, hetiang hi chu a tha lo tawpin ka hria. Naupang buaina avang mai mai a PMO office te thlenga kan House Leader thlenga an rawn phone hi a tha lo hlein ka hria a, han sawichhuah ve reng reng ka duh a. Hei hi enge a thlen tak zel, nakinah min rawn chhang thei in ka ring a. Dik lohna te chu khawiah pawh a awm thei a. A khawilam nge dik lo

tih keini lam chuan kan hre chiah lova. Chutih a nih lai kara Prime Minister thleng thlenga hetiang zu phone hi thil dik pawh a ni lo. Kan state a ni a, kan House Leader C.M. pawh fel tak kan nei a. Hetianga han intih mai mai hi thain ka hre lova. Chuvangin Minister zahawm tak hian a kalphung min hrilhfiyah se a thain ka ring.

Demand No. 23 Agriculture hi sawi vak tur ka hre chiah lova. Hma hi kan sawn lutuk lovin ka hria a, chuvang chuan hmasawn thei ang bera kal tur hian Minister hian enge a neih ka hre lova, tiang lam hawi chuan kalpui thei se a lawmawm khawpin ka ring a. Art & Culture-ah hian Chapchar Kut tih mai lo hi chu kan thang lo tih mai tur a ni a. Helai hi ngaihtuahna hman deuh ni se a thain ka ring a ni.

Demand No. 24 Health & Family Welfare-ah hi chuan tlem han sawi leh ka duh chu Chawlhmun-ah khuan hman deuh khan Urban and Health Centre lungphum Minister zahawm tak nen kan zuk phum a, min sawm a, ka zu kal ve a. Chu chu peih thawkhat a ni a, changtlung deuh hleka ruahman a ni a. Helaia harsatna pakhat awm chu choka leh electric eng leh tui kawng khu duh angin kan la ti thei lova. Chuvangin electric eng khu pek hma dan ngaihtuah ni se la. Tin, choka sak hma ni bawk sela, tui connection te awm se la, tlak lam khuan an chhawr thei dawn a. Nau neihna kawngah te, thil dang dangah emergency-a luhna mai a awm thei dawn a. Hei hi Minister zahawm takin ngaih mawha a neih avangin tunah hian kan ti puitling dawn a, a lawmawm hle a, lawmthu ka sawi duh bawk a ni.

Tin, pakhat lehah chuan Sairang-ah hian an damdawi in a tha tawh vak lova, tunah khuan sak tum mek a ni a. Hei pawh hi a lawmawm hlein ka hria a. Theihtawp chhuahin a hma lam deuha sa zo turin Minister zahawm tak hi ka ngen duh bawk a ni. Khutah khuan thawktu doctor pakhat chauh a awm a. Aizawl atanga kal/lang ni lehngalin ka hria a. Chuvangin tlemin doctor pawh hian a hna tun ai hian ngaihsak leh zual se tih Minister zahawm tak hnenah hian ka ngen duh a. A duty chhe em em chu ka ti hran chuang lova. Mahse lang a han kal na na hi chuan hun a lo paih thin a. Chuti a

nih pawhin khawngaiha hun kha tiral mai mai lo khan a hun hmang turin helaiah Minister zahawm tak hnenah hian ka ngenin ka sawi duh bawk a ni.

Pu Speaker, doctor indaih loh dan te kan sawi fo tawh a. Chawhma lam khan an lak belh dawn tih te kan hria a, a lawmawm hle mai. Hei hi mutmawh hnar mawha neih a ngai a. Damlohna thilah phai lam te kan pan a, heti laiah pawh damdawi in kan pan a, chutiang khawpa pawimawh a nih avang chuan doctor leh nurse te hi an indaihloh chu kan hre theuh a, sum harsatna te leh harsatna dang tam tak a awm thu te pawh kan hria a. Amaherawhchu heti laiah hian kan Minister hian tan han la sauh sauh sela, doctor te, nurse te han dah belh sela. Thil dang hi chu damlohna thil ni lo, Health lam ni lo ah hi chuan a tih theih mai zel zawkin ka'n hria a. Pu Speaker, damlohna thil a hi kan pawimawh em avang hian doctor te, nurse te hi tun ai hian dah tam thei ila chuan hriselna lamah hian hma kan sawn dawn niin a lang a. Chuvangin inthlahrung lovin kan Finance te pawhin helamah hi chuan Health hi chu lo duhsak deuh hlek ula tih kha waviinah hian kan sawi ve duh bawk a ni.

Tin, thingtlang lam hi ngaihsak lehzuol deuh hlek ila, khawpui ah chuan engemaw ti ti in doctor te an lo indaih deuh hlek a kan la ti thei a. Thingtlang lam hi an khawngaih thlak em em a, kan Health Sub-Centre te leh kan damdawi in hrim hrim hi dictrict khawpui dang te, thingtlanga PHC awmna laiah te pawh hian ngaihtuahna thuk zawk hman theih ni sela a that zawk kan ring a.

Pakhat lehah chuan Drug Control Act ang, tun lai chuan kan hre teuh ang a, drugs lam ah hian hma kan sawn em em ti mai ila, sualna lamah a ni mai ang chu, kan naute tam takin harsatna an tawk a. Heng hi a control lehzuol theih nan sorkarin keimahni chiaha kan siam theilo a nih pawhin central lam thlenga drug control dan leh engemaw hi Sorkarin kan rilru tak tak kan pek loh chuan harsatna lian zawk kan la tawng zel dawn ni hian a lang a. Chuvangin kan Minister zahawm tak pawh hian rilru tak tak leh ngaihtuahna tak tak lo hmang sela. Vaviinah hi chuan han ngaihtuah vang vang hian

drugs hi a hluar nasa em em mai a. A zuartute pawh khawchhak lam atanga lo kal hi a hluar zel zawk ni hian a lang in kei chuan kan hria a. Chuvangin kan han man te pawh hi hmun thum thena hmun khat pawh kan man lo mai awm mang e aw ka ti a. YMA te leh khawtlang mi pawimawhte leh thahnem ngaite avang hian tam tak kan han man thei a, a lawmawm em em a. Chutih rual erawh chuan heng kan man te hi chu a tam thamlo em em mai a. Chuvangin helaiah hian chik lehzuala Health Minister pawh hian ngaihtuahna hmang in, kan sorkar hian a controlna tur emaw, kan man a te hrem dan emaw tun aia danglam deuh hleka kan tih loh chuan harsatna lian zawk hi kan la tawk chho zel ang, tih hi thil awmthei a ni a. Chuvangin helaiah hian theihtawp lo chhuah turin kan ngen leh duh a.

Tin, Demand No. 26, Information-ah hian sum hi tun aiin dah tam thei hret ila chuan, advertisement leh thil dang dangah te pawh, helai ah hian sum kan dah tlem deuh hlekin kan hre bawk a. Tin, Information and Communication and Technology No. 48 leh No. 26-na ah hian tun aia tam zawk deuh hlekin sum hi dah thei ila chuan, a tha mai awm mang e aw ka ti a. Kan budget kan en khan duh aiin a tlem deuh hlekin ka hria a, chuvangin kan sawi chhuak a ni. Pu Speaker, chung chu ka sawi theih tawk ni se, ka lawm e.

DEPUTY SPEAKER : Pu R.L. Pianmawia

Pu R.L. PIANMAWIA : Pu Deputy Speaker ka lawm e. Hei vawiinah kan Minister te pahnih demand sawihona hun tha tak kan nei thei a, a lawmawm hlein ka hria a.

Kan sawi hmasak duh chu Demand No. 6-na Land Revenue & Settlement Department ah hian, anni hi inhmun buai chingfel tu department an nih angin an hna ber pawh niin a lang a. Amaherawhchu duh ai hian an hna hi a sawtlo hle hian a hriat a,

Bawngkawn Brigatte vela rambuai te pawh saw a ngai reng saw ni mai hian a hriat a, chuvangin hei aia chak zawka hma lak dan hi a awm lawm ni tih ka sawilang duh a.

Tin, Demand No. 23 Art & Culture Department hi thingtlang miten kan zempui pakhat a ni ve a. YMA ang pheii chuan kan rinpui ber department te pawh a ni ve a, YMA Library sakna tur min pe thin tute an ni a. Tunah erawh hi chuan tihngaihna hlawl hi an hre ta lo em ni tih tur a ni a. Ip ruak hi an khai an khai ta mai, beisei tur an awm ta lo em em mai a, heti lo deuh hian tih dan kawng dap dan a awm lawm ni le? Tun ang ringawt chuan kut ruaka kan thut tir ringawt mai hi a fel tawk lo in ka hria a, chu chu kan sawi duh a.

Tin, Demand No. 26 Information and Public Relation ah hian duhthusam chu ni lo mahse tun tumah chuan thingtlang mamawh 'darshan' tih ah khan sum leh pai a rawn awm ve tat a, a lawmawm hlein ka hria a. Budget-ah hian dah lohna engchen nge ni tawh aw ka hre chiah lova, tun tumah chuan an awm ve tat a. Ka biala Upa pawl hoten an beiseina a rei tawh viau a, dilna pawh kan theh lut tawh thin a, department ah pawh 2/3 kan theh lut a, pawisa a awm lo tih kha a ni mai a. Tun tumah chuan a awm ta a, tuna awmah hi chuan ka bial ten an chan ve theih ngei na tura kan Minister-in hma min lo laksak turin ka'n ngen duh a.

Tin, Demand No. 24-na Health & Family Welfare Department ah hian kan sawi duh a. Kan sawi duh chu a hmasa-in a fak lohna lam kan sawi phawt ang a. Medical treatment ah khan Health Department ve si pawisa an dah tam khawp mai a, a intu lo deuh mang e aw ka ti a. Doctor rual awmkhawmna ti ila a ni mai ang chu, chutiang ni si damdawia inenkawl na tur atan sum an dah tam vak mai kha budget leh pekah chuan Health Department a nih ang ngei khan tlem thei deuh turin tan la sela, ka ngen duh a. Tin, a sum dah dan kal hmang hrim hrimah duhthawhna lai ka neih thenkhatte ka'n tarlang ang a. Sub-Centre sakna tur hi pahnih sakna tur chiah a rawn

lang mai a, keini bial lamah pawh engemaw zat sak tur a awm a. Chuvang chuan hetilo deuh hian tih dan a awm hram lawm ni tih ka sawi lang tel duh a.

Tin, PHC building sak tul em em mai Darlawn-ah kan nei a. 13th Finance Commission hunah khan concept paper an thehluh khan Aizawl East huam chhungah Darlawn kha sak tura thehthlak a ni a, chumi rual chuan Sub-Centre building 20, quarter 13 sak tura thehthlak a ni bawk a. Khami an thehthlak hoah khan Sub-Centre leh building 20 leh quarter 13 tih te hi chu ka hriat sual loh chuan an sa zo vek tawh a.

PHC building sak tura Darlawn bik an dah ve kha mangngihlin a awm reng mai a, hei hi engtizia nge ni aw? Kan Minister hian khawngaihtakin min lo enzui sak sela; lang ve miahlo kha tih tur in an sawi an sawi tawh mai niin a hriat a, a thik awm riau mai a, chuvang chuan khalai kha kan tarlang duh a. Tin, kan bial chhungah chuan Ratu-ah khawtlang tlawmngai ten thawh khawmin damdawi in te, quarter te, doctor quarter te, tuizem te, electric wiring te engkim tihsa in kan nei a. Saw saw doctor min pek chuan damdawiin a tling a ni tih ka'n sawi lang tel duh a. Kan Health Minister pheh chuan min enpui tawh nghe nghe a. Chuvangin, sawlaia doctor awm chilh tur te min ngaihtuah sak se tih ka'n duh a. Tin, Sakawrdai-ah CHC kan nei ve a. PHC nen hian doctor dah chungchangah chuan danglamna vak a awm lova. Chuvangin, tuna doctor lak thar tur kan tih ah te khan sawlai ami tur tel ve hlah se ka'n ngen duh a. Tin, Sub-Centre, Clinic-Centre hawn phalna nei thlap Lungsum te, Damdai te, N. Khawdungsei te, Upper Sakawrdai te leh Zokhawthiang te kha kan nei a ni a, sorkar in phalna min pe thlap tawh a. Hemi hi hawn theih mai turin Health Worker lak thar hunah chuan min rawn hriat sak hmasa sela tih ka'n sawi lang duh a. Kan mamawhna kawng tam takah min puhruk sak tawh a, mahse tam takah duhthusam kan la nei lo a ni tih ka'n sawi lang duh a.

Tin, Sakawrdai-ah doctor min pe a, a lawmawm rual rualin, a khawngaihthlak em em a. Keinin kan khawngaih leh chhawn zel ngai lo tur doctor min pek theih chuan kan lawm khawp ang tih ka'n sawi tel duh a.

Tin, Cancer Hospital atana kan inruahmanna chungchangah te kan Minister hmalakna chak tak avangin hmel thar hmuh tur a awm chho zel a. Tin, hmanraw hrang hrang lei tharte pawh an nei chho mek zel a, a lawmawm ka ti a. Thingtlang in a kan pan theih chhun Civil Hospital an thuam that hian thingtlang lam min thuam tha a ni tih ka'n sawi lang tel duh bawk a. An hmalaknaah lawmthu ka sawi e. Chu chu ni mai sela, ka lawm e.

DEPUTY SPEAKER : Pu Chalrosanga Ralte.

Pu CHALROSANGA RALTE : Pu Dy. Speaker, ka lawm e. Demand No. 6 atang hian tan ila. Ka hma-a rawn sawite khan Revenue lampang kha fakna tur vak kha an hre lo nge ni a, kei chu a ki danglam pang deuh hlekin rawn sawi ka tum a. Revenue Department-in hma an lak nasat tawh zia chungchang rawn sawi ka duh a. Pu Dy. Speaker, kan Minister zahawm tak kaihhruaina hnuaiyah hian nasa takin hma kan sawn chho hle a ni.

Tunah hian NLRMP an tih hi kum 2011 atang khan hma lak tawh a lo ni a. Vawiin thlengin NIC te nen thawkhovin, software development hrang hrang tunah hian in an han tichho a. Chutah chuan kan hotute hmalakna azarah, tunah pawh hian GPS hmang ten survey an han nei a, veng hrang hrang leh Aizawl khaw chhung bik hi tunah hian hma an han la a. Nakinah district hrang hrang te pawh hma la la chho zel turah an inngai a. Hetianga kan hotuten kan ram dik taka GPS leh khawl chi hrang hrang hmanga record tha tak kan nei hi chuun tuna Revenue thubuai tam tak kan tih te leh Court-a kal ngai kan tih te hi a awm tawh dawn lo a ni. Chuvang chuan an hmalakna te hi a tha ka ti a. Computerization of land records te an han ti a. Nakin lawkah chuan computer

keyboard ah vawikhat kan han hmet ang a, kan LSC te leh a map te nen khan kan hmu thei vek tawh mai dawn a ni. Chuvang chuan inleithuah tih ang kha awm tawh lo tura ngaih a ni dawn a. Hetianga chak taka kan hotute an kal chho zel a nih chuan, nakin lawkah chuan kan Revenue Department te pawh hi sawisel ni lovin, fak hi an la hlawh chho zel dawn niin ka ring tlat mai a. Heti laiah hian an hmalaknate chak taka an kal chhoh zelna turin duhsakna ka'n hlan duh a.

A bik takin thil pakhat an tih tunah hian pilot project ah an nei a, han sawi chhuah ve ka'n duh chu, Survey Management System an han ti a. Hei hi kan hre vek ang a. Ram kan lei duh emaw, thenawm ram-te nena kan intihbuaiin surveyor te min survey sak turin kan han ko a, ama'rawhchu, surveyor te an indaih si lova, engtikahnge an rawn kal ang tih te pawh kan hre thin lova. Ama'rawhchu, pilot project Aizawl Directorate hnuaiah tunah hian hman mek a ni a. Tuna kan ram te, kan LSC te survey tura kan han koh hianin record felfai tak, dilna kan han dahlut ang a, annin an han siam ang a, annin sms in 'i ram tehna tur surveyor i mamawhna hemi ni ah hian kan lo dawng e,' an han ti ang a. Tichuan, chumi hnu-ah, 'hemi ni-ah chumi khami chuan i ram chu a rawn teh dawn a ni,' ti khan sms in min rawn hrilh thlap thlap tawh mai dawn a ni. Chuvang chuan, tuna surveyor indaihlo, tu emaw han duhsak bik tih kha a awm tawh dawn lova. Chutiang hunte pawh chu a nghahhlelh awm khawp mai a. Tunah an han tichho mek a ni awm a, a lawmawm tak zet a ni.

Pu Dy. Speaker, hetiang zawng zawngah hian thil pakhat han sawichhuah ka duh chu ram changkang zawk, state dang hrang hrangah te hian tunah hian Record of Rights an ti a, hei hi an hmang tawh a ni. Tuna LSC kan neih duah ang te hi an kawl tawh lova. Record of Rights an tihah chuan computerization an hmang a. Khatah khan engkim kan LSC te zawng zawng leh map nen khan a awm vek tawh mai a ni. Chumi a han hman tawh chuan engemaw, LSC, certificate emaw kan mamawh a nih chuan Revenue Department-ah kan va kal a, ₹5/- emaw, ₹10/- emaw kan va chawi a, chip te hi min pe a, kan LSC atang khan dahkham, mortgage emaw a tul a nih chuan kha

lehkha kha ni 10 emaw, ni 15 emaw valid tur khan min pechhuak mai a. Tichuan, ram kan han lei duh a nih pawhin, helaiah mi pahnih khat indawr mai lovin Revenue ten a hriatpui thlap, anmahni record a va en thlap thei tur khan state dangah chuan hma hi an la chho tawh a ni. He Record of Rights ang te hi kan ram hian kan mamawh ve tawh a ni. Record of Rights kan nei a nih chuan tuna dik lo tam tak leh LSC lem leh LSC inthuahte pawh hi a awm tawh dawn lo a ni. Hei vang hian Record of Rights state dangte pawhin an tih theih tawh ang te hi kan ram te pawh hian han ti ve thei ngei ila chuan a va han duhawm dawn em tih hi Pu Dy. Speaker, karawn sawi theih ni se.

Tin, Demand No. 23-naah hian han lut lawk ila. January thla tawp lam khan Sazaikawn-ah Art & Culture Department ten hall tha tak mai an va hawng a. Helai kan hall hi a hma pawh khan hluihlawn deuh a lo ni tawh a. Ama'rawhchu, kan Minister zahawm tak hmalaknain tunah hawn a ni tawh a. Tunah sawn hall tha tak mai kan nei a. A hire theih tawh a, camping nan te pawh hman theih a ni tawh a. Chuvang chuan saw mi hall saw tangkai taka Lunglei mipuite pawhin kan hman theihna tur hian hma min lo laksak hi Art & Culture Minister leh a thawhpui kan Parliamentary Secretary te chungah hian lawmthu ka'n sawi duh a ni.

Mizoram Art Development Society hi I&PR Department hnuaiyah hian an lo enkawl daih mai hi a lo ni a. Han zawhchian hian Art & Culture-ah hi chuan sum hi kan nei tlem em mai an tih vang a lo ni a. He lai pawh hi tlema han san mar leh a, kan lemziak thiamte hi nichin lawkah khan Pu Dy. Speaker, an exhibition-naah ka va tel ve a. Kan Mizo lemziak thiamte an lo thiam tawh khawp mai a. A mawi hlawm khawp mai a. Vawiinah hian he House zahawm tak kaltlang hianin va chhim ve ngei turin ka MLA pui-te leh kan officer te leh Mizoram mipuite pawh va chhim ve ngei turin ka'n sawm ve duh nghe nghe a. Hetiangah hian kan lemziak thiamte hi Art & Culture lam a ni emaw, I&PR lamp a ni emaw, tlema han duhsak a, han tawiawm that a, han thuum that te hi an va mamawh em tih hi Pu Deputy Speaker, karawn sawi chhuak duh a.

Chumi chung chuan thil pakhat ka vei ve em em mai, han sawichhuah ka'n duh chu Thasiama Se no neihna tlang hi sorkar hmasaah khani lawn chhohna nuam tak mai kha an lo siam a ni awm a. Hei hi Pu Deputy Speaker, vawiinah hian hemi step hi vaw thiat sela, a hma thlalak awmsa a khan khilai Thasiama Se no neihna tlang khi a original ang khan siam leh ngei thei se, vawiinah hian kan Minister zahawm tak hi karawn ngen duh bawk a.

Pu Deputy Speaker, vawiinah hian tlemin hun ka la tam ve deuh hlek dawn, nidangah 'i hmang thiam e' min ti thin a. Vawiin chu tlemin ka pel ve palh hlauh a nih pawhin min lo hrethiam dawn nia.

Demand pahnih chauh ka sawi leh ang a. Demand No. 24-na, Health & Family Welfare chungchangah hian Pu Deputy Speaker, sawi tur a tam khawp mai, kha ka hma ami te pawhin anrawn sawi tawh a. Doctor leh nurse te, khatiang kan doctor tha leh nurse te hi an indaih lo em em a, hemi indaihlohna hi kan hotuten, tunah kan Health Minister te pawhin nasa takin tan lain hei tunah pawh hian doctor 5 te pawh lak tum a ni a. Hemi bakah hian nichinah pawh khan anrawn sawi tawh a. Kan nurse te, kan doctor te hi lak belh an ngai em em mai a, hmun tinah hian, khawtinah hian kan indaih lo a ni. Chuvang chuan helaiah pawh hian Finance lam pawh hian tan min han lakpui thei se chu a van tha dawn em tih hi ka rilruah a awm a.

Tin, Civil Hospital, a bik takin ka sawi thin tawh a. Lunglei ami saw, hei aia changtlung zawk hian siamthat theih ni se. A changtlung ka'n tih chu Pu Deputy Speaker, a infrastructure lampang hi a ni a, hei hmannah khan report kan dawng tawh a. Medical re-imburement-ah vaibelchhe 80 lai mai kan hmang thin a. Infrastructure chu nei tha ila, hetiang lamah hian kan Mizoram hmun chhung ngeiah hian in refer ngai lovin kan inenkawl thei a ni. Chuvang chuan hetiang dinhmun kan din theihna tur hi chuan Infrastructure tha kan mamawh a, hetilaiah hian tlema kan rilru te seng nawn lehin kan mithiam tak tak te, Directorate lam panga kan mithiam te

pawh hian khati lam kawngah khan ngaihtuahna han seng nawn leh se tih hi ka rilruah a lo awm a.

Tin, NEIGHRIMS Hospital Shillong-ah khuan tha tak mai a awm a, he medical re-imburement tam lutukte pawh hi khuti lai Shillongah te khuan Pu Deputy Speaker, a tam zawk te hi in refer theih dan te hi awm se chuan a patient te tan pawh senso a tlem ang a, sorkar ang pawhin senso a tlem zawk dawn a ni. Chuvang chuan khutilaiah khuan Urology te, heart te an khawl te pawh khu tha tak tak a awm a ni. Chuvang chuan hetilai NEIGHRIMS ah te kan in refer thei a nih chuan a patient te tan mai bakah sorkar tan pawh a hlawk dawn a ni a.

Tin, Health chungchangah hian lawmthu sawi ngai kan neih chu, Sazaikawnah khuan Urban Kalvari Health Centre tha tak mai kan Minister-in min sak sak mek a, an zo tep tawh a, tunah electric wiring te kan tichho dawn a. Hei hi thla thar maiah hian hawn theih mai turah kan inhisap ve a. Pu Deputy Speaker, nangmah kaltlangin kan Minister zahawm tak hi hun remchang a neih hunah min hawn sak ngei turin ka rawn sawm leh bawk a ni.

Tin, a tawp ber atan chuan Pu Deputy Speaker, Demand No. 48-na Information & Communication Technology-ah hian han sawi lawk ka duh chu, hei vawiinah kan Indian Prime Minister zahawm tak Pu Modi-a pawhin Digital India tiin a au chhuahpui a, Amaherawhchu, keini hian ICT lampang hi kan ngaihthah deuh hlek em maw ni le aw tih turin budget-ah pawh hian a beitham hle mai a. Hei te hi kan hotute hian Finance lam a ni emaw, kan ICT Minister te pawh hian tlemin tan han la mar leh se. Hei IT main power-ah nuaikhat kan han dah a, IT infrastructure promotion-ah nuaikhat lek mai kan dah te hi a tlem tham em mai a, hei hi nakinah chuan tunlai khawvel information khawvelah te hi chuan hetiang ringawt mai hi chu a beitham tawh deuh hlek a ni. Pu Deputy Speaker, chuvang chuan kan Minister te leh kan Finance lam te hian helaite hi khawngaihtakin min han ennawn that sak leh se tih kha ka rawn sawi

leh theih ni se. Kan Minister pahnih te demand hi ka thlawp a, ka support a ni e. Pu Deputy Speaker, ka lawm e.

DEPUTY SPEAKER : Pu T.Sangkunga ilo sawm ang.

Pu T. SANGKUNGA : Pu Deputy Speaker, ka lawm e. Vawinah kan member zahawm tak tak ten kan Minister pahnihte demand ngaihnamwakin an rawn sawi a, hun hi a tawi si a, sawi tamna hman a awm lova, a uihawm khawpin ka hria.

A hmasa berah chuan Demand No. 23-na Art & Culture chungchang hi ka'n sawi duh a. East Tuipui bial khi pi/pute thlang rawn tlakna a ni a. Pi/pute sulhnu pawimawh 90% vel hi khilalah khian a awm a ni tih hriain kan Minister zahawm tak tun ami leh a hma ami te pawhin hetiang thil hlui humhalhna chungchangah budget tam ber hi an rawn hmang thin a, a lawmawm hle mai a. Anni leh INTAC ho hmalakna azarah Vangchhia-ah pi/pu sulhnu hlui te enfiah a lo ni ta a, a lawmawm hle a. Kei pawhin ka lo hriat mang loh, ropui em em mai, Dungtlang khaw chungah khian pi pute sulhnu ropui tak a lo awm a. Director General, Archeological Survey of India ami pawhin a en tawh a. Lehkha ziak thiam hmaa an phun tih hriat reng, lungphun tlar tiar tuar te, ralvenpuk niawm tak tak puk te a tam em em a. An sawi dan pheichuan 'thil hlui la hmuh chhuah loh hlu tak tak, hidden ancient civilization awmin an ring a' a ti e, an ti a. Chuvangin Archeological Survey of India hian tunah hian Aizawl-ah circle thar Manipur & Tripura enkawl tur an rawn hawn phah dawn ta a. Internet-ah kan han en a, post 97 an create thar a, Group A ringawt pawh post 3 a rawn tel a, Group B engemaw zah nen. Khingah te khian kan Minister te hian tan an lak a, leilung fa te Master degree nei te pawh kan awm tawh a. Vangchhia-a an laihna te ka han en a, an Director ho zingah hian Mizo, Muster Roll-a an chhhawr Master degree nei te an lo awm der tawh mai a, zir lai mek te leh zo tawh dang te pawh an lo awm tawh a, helalah hian kan inngaihven tlan te pawh a thain ka hria a. Aizawl-a an circle hawn thar tur hi ngaihven ila, Mizo fate a tam thei ang ber thun ta ila. Vety

College an hawn dawn khian CYMA khan Mizo te za ah za Group C leh D tur chu minrawn thun sak rawh u kan ti a, an pawm lo hle a. YMA-in kan nawr kan nawr avangin za ah za an rawn thun tlat a ni. Clerk zawng zawngte pawh, peon zawng zawngte pawh khi YMA in kan nawr vangin Vety College ah khian Mizo an rawn dah a, Chuvangin helai an circle rawn hawn turah khian central pawh ni se, NGO te nen kan tan tlan hi a sawtin ka ring. Tin, NEEPCO-in Tuirial an rawn khuah hma khan Group C leh D-ah Mizo za a za min lak sak rawh u kan ti leh a, an tih ngai loh JE pawh kha 6 rawn la in za a za an rawn la in ka hria a. Clerk te, peon te min dah sak vek a ni.

Pu T.SANGKUNGA : phone man erawh chu a to duh khawp mai a. Ka telephone man kha ₹ 20,000 a pelin ka hria a. Kan in hmu thei si lo va, kan in phone reng mai a. Chuvangin, helai kan nawr hi a that ka ring a. In vau ni lo va, tha taka kan nawr ve a, kan ram a ni a, mikhual rawn kal rawn kal ai chuan kan regular zawng ang ti a thiam taka anmahni fak chung si a kan tih chhoh chuan a theih mai ka ring a, kan Minister kan ngen duh a.

Tin, a dawt leha chuan Demand No. 26 na - Information & Public Relations Department hi ka sawi duh a. Tunlai khawvelah chuan information a chak hian hmasawna a chak ringawt mai a ni. Entiran – Staff Selection Commission hnuaiah hian Aizawl-ah kum tam tak exam theihna a awm tawh a. Publicity a awm loh avangin Aizawl-ah hian Group B leh C leh A thlengin kumtin vawi engemaw zah post sang tel lakna tur exam a awm a ni tih tun thlengin kan thalai te hian an hre lo va. Kan mi changkang ber Chief Secretary hlui fa pakhat pawh hna zawng lai a awm a, kan Minister zahawm tak pakhat hnenah, ‘chutiang exam theihna Aizawl-ah a lo awm ve tawh e lo,’ a ti e, an ti a. Khatiang khawp khan publicity a awm loh chuan sorkar programme leh tih tur, eng sorkar pawh ni rawh se, media hi an hmangthiam tawh a. Publicity a that loh chuan hmasawna a awm thei lo. Chuvangin, he department te lutuk reng mai te pawh hi a tha lo hle mai. Programme pawimawh a chang chuan officer zawng zawng an chhuak

zo tawh tih te hi a buathlak a. Chuvangin, tih pun hi ngai in ka hria a, zanah te, zingah te pawh sorkar programme tha taka an cover theihna tur hian tih len tha in ka hria.

Tin, promotion-a an stagnate zia hi kan chhutpui pha lovin ka hria a. Entry grade-a organize service ve si, hming pawh sawi ta ila Pu Faka te ho, Lianthangpuii leh Tetei te ho hi kum 27 entry grade-ah an awm tawh a, kai mai na tur pawh hi ala awm lo a. Cadre service lian deuh hi an rawn sawi chak a, kan hre viau a, a te kan hre lo deuh thin. Minister ten a fel deuh PS a an lak dawn pawhin a theih loh, a ngaihna a awm hlawl lo, an ti a. Information pawimawh zia hi kan sawi ve duh reng reng a. Kan Minister hi a chak em em a, Health-ah te mak tih khawp in doctor 80 thingtlanga lo awm rei tawh an han la nghet ringawt mai te hi kan hriat ngai loh a ni. Thingtlanga awm nurse tam tak pawh an nghet mai a ni. Khatiang ang chi a hma la thei kan nei bawk a, hengte pawh hi rawn ngaihven zui zel tha in ka hria a.

Tin, a dawt leha chuan Demand No. 24-na Health & Family Welfare chungchangah hian sawi tur a tam lutuk a, hun enginng min dal tih mai tur hian a sawi zawh theih loh hian mi a dal thin. Tawi te ka'n sawi duh chu nichinah kan bial lama doctor awm rei thei reng reng lo, awm zawk, an han dah pawhin Champhai-a attach tih te kha kan neih tawk a ni a. Kum 20 aia rei tawh Sesih PHC-a (Pu Vaivenga hawn tawh kha a ni a) kan dah awmchhun lah kha Champhai-ah attach a ni a. A hnu ah an la awm nawn leh ta lo reng reng a. Khatiang chi te pawh kha nichinah min rawn hriat sak dawn tih ka Starred Question chhanna-ah khan a lang a.

Medical re-imburement hi sawi loh theih loh a ni a, North East-ah hmang hnem ber kan ni a. Damlote hi refer loh ngawt theih pawh a ni lo, ram a changkan chuan kan thihna a hla tlat a ni. Pu Buktea'n Kulikawn leh Dawrpui a compare a, fiamthu a ni na a, tun an haw lovang a. Kulikawn-ah chuan mitthi an han puante hian, 'zawngtah kungah a tla hlum,' te an ti a, keini veng chu, 'Vellore-ah a thi, Bombay-ah a thi te an ti a. Chu chuan motor a thawh dawn a, Airport-ah a thei thei kal tur tih te a ni a. Kulikawn

kan tluk lohna erawh chu Pu Dengchhuana farnu London-ah a thi,' a ti. Kan changkan poh leh kan thihna hi a hla mai a ni. Ka bialte pawh hi 'Kolkata, Delhi, Vellore-ah in thi dawn tan,' te ka ti a. Chuvangin, kan changkan poh leh kan thihna hi a hla tlat mai a. In refer lo ang tih ngawt theih pawh a ni lo. Refer lo ila thi ta si se, a refer duh lo tu kha kan haw ngawt ang. Chuvangin doctor te, board-te pawh hi dem ngawt theih an ni lo. Chuvangin a pawimawh chu a refer na turah kan uluk a ngai.

Hmanni Kolkata-a MLA rual kan zuk kalin an lo sawi chu, Mumbai ami ang deuh chiah hi TATA, Kolkata-ah Mizoram House thar bulah hian a awm a. Tah hian rawn refer thin teh u, an ti a. House kal tlanga kan request na ni se. A hlui kal tawh lak lawh ni lo, a thar kha chu kan Liaison Office, kan JRC ten an lo en chiang em em mai a, Mumbai leh Kolkata inkar thlawhna man hi kan save dawn a ni. Tin, nichina NEIHGRIMS, Shillong an sawi kha a tha em em mai a. Hman zanah Pu Lianzuala, kan Addl. Secretary retire, Sports Council ami 'BJP ho enge in an,' tih pahin ka zuk phone a. 'NEIGRIM-ah ka in entir a, a hmasa khan ka ti nasa viau a, ₹200 ka chawi a. Tun tum hi ₹400 ka seng pha mai awm mang e aw,' a ti a. Chutiang khawp chuan senso a tlem tlat mai a ni. Khutiang khawpa damdawiin tha kan pan lo tlat mai hi a pawh a. Mizo doctor pawh Head of Department 2 an awm a, nurse engemaw zah an awm bawk.

Nichina kan member zahawm tak, Mavala han sawi kha ka support satliah ni mai lovin hman nghal tha in ka hria a. Heng damdawiin tha kan kal kan fo avang hian a senso hi a tam a. Chuvangin, a hnai vai, tha si-ah in refer ching ta ila a tha awm mang e ka ti a. Tin, RSBY hi private hospital a hmang an tlem em em mai a ni. Hei hi tha ka ti lo va. Sorkar hospital recognition pe tur hian recognition rule pawh kan la nei lo a. Hmanah chuan sorkar hospital a awmte chauh hi medical re-imburement bill theih a ni a. Federation in kan zuk dil belh a, Durtlang leh Serkawn min rawn phalsak a. Doctor strike avangin Health-a ka awm lai ngeiin Greenwood Hospital hi doctor strike avangin adhoc in kan recognize a. Chuta chin chu adhoc hlir hian kan recognize zung zung mai a. Nichinah pawh khan recognition rules pawh kan lo la nei lo tih an rawn sawi kha.

Chuvangin, recognition rules siam vat a ngai a. Kan siam lo anih pawhin fimkhur a ngai. Hospital-te hi recognize an nih loh chuan medical re-imburement a bill theih loh a, awm tur an hmu tlem em em a, a hlawk miah lo a ni, recognize harsat lai khan a lang reng. Chuvangin, hetiang RSVY card hmang duh lo hospital hi chu recognition kha withdraw zung zung tura vau mai tur a ni. Withdraw tak tak bawk tur, vau chang ni lovin. Chuvangin, an hmang ngei ngei tur a ni. A hlawk lai, pawisa lak nghal theihna lai chauh an duh chuan a dik lo reng reng.

Tin, chubakah an rate pawh a inang lo lutuk. Tunhma chuan hospital recognition kan tih reng reng in an rate tur chu Durtlang leh Serkawn, Kohhran hospital rate ang hman ani ang tih sorkarin order a chhuah thlap a. Tunah hian khami order kha a la stand reng a, tunah Health Departmenta thawkte pawh a awm na hria pawh an awm tawh lo. Chuvangin, kha order kha hmang nghal ila, tuna committee recommendation a chhuah hma pawh in order thar chhuah leh mai tur. Hospital rate-te hi a inang lo em em a ni. Private hospital thenkhat te pheih chu awm man a to zual deuh bik a ni. Sorkar order dinglai a copy hmu tawh lo mah ila chhuah that leh mai tur a ni a, darkar khat hna chauh a ni. Sorkar-in rate a siam hma chu Durtlang leh Serkawn Hospital rate bak an exceed theilo ang tih mai tur a ni. Central pawhin sipai an duat em em te pensioner an enkawl pawhin rate a rawn fix a, Greenwood-ah emaw, Durtlang-ah emaw enkawl se khami bak hospital-in an bill chuan anmahni'n a bak an tum vek a ni. Sipai leh an chhungte hi duat an ni a, anni meuh pawh a bak an chawi tir chuan khatiangah khan Durtlang leh Serkawn hospital rate a exceed-na kha chu chawi tir ila, a check dan tha awmchhun pawl a ni a.

Tuna kan Committee exam lah kha session hmasaah thla thum chhungin an zo ang tih min hrilh a. Tunah hian kar hmasa lawk khan an report an theh lut tih a ni chauh a. Chuvangin thil tih rei hi Mizoram sorkar hnathawkte thiam zawng ber pakhat a ni a. Hengte pawh hi tih ran loh chuan tihngaihna a awm lo. Aizawlah pawh kan bial te damlo an lo kal a, RSBY an hmang thei lo tih an hriat meuh hi chuan an chhuak dawn

ruai a ni. A nuai tel dawn an lo hmang tawh, a manganthlak lutuk. Chuvangin, heng kan hospital recognize zawng zawng hi chuan an ba emaw, ba lo emaw RSBY hmang turin kan impose ngei ngei tur niin ka hria a. Private hospital-te hi Assembly Committee-te pawhin chal kawlh pen ang fawka chiangin kan hrilh tawh a ni. Chuvangin hei hi chu an ti tur a ni ringawt mai. Khatianga kan kal loh chuan (Pu Deputy Speaker, ka zo a ni mai e,) a re-imburement rate hi a sang reng ang. In refer duh loh chuan tihpuitu an lian tawlh tawlh ang, an natna a khirh chuan. Chuvangin Health Care chungchang hi chu thuril thuk tak hi a ni ringawt mai a ni.

Tichuan, Pu Deputy Speaker, kan Minister zahawm tak pahnihte demand hi a tha ka ti a, duh aiin sum hi kan dah tlem ka ti ve ve bawk. Mahse tihngaihna a awm tawh lova, pass ngei turin ka rawn support e.

DEPUTY SPEAKER : Tunah Pu John Siamkunga.

Pu JOHN SIAMKUNGA : Pu Deputy Speaker, ka lawm e. Vawiinah kan Minister zahawm tak tak pahnihte demand kan sawi dawn a. Department pathum ve ve, department paruk lai an nih avangin khawiahmah hian kan cham rei hman lo tih a chiang em em a. Tin, vawiina kan budget pass tur hi cheng maktaduai 6620 chuang fe a ni a. Duhtawka han sawi pawh a chakawm, mahse kan cham rei hman dawn lo a ni tih kha ka'n sawi duh a.

A hmasa berah chuan Demand No. 6 Land Revenue & Settlement hi, helaiiah hian kan duhthawh hlawm em em a, a tha a. Mahse, he sorkar hnuaiiah hian hna tha tak tak hmasawna kalphung kal chho zel mil hian duan tam tak a awm a. Mizoram Land Revenue Act te siamin Rules tha tak tak siam chhoh a ni a. Thenkhat ten LSC siam man a to lutuk tih te an sawi thin a. Amaherawhchu, sorkar mit atang erawh chuan kha ram kha chatuan thlengin LSC neitu hnenah hlan a ni tawh dawn a, chumi a nih avang chuan a man te pawh a lo awm ve deuh ang chu. Man hniam te tea kan tih khan an ta a ni

hlen tho si a. Thenkhatte pheii chuan an ram neihsa an han phel a, tunhma khan LSC siam man kha 200/300 lek a ni a, a hnu lawkah nuai 20/30 in an hralh leh mai si a ni. Khami a nih avang khan ram chu sorkar ta a ni si a, sorkarin awmze neia kalpui a duh avangin heng dante hi a han siam chho a ni a. Chuvangin a enkawltu Minister pawh hi a faktlak hlein ka hria.

Chutihrualin kan hotute lo sawi tawh compensation erawh hi chu a pawii khawp mai, Land Revenue & Settlement te duh dan a nih pawh ka ring chuang lo, compensation ngaihtuhtute lampang zawk hi an nih ka ring a. Phairamah chuan mi ram an laksak dawnin an pi leh pu atanga eizawna ngelnghet lo ni tawh, an inngahna liau liau te kha tulna avangin an laksak thin a ni. Chumi a nih avang chuan tap zawih zawihin an ram kha an thlah liam thin a ni. Khangah te kha chuan a lo to deuh a nih pawhin a awm a. Kan ramah ve thung erawh chuan khawilaiah emaw sorkarin hma a la dawn tih veleh tuten emaw LSC te an siam a, pass te an lo va nei a, tah chuan sorkar kha an ram laksak turin an ngen zawk a. Chuti chung square feet-a a za tel kan la bill erawh hi chu ennawn chu a ngai hlein a lang tih erawh kha chu ka'n sawi duh a ni.

Pahnihna-ah chuan Art & Culture hi tawi te han sawi leh ka duh a. Art & Culture hi kan culture te leh kan thil, kan ziarang te humtu a ni a, a ropui khawp mai a, hma te a lo la nasa tawh a. Vawiinah hian ka rilrua lut chu Chapchar Kut kan tihna hi a rei tawh hle a, Chapchar Kut kan tih apiang hian kan Mizo ziarang te leh thil dang dang te pholan a ni thin a. Hetihlai hian kan target pakhat dang lehah chuan zin mite a hip em tih hi kan en tel thin a. Helaiah hian mi hi kan hip tak tak vak lo em ni aw tih hi ka ngaihtuah thin. Chapchar Kut kan neih hian a entu tur mipui, tourist ho lo vak lut hi an tam lem lo mang e aw tih hi ka hmuh dan a ni a. Chuvangin kum sawm tel tih tawhna-ah hian keimahni culture, hnam ziarang kan humhim pah hian a lehlam zawnga sum lakluhna lam tourism industry lamah hian rilru kan pe nep deuh em aw, he lamah hian tan lak deuh dan a awm em aw! Art & Culture lamin an lo la a nih pawhin vawiinah hian a sawi chi nge ka hre lova, peng dang atang pawh khan advertisement a ni emaw, thil

eng emaw nasa zual deuh hleka kan tih chhoh erawh chu a ngai ang. Chapchar Kut hnam ziarang pholanna kan han tih rual rual hian a lehlamah sum tam tak lak theihna hi a awm a, chu chu kan target te pawh a ni thovin ka ring bawk a.

Tichuan, Information & Public Relations Demand No. 26-na hi tawi te han sawi ka duh a. Ka sawi duh chu state dang dang calendar an sorkar calendar hi kan hmu ve thin a. Sorkar dangho calendar-ah hi chuan thla hmasa a lang a, tun thla kan hman mek te a lang a, thla lo kal leh tur hi phek khatah hian a awm thin a ni. Khatiang avang khan kan han en let duhte pawh a lo lang nghal mai a, kan hmanlai mek a lang a, lo kal leh tur a lo lang bawk a, calendar pakhat kha a tawk em em mai a ni. Kan calendar erawh hi chu keu buai fe hi a ngai zel mai a ni. Chuvangin heng kan state thenawm Arunachal te leh Meghalaya te kan han tar tlar ve thut a, keini chu kan thla hmanlai ngau ngau ringawt kha a lang a ni. Anni chu thla kal tawh leh thla hman mek leh lo la awm tur a lang thin a, plan siam turte leh thil dang dang mahni programme lo siam thinte tan phei chuan a tangkai lehzualin ka hria a. Hetiang hian a tih ve theih lawm maw ni le tih karawn sawi duh a.

Tin, Aizawl Darshan Tour from interior villages tih ah hian nuai 15 lai Information & Public Relations-ah hian dah a ni a. Hei hi a tangkai khawp mai a. Thingtlang lehzual ami Aizawl kalna chance pawh nei vak loten hei hi an hmang tangkai thei a. Mizorama hmasawna hrang hrang leh an thil hmuh duhte kha hmuh tir theih an ni a. Hetianga nuai 15 lai dah a ni leh hi he Zoram mipui hmun kilkhawr zawk ami ten an hmang tangkai leh ang tih ka ring a.

Tin, Information & Communication Technology-ah hian tawite sawi ka duh a. Tunlaiin social media lamah nasa takin kan thang a, a hman dan kan thiam lem hlei lova. Khawilayah emaw thil a lo ri deuh hluai a, thutak fiah hman lovin tute emaw kha kan va tihmingchhe hman viau thin a ni. Chung chu thil tam tak a ni a. Khawilayah emaw chuan thilthleng a awm a, hmanni lawkah pawh bialtu MLA pakhat phei chu a

mitthi te kha a thawn duh lo tih te a ni a, mahse, an hriatchian loh vang a ni. Khami khan a thawn Chiang a mahse an biak lai khan a lo hre lo mai zawk a ni. Khatiang khan a hre hmasa khan social media lamah an lo vawrh darh tawh si a. Miten thil tha tak an tih kha a chhe zawkin hma a lo hruai khan khami chawhreh kha a lo har tawh thin si a. Hengah te hian social media kan hman nasat ang hu hian a hman dan tur kan thiamloh lai hi a pawihle in ka hria a.

Tin, chutih rual chuan Rural Information Kiosk kan tih RIK lamah hian hma an la nasa a, thingtlang hmun hrang hrangah khawlte leh hmanruate pe in hma an la a ni. Hei hi eng chen chiah nge an kal ka hre lova, tunah hian 11 lakhs lai dah a ni a. A tangkai zawnga hman tur a ni a, an hman tangkai tawh dan te pawh hriat a chakawm hle in ka hria a. A vang chu, helama thingtlang mite kal man tam tak tak senga an lokal ngai tawh lova anmahni khaw hmun ngeia information leh thil dang dang an mamawh te an lak theihna tur atana duan a ni a. Hei hi eng ang chiahin nge an hman tih hriat a chakawm a.

Tin, capacity building lamah hian an dah hnem bawk a. Capacity building hi kan uar a pawimawh hle, a chhan chu training kan neih ngun poh leh mihring chu kan hriam a ni mai a, training kan neih khat chuan kan hriam thei lo. Tin, training nei miahlo pheih chu in hai ven a har, chu chu a pawimawh in ka hria. Capacity building lampang kan uar hian mi, engmah nilo tur kha engmah ni turin kan siam thei thin a. Helamah sum tam tak dah a ni hi a ropui khawp mai.

Tin, Demand No.5 hi han sawi leh lawk ka duh a. Health & Family Welfare hi a changin kan dem a, a changin kan fak a. Mipuiin kan hnek ber leh dammawh hritlana kan pan te a ni. Fel em em leh tha em em a min dawr lai a tam zawk a, tlema kan han sawisel lai hi engemaw dum chhete kan hmuhlai hi a ni thin a. A tlangpui thu ah chuan mihringte hian lawmna lam ai chuan vuina lam hi kan pu pawrh thui deuh thin a. Chuvangin, hmingtha tak lo ni tawh kha hmingchhiat hi a awlsam em em a. Helaiyah hian mipuite pawhin kan thiam a tul. Tun sorkar chung hian a thang nasa

em em a. Computerisation of Civil Hospital tih ah te hma an la nasa em em a. Tin, a hmunah te pawh kalin an khawlte kan en a, CT scan-te leh cardiology lam ami khawl tha pui pui te kan han en hlawm a. Hma chu kan lo sawn nasa a ni tih a chiang a, amaherawhchu, mihring famkim lo kan ni a, famkim lohna lai a lo awm thin hi a lo lar thin a ni mai a.

Tin, Cancer Hospital lam te pawh saw an lo thum tha a, an lo equip tha hle a. Sawngah te pawh CT scan, 16 slice chi, tha tak te a lo awm tawh a, simulator erawh kha chu kan kal lai hian a la awm lova, mahse, khangte pawh kha beiseiawm takin min chhang a. Khatiang khan khawl ropui tak tak nen kan doctor-te hi an in chhawp ve rup tawh a ni tih ka'n sawi duh a.

Tin, Medical College din tuma hmalakna ah hian 2000 lakhs lai tunah hian dah a ni te hi he sorkar hi a fak tlak hle in ka hria a. Tin, Rural Health & Sanitation hi hmun hrang hrang ah an ngaihtuah nasa in ka hria a. Heng kan bialah te pawh hian min tihsak nasa a ni. Sub-centre building-te, quarter-te, chu mai bakah quarter hrang hrang type 3, type 2 tih ang chi te min rawn sak sak nasa a. Tin, ka sawi duh pakhat chu, Hnahthial-ah khian Health & Family Welfare hian damdawi in min sak sak a. Tunah hian phase 1 kan zo tawh a, phase 2-na tur hi sum a awm hrih lova. Hei hi a chhum bung angreng khawp mai a, hemi chhum bung tak mai hi kan Minister zahawm tak hian min lo hriat sak sela. Nakin lawkah khuallian a han ni dawn a, a hmunah te pawh a han en ang a. Khi khi min tih puitlin sak hram turin ka ngen duh a.

A tawp bera ka sawi duh chu, Pu Dy. Speaker, sentence hnih/khat chia. Damdawi dawr hi Mizoram-ah hian a tam em em mai a, keima phak tawkin ka ngaihtuah thin a. Phaiah te kan kal ve a, damdawi in lian pui pui bulah hian damdawi dawr hi engzat nge awm tih hi ka chhiar ru ve thin a. Mizoram-ah hian a tam uchuak a ni, a kawthler a kawthler hian dawmdawi zawrhna a awm a. Khawilai emaw a dawmdawi in ding tawh, private hospital a ni emaw, dawmdawi dawr hian a umzui vat zel mai a.

Damdawi hi kan ei lutuk deuh nge ni ang a, enge ni kan zia hi aw tih te ka ngaihtuah thin a. Chu chu Drugs Control lam ten kan lo tih dan thin ka hre lova, drugs license hi kan pe hnem lutuk deuh em ni aw tih te, a population mil hi chuan a tam lutuk deuh em ni chu aw tih hi keima mimal observation a ni. Kha kha ka'n sawi lang ve duh a ni e. Tichuan, Pu Dy. Speaker, kan Minister zahawm tak tak pahnih te demand hi ka rawn thlawp a ni e. Ka lawm e.

DY. SPEAKER : Pu P.C. Zoram Sangliana.

Pu P.C. ZORAM SANGLIANA : Pu Dy. Speaker, Good Friday kan hmang zo va, kan damna atan thawhlehma champaha kan han hmang zo va, chutah Easter Monday-ah kohhran upa demand, lei leh enkawl dan te; tin, keimahni member-te ngei pawh kan affairs min ngaihtuahtu, chutah zirna sang ber enkawltu, kan culture leh tradition te vawng himtu tur demand sawi hi a inhmeah ka ti a.

Tin, hrisehna kan mamawh em em a. Hrisehna a thatloh chuan kan puithiamten 'lei chu leiah, vaivut chu vaivutah' tih a thleng zung zung mai a ni. Tin, kan sorkar hmalakna chi hrang hrang te, chanchinbu leh media chi hrang hrang hmang te a kan lo hriat zung zung theihna department neitute pahnih demand vawiina sawihona kan nei tur hi lawmawm ka ti tak meuh a.

A bik takin Land Revenue Deptt. chungchang bikah hian han sawi hmasak ka duh a. Nichinah khan Aizawl South 1 bialtu MLA zahawm tak khan a rawn sawi a. Kha kha ka thlawp em em ruala ka sawi duh chu Mizoram 1972 atangin Union Territory lo ni a, sorkar hial pawh lo ni ve tawh, a hranpa liau liau a sorkar-na kan han neih hnu ah hian sorkar inrelbawlina lian telh telh, department pawh lo pung chho zelah, kan office hmunhma leh ram tih velte hi department tin hian hmunhma sawi rualin kan humhalh that a pawimawh hle. Department leh department kha chu insiamrem a, mamawhna anga hman mai ni sela. Ka sawi sual em? Khami ka rawn against lam nilovin, Aizawl South 1

MLA zahawm tak sawina kha ka support a ni. Amaherawhchu, ka sawi duh zawk chu, sorkar building te leh kan hmun, lo, ram te hi hlut nachang a department pawhin an hre tawk lo fo in ka hria a. Land lease a ni emaw, a LSC chu sawi loh, hei hi kan ram alawm tih ringawt hi vawiin thlengin an la awm deuh fur in ka hria a. Hengte hi enchian a pawimawh a.

Chutih rual chuan mimalah, pawlah, kohhranah te thleng hian pek a ni fo thin hi ka ui a. Heng thilte chu Revenue Department chan a ni e ti biklo in department tinte mawhphurhna a ni tih hi ka'n sawi tel duh a. Revenue Minister zahawm tak hian ka chan a ni lo a ti deuh maithei a, hei hi remchanga lain ka'n sawi duh a.

Tin, kan ram dinhmun hrim hrim hi, sawi ang khan, chutiang khawpa lo kal ve tawh kan nih avang chuan, Pu Deputy Speaker, Recruitment Rules hi heta sawi luh talh hi ka duh a, Parliamentary Affairs Minister a nih avangin kan affairs-te pawh a ni tel vek alawm, tiin sawi luh talh hi ka duh a. Group A bawrah hi chuan kan la deuh reng a, amaherawhchu Group B,C leh D-ah te hian mumal taka recruitment nei lo Deptt. avangte pawhin, ti ang, a neite pawhin helai bawrah hian ngaihthahna avangin, hei hi harsatna kan tawh lenna em em mai niin ka hria a. Helaiah hian heng Deptt. Minister-te pahnih demand kan sawi rual hian, midang zawng zawng pawh kan thahnemngaihna kan hriattirna hmun ah, i Chair kaltlangin ni se ka duh a. Hetianga helaia a hniam lampang hi kan en uluk loh chuan, nakin lawkah chuan lulian bur, kebai, a then chu a ni ang a, kal thei miah lo te a ni dawn a ni. Chuvangin helai bawrah hian Deptt. tin ten kan Recruitment Rules-te pawh hi tun aia uluka han zir nawn a pawimawh a. Chutih rual chuan, srrkar hnathawk, Deptt. hrang hrangte pawh hi, hnathawktu hniam ber atanga sang ber thlenga an strength leh service kan la mamawh em he Deptt. hi emaw, a dangah a awm tawh zawk em, tih zirchian hi a hun tawh tak meuh meuhin ka hria a. Chutah chuan khawvel thang zel ah hian Department thenkhat te hi chu kalsan (designate) ngai tawh te a lo ni ang a, a then chu a thar din belh ngaite pawh a lo awm ang a. Hei hi zirchian a pawimawh mang e aw tiin kan sawi uar hle a ni e. .

Pu Deputy Speaker, Land Revenue Deptt. bikah hi chuan a dik takin, harsatna kan tawh ni a ka hriat chu, mipui hi kan zirtir a ngai ka ti a. Mipuite zawk hian kan ram leh lo, mahni ngei pawh thatchhe ber ka ni mai thei a, a famkim lo ber, khawiah nge kan LSC pawh a awm? Khawiah nge kan hmun hmata pawh hi ka hre chiang lo a. Miin an rawn sawisel veleh a harh thar ta thut, humhalh nachang hre lo hi kan tam a. Deptt.-te hi tun aiin hmang tangkai ila, an han computerized atang pheih hi chuan, nichina MLA zahawm takten an sawi ang khan, kan ram kan hnam tan nghahfak Deptt., Eden huan atanga kan sik reng kha an ni a. Chuvang chuan, he Department hi an pawimawh hle tih hi ka sawi duh a.

Tin, Higher & Technical Education Department ah hian ka sawi duh chu zirna tha chu khawpuiah nge nge hian a ni tlat a. Chuvang chuan, member zahawm takte rawn sawi ang khan school building tha leh hostel-te hi, sum neih ang ang leh tuna kan pass tur hian a daih lo a nih pawhin, nakina RE-tea la siamrem leh turin hmang ngam se la tiin kan Minister hi ka ngen duh a ni. Chumi a nih loh chuan college luh a lo hun leh ang a, seat chang lo tih velah nasa takin kan buai leh ang tih ka hlau. Hostel tha tam zawk Aizawl khawpui ah, district capital-ah te, state capital-ah te min dah sak sela, building pawh a thar sa thuai thuai se tih ka'n belh duh a ni.

Art & Culture Department Demand No. 23-na ah hian ka sawi duh chu nikuma kan pawisa neih ai khan (ka chhut sual ka ring lova) nuai 626 chuang zetin kan nei tlem ta a. Chuti chungah he department in hma an lak na, Archaeological Survey of India, Govt. of India-te nena pi pu te hmun hlui an lo humhalhna Vangchhia excavation (hmanni lawkte pawh khan carbon sample-te pawh kha an han nei niin ka hria a). Result-te khan kan hnam kum upat leh he ram chanchin te hi min han hrilh leh thei dawn a ni a. Chuvang chuan, hei hi hma lak uar chhoh zel turah, nichina member zahawm tak pakhatin a sawi ang khan, Aizawl hmunah ngei Tripura leh Manipur-te nen kan intawm tur Circle Office an han hawng tur te, hna awm zat te thlengin google-ah hmuh tur an awm ta te hi lawmawm ka ti a. Chutih rual chuan a department changtu, lo enkawltu

turten sum an ngah lohzia a lang si a, chuvangin hetiang archaeology lampang te hian an pawisa neih tur ang ah te inthlahrung lovin nakina la siamrem sak leh tur khan hma la ngam se tih hi ka'n sawi duh a ni.

Tin, Pu Deputy Speaker, Demand No. 26-na Information Department chungchangah, hmannah zawhna hunah kan Minister-in ka ngaih pawimawh em em min chhansak tawh a, lawmawm ka ti a. Sorkar hnathawh leh mahni department chanvo tlangzarhna tur leh mipuiten kan lo hriatna tur atan department thenkhat vawiin thleng pawh a advertisement atana pawisa la dah mumal lo te, 'dah mumal turin, dah turin kan lo ngen dawn a ni,' tih hmannah zawhna hunah min hrih tawh a. Vawiinah hian ka sawi nawn leh duh chu he department hi kan sorkar tlangau an ni a ni. Sorkar tlangau an nihna ang hian anni hi kan hman tangkai, kan hman thiam hi a pawimawh tak zet ka ti a. Chutiang tur chuan tuna an tangkaina lai hi hei aia nasa zawk hian hman tangkai ni se tih ka sawi duh a. A bikin kan flagship programme NLUP-te, Doordarshan-te leh local channel kaltlang te, anmahni kaltlanga kan lo hmuh, kan lo chhiar thin te, MLA-te ngei ngei pawhin 'E, a ni maw' tih tur hi tam tak hmuh tur hi a awm a ni. Chuvangin, he department hi tih len, tih chhoh, an mamawhna angah hian kan thilphalna tur a ni. A bik takin, he House-a member zawng zawng tena kan mamawh, kan hnek rawn chu he department hi a ni. An hmalak chhoh zelna ah chak zawka an kal theih nan sum leh paiah pawh nakinah RE hun atana inthlahrung lo turin kan Minister-te hi ka ngen duh a ni. Chutiang bawkin Demand No. 48-na Information & Communication-te pawh hi kan mamawh zia kan hria a ni.

Pu Deputy Speaker, Health & Family Welfare, Demand No.24-naah hian, han chen deuh hlek ka duh a. Hmanni zawhna unstarred-ah nge starred-ah ka chiang chiah tawh lova, kan Minister zahawm takin zawhna chhanna min pek, House-a kan lo hmuh ah chuan Health Worker-ah ringawt pawh post 243 emaw lai post ruak kan nei a ni ti khan chhan kan ni a. Chumi awmzia chu, ka hriatna a soal loh chuan, Health Worker-te hi an awmna hmunah hian pahnih awm dun deuh zel a post an ni. Health Worker

mamawhtu thingtlang, ti teh ang, leh heng a mamawhtu khua 116 hian kan nei lo tihna a ni. Doctor chu kan mamawh tehreng mai, amaherawhchu, a grass root a kan hritlang te, damlo tuna kan neih te min enkawl hmasatu chu hemi te hi an ni. Chuvang chuan, ka sawi thiam dan a ni miau mai si a, competition in mi lak an ni a. Chutah chuan, khawiah pawh ka awm duh tih chu an sign a ni mai, a bikin Health Worker tur, staff nurse ti zawng hian sawi ila a chiang mai ang, heng turte hi chu hriatthiamna hian aiawh kal phalna hi a ngai ka ti a ni. An damlo vat emaw, sawipuitu tha tak khan a rawn sawipui a, thingtlang kan kawt der zel a.

Entirnan, ₹10,000/- hlawhin i aiawh kaltir phal rawh, khawtlanga hotute nen, district enkawltu an ni emaw, doctor enkawltute nen, a khaw nula/a khaw tlangval train chhuak, zir chhuak tawh, hna nei lo tam tak, hengte hi chhawr nan hmang ta ila, wawiinah hian 'health for all' hi kan thleng rang ang tih ka ring zawk a ni. Sorkar hnathawk reng reng hi Pu Deputy Speaker, ka sawi sual loh ka ring a. Muster Roll an nih lai hi chhawr an nawm lai ber a ni tlat. Chuvangin, (Deputy Speaker : Chair kan han inthlak lawk ang e) helaiyah hian kan Minister leh sorkar ang pawh hian hriatthiamna in nei ila, ... kan khua ami, Nurse train chhuak kha hengah hian aiawh in lak phal dan te min zawn sak se. Session hmasa khan, ka thahnemngaihna in general deuh in, he department-ah hian ka sawi tawh a. Pu Speaker, a bik taka ka sawi duh chu, he department hi keimah pawh a mamawh zual tu ka ni a min hriat angin, keimah ang, ka an pui hi tunah chuan 130 chuang kan awm a ni. Lunglei hospital-ah dialysis khawl tha taka enkawlin, a hmunhma te a thianghlim in a tha em em mai a, chumi chu hria se kan Minister leh kan department-te hian, dialysis khawl wawiina ground floor-a an dah saw hmun him zawk leh thianghlim zawka min dah sak an tum a ni tih han hriat te hi lawmawm ka ti a.

Tin, chumi bakah he natna hmanni pawh a ka sawi ang khan population angin chhut ta ila, Mizoram hi India ram pum ah pakhatna kan nih loh

pawhin pathumna chunglam kan ni mai awm mang e. Chuti khawp chuan damlo hi kan lo tam ta a, chumi enkawlna, bul tanna tur atan chuan dialysis a ngai a ni. Vawiin-ah hian doctor mumal kan neilo niin ka hria a. A theih hram chuan kan Minister hian doctor la junior deuh hlek te zingah Hematology doctor zir tur bik min zawn sak sela, training pe sela, chutiangin nurse dialysis pe theitu vawiinah pahnih chuah kan nei a Aizawl bik ah, khawl pathumah pahnih in an function a. Pakhat phei chu Pu Speaker, i hun lai, M.P. i nih laia i pek kha a ni nghe nghe a. Kidney problem nei zawnzawngte aiawh in he House-ah hian lawmthu pawh ka hrilh duh che a ni. Kidney problem neite tan hian malsawmna min thlen a ni, ka lawm e.

Vawiin-ah hian kan Minister zahawm tak hian kidney lam bik atan nurse a bik in training tir sela, tunah mi 2 lek in an enkawl a, darkar 3 tal a lo berah dialysis lak kan ngaih laiin darkar 2-in min han tih sak a. Shift-in kal tir sela, shift 3 ten han ti sela, keini a mamawh tute tan leh la kal zel tur te tan an pawimawh em avangin helai thu hi ka'n sawi duh a.

Pu Speaker, minute khat chiah khawngaih takin, MCON, (Mizoram College of Nursing) te hian an sawi hmangin zirlai ten library kan neilo an ti tlat mai a. Helaiyah hian mahniin an intum thin niawm tak a ni a, he hi min ngaihtuah sak sela. A bul lawkah RIPAN kan nei a, heta zirlaiten lehkhabu lei a ngai a ni tih an hriatloh lai khan, he MCON zirlaite chuan lehkhabu hi lei a ngai a ni tih an sawi a. Hengte hi kawng min dap sak in kan Minister hian min solve sak se tih kan ngen duh a.

Tin, chumi aia pawimawh pakhat chumi concern ah zirlaite hian, 'electric leh tui bill kan chawi,' an han ti tlat mai hi Minister hian solve sak dan a hria ang tih hi ka ring tlat a. Hengte hi min hriat sak se kan duh a. Tin, chumi bakah vawiina kan sawi ang chi te hi kan hriselna atana kan mamawh

ngawih ngawih an nih avang hian anni ah hi chuan kan MLA tin te pawh hian kan mit te hi a chang chuan kan thatna tur a nih avangin maimitchhin sak ila.

Nikum lamah, kan rama natna do na tur atan ₹1,00,000/-theuh kan thawh, tunah chuan henga tanpui theihna tur te pawh hi rem hre takin kan Minister kaihhraina kan lo nei thei ta bawka. Hengte hi tangkai zawka hman a nih theih nan leh heng department te hi a pawimawh em avangin leh kei ka tan pheichuan an pawimawh zual avangin kan Minister zahawm takte pahnih Pu R. Romawia leh Pu Lal Thanzara-te demand hi pass ngei ngei ila, kan ram, kan hnam in, mimal in kan mamawh department-te an nih avangin. A tul a nih chuan nakina la siamrem leh turin pawisa pawh hmang ngam rawh se tih hi demand pass tura ka rawn support rualin kan sawiduh a ni e. Ka lawm e.

S P E A K E R : Pu Lalrobiaka

Pu LALROBIAKA : Pu Speaker, thusawina hun min pek avangin lawmthu ka sawi a. Kan sawi hmasak ber duh chu, Demand 23-na kan Minister zahawm tak Pu R. Romawia hnuaiia Art & Culture Department a ni a. Hei sum lamah chuan a tam lo khawp mai a, nikum lam te, hmasa lam te, a decending order in a kal thla zel em ni aw tih theih a ni a. Engpawhnise, hetihlai hian anni part play hi a ropui ka ti khawp mai a, a department ang pawh in han fak ka duh a. Anni hian Mizo identity hi min chhawpchuah sak a ni tih hi ka sawi duh a. Chutihruual chuan engatinge anni hi kan tih tet bik zel mai aw tih te pawh rilru ah a awm thei a. Kan member thenkhatte khan sawi tur an han hrelo te kha mak ka ti angreng khawp mai.

Vawiinah hian thingtlang khua leh khawpui thleng pawhin kan mamawhna hi a lian em em a ni, hei hi kan hriatpui a ngaiin ka hria a. Tute emaw, central Minister te lo kal se, a serh zinga a mei ang an tih ang deuh in

an tel lo chuan kan ti hleitheilo a ni. Lam leh thil chi hrang hrang kan entir a, chumi piah lamah chuan kan Ipte-chei leh Khumbeu te anmahni kaltlangin kan han present thin a, hengte hi a hlu a ni. Tin, anni avang hian kan culture thi tawh tam tak vawiinah kan vawng nung leh a ni tih hi kan sawi ve duh a ni.

Tin, rural area, thingtlang lamah pawh hian nasa takin hna an thawk a, anni hnathawhna avang hian Education lamah pawh hmasawna tam tak kan neih phah a ni. A chhan chu Raja Ram Mohan Roy atanga tanpuina an pek te, thingtlang library-ah lehkhabu tam tak an han pe a, hei hian adult education-ah nasa takin hma min ti sawn a ni. Hei hi a ropui hle in ka hria a. Kan hnam tih dan phung leh thil chi hrang hrang, kan incheina thlengin vawiinah hi chuan khawvel hriatah min pholang a ni. Chuvangin anni hi te hle angin lang mahse an te lo a ni tih hi ka'n sawi duh a ni.

Tin, kan festival chi hrang hrangte a hlutzia te rawn tichhuak zelin vawiinah hian mi hriat a lo hlawh ta zel a, amaherawhchu, hetah hian kalna tur tam tak leh department te nen indawr ngai tam tak a awm ka ring a. Chungah te pawh chuan nasa zawkin kan Minister hian tan rawn la sela a tha in ka hria a. Kan hriat theuh angin kan ram thenawm-ah Naga ho chuan horn-bill festival te an nei a, chungah te pawh chuan thil chi hrang hrang an rawn show a. Tin, an rama an thiltihdan te, an vawksa chhum dan thlengin, sap rama an chhum dan tih lam a ni lo, sap lo kal te pawh kha an eitir nawk nawk a. Khatiangte kha a ropuina a ni a, foreign thlengin hei hi a lar em em a ni. Khatiang deuh khan kan department pawh hian hma han la sela tih hi ka sawi duh a. A sum lam hi chu lo tlem deuh mahse, chhang chauh in an nunglo tih ang deuh khan, sum hi a pawimawh viau chungin nasa zawk in tan han la sauh sauh sela a tha ang tih kha kan sawi duh a ni.

Tin, hmun hrang hrangah a hminga kan bial ve ah te pawh thil hriatrengna, lal ropui thlan leh hriatreng tlak chei that ngai te min chei sak a, chutih rual chuan library tha tak tak te kan neih phah a, khangte kha rawn tichhuak zel thei sela a duhawm hle ang tih kha ka'n sawi duh a ni.

Tichuan, Demand No. 6-ah Land Revenue & Settlement-ah hian han sawi ve leh duh ka neih chu, hmasawanna tam tak kan nei tawh a; a hmasate leh tuna kan Minister-in a awp hnu ah te pawh hian Dan tam tak kan in hungna tur te, kan mamawh hrang hrangte tih chhoh zel a ni a, a lawmawm hle in ka hria a. Chutih rual chuan improve na tur, a than zelna tur tam tak a awmin ka hria a, hengah hian fimkhur a ngai hle a. LSC in pek thuah mai mai te tam tak a awm a, hengte pawh hi nasa zawk leh chik zawk, sincere zawka an tih mipuiin kan mamawh a ni tih hi ka'n sawi duh a.

Tin, compensation chungchangah hian anni hi an pawimawh hle a, a hminga kan bial ve tuna World Bank Project-II kan tih te pawh surveyor thenkhatte chuan hmunte an lo in pe leh tawh a, khatiang vel kha a ni a, a vanduaithlak ka ti a. Hetiang hi chhuichhuaha hrem ngai hi chu hrem a tha in ka hria a, Minister pawh hi ka sawipui tawh nghe nghe a ni. Heng hi ram hmelma tak tak a ni tih hi ka'n sawi duh a ni.

Tin, Higher & Technical Education-ah hian ka rin loh tak maiin Demand No. 21-naah hian Shillong Boys Hostel repair-na tur kha a awm ve hlauh mai a, Pu T.T-a te hian han sawi zawk se, anni hi a neitu deuh an ni a. Amaherawhchu, a sawi hmasa ka nih avangin ka'n sawi duh a, a lawmawm hle in ka hria.

Khu khu zirlai rethei zawkte tan a pawimawh khawp mai a. Tin, a cheina hi a awm zen zen lova. Nikum lamahte, kumin lamah te pawh kan biala

mi harsa zualte pawh luh ve theihna turin kan ti a, an warden te pawh ka'n zuk bia a, an harsatzia te pawh an lo sawi let ve leh a, vawiinah a tam thamlo nachungin, kan han dah hrim hrim hi a lawmawm ka ti a. Tin, chutih rual chuan RUSA atangte in sum tam tak a lo kal mek a, a lawmawm ka ti a. Heng thil chi hrang hrang college sakna turte, vocational higher education tih te leh thil chi hrang hrang han en hian a thlamuanthlak ka ti a, chu chu ka'n sawi duh rualin Principal chungchang kha han sawi nawn leh ka duh chu, senior tam tak awmin a in tahtawlin, engtikah nge kan kai ve theih ang tih beiseite pawh tam tak an awm a ni. Hei hi sorkarin a hmalaknaah hian hrethiam taka, phur taka an thawh theuh theihna tur leh naupangten an chhawr tangkai theihna tur atan ngaihtuahna fim tak nen department pawhin a kalpui hi a tul khawp ang tih kha ka'n sawi duh a ni.

Tichuan, kan Minister zahawm tak Pu Lal Thanzara Demand No. 24-na - Health & Family Welfare-ah hian nichinah an sawi tawh a, Health Care Scheme-ah khan, a bik takin thingtlang chengker deuha awm tan chuan thlalatute an kal tha peih lova, a buaithlak duh khawp mai a. Tin, an lakna hmunah pawh hian kan buaina tam tak chu hospital-ah te a lo buaipuitute an lo awm lova, nat hian hun a nei si lova, zanlaih te, zanlai lovah te pawh an kal a ni si a, khatiangah khan buaina tam tak kan tawk a ni tih kha min hriatpuaia department lam pawhin, a Minister pawhin active zawka tan lo la turin ka beisei a.

Tin, kan bialah tun dinhmunah PHC 2(pahnih) lai mai min sak sak dawn a, kan lawm khawp mai a, kan PHC te hi a tlabal em em tawh a, vawiinah tha tak kan nei tur hi kan lawm em em a ni tih ka sawi duh a.

Tichuan, khawthlang bial kan ni a, a bik taka ka sawi nawn leh duh chu Mamit District mai bakah Mizoram-ah pawh ti ila a sual awm love, Malaria vei tamna leh hmun a nih avangin nasa zawka tan min lakpui turin ka duh a.

Hun hmasaah khan Marpara PHC-ah Synod Hospital te nen agreement neiin kan kal chho a, engemaw chen kan kal hnu ah department-in kan la leh ta a. Hengte pawh hi min thuam changtlun sak ula ka duh khawp mai. Helaiiah hian thil buaithlak deuh chu a hnathawkte an awm loh in, Aizawlah an lokal a, thih a hlauhawm si a, 'ka pu, kan thi mai dawn si a, chuvang chuan motor man pawh a ba in kan rawn chho tawp mai,' an rawn tih tawh kha chuan buaithlak tak a ni. Chuvangin khati lai kha min ngaihtuah puin, hmanni lawkah staff nurse pahnih min dah sak a, pakhat min sawn chhuah sak leh tawh a, chungte pawh chu min dah sak leh thei em tih te ka'n request duh a.

Tin, doctor-te pawh dah thei nghe nghe ila a va tha dawn em ka ti a, a bik takin Marpara-ah. Chutiang a nih chuan Marpara te, Silsuri te, Marpara South leh Laisawral thlengin kan chhawr tangkai thei dawn a, chuvang chuan helai hi a pawimawh hle a ni tih kha ka'n sawi leh duh a ni.

Tichuan, Demand No. 26-naah hian - Information & Public Relations hi sorkar tawtawrawtte an ni a, anni hi kan ham tha tawk lo em ni aw a tih theihin ka hria . Vawiinah hian sorkarin achievement tam tak a nei a, puanzar loh leh mipuiin an hriat em em loh hi tam tak a awm a ni. Chungte chu anni hna hi a nih laiin kan chhawr tangkai thiamlo em aw ka ti a. Chutih rual chuan department chhungah stagnation nasa lutuk te, an vah vel zung zungna tur vehicle-te, an dinhmun a chhe hle a ni tih hi tlang hriat a ni a. Chuvangin thuam that hi a pawimawh hle a ni tih kha ka'n sawiduh a.

Tin, Demand No. 48-na Information & Communication Technology-ah khan RIK kha khaw hrang hrangah kan pe a, a chhawr tangkai tur angin kan chhawr tangkai lovin ka hria a. Hei hi kan beiseina leh kan sawina thinah kha chuan anmahni khua atang pawhin birth certificate te, tribal certificate te la thei tawh turin kan beisei a ni a. Khalai tak kha engvangin nge tun thlenga kan lak

hleih theih loh? Enge harsatna kan neih tih kha Minister-in min chhan theih chuan wind up naah min sawi chian sak se a tha in ka ring a. Anni hi an tangkai a, an tangkai tur angin kan chhawr tangkai thiamlo zawk niin ka hria. Khati kha ni mai sela, heng kan demand te hi phur takin ka support a ni e, ka lawm e.

SPEAKER : Dr. K. Beichhua

Dr. K. BEICHHUA : Pu Speaker, ka lawm e. Ka'n sawi zung zung ang a(interruption).... khalai kha chu kan Minister pahnihte hian lawmthu ka sawiah min ngaih sak se. Siamthat ngai lai awm a ka ngaihte ka rawn sawi ang a.

Demand No. 6 - Land Revenue & Settlement Department-ah khan 15th December, 2015-a 'The Mizoram Land Acquisition Rehabilitation and Re-settlement Ordinance' tih kan han nei ta mai kha keini MLA junior te tan chuan a vanneihthlak kan ti dawn nge, kan thil tawn vawikhatna a ni a. He thil hi han en chuan kan a tulh tulh dawn emaw tih tur deuhthaw in hriatthiam a harsa in ka hria a. The Constitution of India kan en chuan President-in tul a tih tawpkhawk hunah, loh theih loh thilah chuan immediate action a la ang a, hei hi a ko ang tih a ni a, six weeks before session tur a ni a. Kan business-ah pawh chutiang tho chuan Governor-in a ti ang tih a awm a, kan hmu theuh a. Hei hi enge hmanhmawh taka koh a ngaihna tak ni ang aw tih kha ka rilru ah a awm ta a, chulai chu kan Minister zahawm tak pawhin min hrilhfiyah se. Tin, chulovah hei hi House in namnul na nge ni a, nge dan tha tak zawk nge ni tih pawh keini junior te chuan kan la hrethiam lova. Kha lai pawh kha min hrilhfiyah atan a tha hle in ka hria a. Tin, kan en ve zel a, ka phak ang tawka kan zir ah chuan pakhatnaah chuan khami regressive reduction solatium kan hmuh tur 100% atanga 30% a tla ta daih ang chi kha explanation a awm mang si loh avang khan ka hrethiam lova. Khang te kha min hrilhfiyah a tha in ka hria a.

Tin, section 41 leh 42 kha omit-a new Act 2015 anga schedule caste leh schedule tribe in kan advantage tur awm ang kha a awm ta lovin ka hria a. Khalai kha kan Minister zahawm tak hian min hrilhfiyah se ka ti bawk a. Tin, Mizoram-in Medical College kan nei dawn a, kan lawm viau va, tunah pawh kan lawm theuh a. Chutih lai chuan Medical College nei tur hian minimum requirement for medical college for 100 admissions, MCI recommendation 1991 amended of 2010 ah chuan medical institution in a campus mamawh hi zau tak a ni. 25 acres minimum a ni ringawt mai a ni. Chumi piah lamah building leh hostel leh lecture hall tih ang neuh neuh ringawt atan pawh khan acres 10 lai a ngai a ni, acres 10 lai kan mamawh ka tihna Pu Speaker. Chutiang kan nih lai chuan ram inpek chungchangte pawh kan Minister zahawm tak khan a rawn sawifiah a. Kha thil kha vanduai thlak ka ti hle a. Thil tha kan nei dawn chauh a, ram hmun leh compensation leh engemaw ah hian kan buai leh thin a ni. Chuvangin, kha lai thil te kha kan Minister hian Chiang zawk in hmanna a rawn sawifiah aia fiah in practical in min tih fiah fel sak se tih kha Pu Speaker, ka ngenna a ni bawk a.

Tin, Pu Speaker, Revenue Department hi department hautak tak, hna harsa pawh tam tak a ni ang tih pawh ka ring. Chulaiyah chuan ram buai, ram in neih thuah tih leh eng eng emaw neuh neuh hi tam tak a awm a. Heng hi tun aia nasa zawkin kan minister zahawm tak hian hma la se tih kha ka sawi duh bawk a.

Demand No.21-na Higher & Technical Education kha ka sawi nghal mai ang a Pu Speaker. Zirna leh thiamna pawimawh zia chu kan vaiin kan hre theuh a. Tun hma chuan ram pawn lamah kan zir deuh vek a ni keini hun thleng pawh khan. Mahse, tunah chuan kan ramah ngei college kalna te kan nei a, a ropui a. Ka rilru hian ka ngaihtuah thin a, mahni ramah ngei hian engtikah nge college te, zirna sang te kan zir ve theih ang tih hi nasa takin a mimal ang pawhin ka lo ngaihtuah thin a. Chutiang a nih lai chuan Aizawl-ah hi chuan heng kan college hrang hrang hian stream hrang hrang kan nei ta a, science te, arts, commerce leh thil dang dang te pawh kan nei ta a. District lam hi ngaihtuah ta ila, admission a hun ah hian bialtu MLA te hi dik tak chuan kan lu a hai

thin a ni. Example ah Saiha khi sawi ta ila, tun hmaa science leh commerce stream awm thin kha lak chhuah a ni tawh a. Tun ah khian arts chauh khi kan nei a, zirlai 500 rual vel kan nei a ni. Chutiang chuan, a building dinhmun te pawh hmanni ah khar in a awm a, pawisa pek zawh loh vang a ni tih ang chi te a ni in ka hria a, khang te pawh kha kan Minister hmalakna in tunah chuan an hawng veleh tawh in ka hria a. A bill te pawh kha min pek zawh sak thei se, sum a tam zia chu budget atangin kan hmu a. Tun ah chuan, 'a awm lo tih chuan a awm reng alawm, min ngaihtuah loh vang a ni,' ti thei tur dinhmun ah kan awm in ka hria a. Chuvang chuan, khilai kan harsatna neuh neuh te khi science stream leh commerce stream hi khawngaih takin min dah let sak leh thei se tih kha ka ngenna a ni bawk a ni.

Tin, kum 2012-ah khan heng technical student ho in a stipend leh book grant an lak thin kha tihtawp a ni ta hmiah mai a. Kha kha vanduai thlak ka ti a. Zirlai tam tak, a bik takin technical-ah hi chuan lehkhabu man te a to a, a hautak a. Heng ah hian harsa te te a zir tam tak an awm ngei ang, chungte tan chuan stipend leh book grant ah hian kan zir lai pawhin kan inngat nasa a ni. Chuvangin, hei hi khawngaih takin kan Minister zahawm tak hian chhonzawm leh hram se tih ka ngen bawk a. Tin, Pu Speaker, sorkar hian naupangin scholarship an dawn tur ang chi hi chu a hun te ah pe thei zel ta se, zirlai naupang te kawng zawh tir zawh tir hi khua te hi a lum ang reng si a, a hrisel ber lem lova. A hun taka min pek sak theih chuan kha kha a lawmawm hle in ka hre bawk a ni.

Demand No.24-ah ka lut nghal mai ang a, hun a tlem si a ka sawi zung zung ang a. Health and Family Welfare budget hi kan en chuan a hraw viau mai a. Chutih lai chuan ka sawi fo tawh thin kan ram hi hriselna kawng ah chuan Pu Speaker, India ram state hrang hrang zing ah hian model state in kan siam thei a ni tih hi waviin thleng hian ka dinna a ni. Chutiang a nih avang chuan sorkarin chutiang kawnga ke a pen hun tur hi a nghahhlehawm ka ti a. Tunah pawh chak takin ke a pen chho a, mahse duhthusam ang chu kan la thleng thei lova. Kan Health Care delivery-ah hian preventive

leh promotive-ah hian kan in concentrate leh zual a ngaiin ka hria a. Heng curative-ah kan in concentrate lo ve, kan in concentrate e ka tihna ni lovin, a pawimawh rual rual hian kan dam loh hma hian a ven hna leh a zirtir hna hi nasa taka kan thawh a ngai niin ka hria a ni. Chutiang dinhmun ah chuan kan awm a, cancer te pawh vei tam ber kan nihna lai te pawh kan sawi chamchi a. Chung te avang chuan helam ah hian nasa takin hma la ila tih kha a pawimawh in ka hria a.

Tin, hmanna question ka siam 2006-ah MPSC conduct a ni a, 2013-ah doctor 88 lak an ni. Khang doctor 88 kum 7 dana lak ho kha an senior ho lo pension ta thup se, 88 khan Director, Jt. Director dinhmun han in chuh ta se an va han buai dawn tak em tih min ngaihtuah tir a ni. Chumi avang chuan a ruala 88 kan lak ho kha an chung chiah ho an pension hun ah chuan seniority leh nihna an in chuhna lamah mipui hian kan va tuar dawn em tih kha ngaihtuahna min siam tir a. Khatiang kha chu repeat tawh loh ni se, nichina kan Minister zahawm takin a sawi ang khan 5 lak tur a tih ang deuh khan kum 1-ah a dang kan lak theih loh pawhin 5 te tal hi la thei ila lawmawm hle in ka hria a ni.

Tin, nurse te pawh post vacant 220 chuang a awm a, wawiinah hian Civil Hospital-ah va kal ta ila, nurse leh patient ratio saw a inthlau viau in ka ring a ni. Nichina an rawn sawi ngei ortho-ah khum 30 a awm a, nurse 1 chiah a awm tih te pawh kan hria ang. Chuvangin, nurse vacant post te pawh hi a rang lama fill-up theih ni se Pu Speaker, lawmawm viau dawn in ka hria a ni.

Tin, Pu Speaker, district lam hi kan ngaihthah chuan Aizawl hi kan hah ang a, district lam hi heng kan basic diagnostic equipment ang chi leh thil dang kan mamawh ang ang te hian thum tha ila, Aizawl-a kan work load hi 60% -ah a tla ngei ang tih hi hmuchiang tu ka ni in ka hria a. Chuvang chuan a hla ber hi han sawi tel ila, Saiha ah khian endoscope te, ultrasound ang chi te khi MBBS pangngai hian thla 6 train in an ti thei vek a ni. Chu chu train chhuak hi kan nei lova, tunah chuan khawl te khi en theih loh vin a awm ta ringawt a, a pawimawh si a, chutiang tura saw lai atanga

helai rawn thlen chuan an let leh lam nen chuan sing chuang a ni daih mai a ni, min ngaih pawimawh sak se ka ti khawp mai.

Tin, nichina an sawi ang khan Lunglei saw chhim lam tan chuan kan Referral Hospital a ni tlat mai a ni, vawiin thlenga ICU pakhat pawh neih loh chu a pawh hle in ka hria a ni. Chuvangin private hospital tam tak ah pawh ICU an neih theih chuan sorkar chak tak hian engatinge Lunglei-ah sawn ICU pathum pali tal chu a neih theih loh le tih hi ka ngaihdan a ni. Kan Minister hian hma min lak sak se, Lawngtlai te, Saiha te min rawn tih sak theih loh pawhin.

Pu Speaker, Aizawl Hospital ah hian cabin kan nei a, mihausa leh officer lian deuh te chu cabin-ah kan awm thin a ni. Cabin awm man saw ₹400 atangin ₹600 -a up a ni a, saw saw chu sawisel tur chi pawh niin ka hre lova tunlai pawisa hlutna tla hniam zel ah hian. Mahse injection man te, dressing man te, engkim mai saw private nen danglamna a awm tlat lo mai a ni. Chuvangin kan Minister zahawm tak hian sawlai saw min lo enchian sak sela, fel deuh hleka kan kal a tha awm mang e, smart card enjoy ang chi kha chu thil dang ni se. Officer pawh nise MR-ah khan a rawn reflect leh dawn a ni. Chuvangin sawlai saw Chiang deuh hleka min en sak a min siam that sak pawimawh hle in ka hria a ni.

Tin, Medical College kan nei dawn a, a lawmawm hle mai a, state-in huaisen takin za a za ke pen turin a in puahchah tawh bawk a. Tuna kan dinhmunah sawn engah nge 1st year hi kuminah kan tan tawh mai loh, MCA in min rawn en sak tawh chuan? 1st year-ah chuan subject thum chauh a ni dawn a, chu chu thla 18 chhung a ni dawn a ni. Thla 18 chhung chuan kan in prepare ang a, another thla 18 atan chuan kan in ruahman thei mai lawng maw? Chuvang chuan engatinge kuminah first session seat 100 tan huaisen taka kan tan mai loh? Huaisen kan in ti bawk a, huaisen takin ke pen law law ila, kumin atangin

admission hi i tan law law mai ang u tih rawtna Pu Speaker, ka siam bawk a ni.

Pu LALRUATKIMA : Pu Speaker, ka lawm e. Kan Minister te pahnih demand vawiina sawiho theihna kan nei hi lawmawm hlein ka hria a, a demand-ah khan lut nghal zar zar mai ila.

Demand No.6-na Land Revenue & Settlement Department ah khan Land Revenue laws kan nei a, ama'rawhchu he House zahawm takah pawh hian kan sawi thin a, tax a sang lutuk a, in hmun lo ram chhiah hi enthat theih ni se ka ti a, 1st April, 2016 atanga tihhniam tur order te kan han hmu a, a lawmawm hlein ka hria a ni. Chutihlai chuan ordinance, nidanga kan la hmuh ngai loh kan han hmu rup mai a, ama'rawhchu ordinance kal hmang, India constitution 213 leh Rules of Procedure 75 & 76 en hi chuan kan hmuh hun kha a dik thei lo a ni. Kan hmu tlai lutuk a, ordinance hi December-ah a chhuak a, keini chuan Session koh hnu ah kan hmu chauh a ni. Chuvang chuan he ordiance hi kan Minister zahawm tak hian helai hi chu enthat ngaiin ka hria a. Legislator te kan ni a, Assembly session kan neih leh hun inkarah enge hetiang a tih tul hna hmanhmawh thlak hi awm tih hi ka ngaihtuahnaah chuan a awm a. Chuvangin legislator-te inpalzutna ang chi hi chu tih fo loh atan a tha khawp mai. Chutih karah kan hmu har em em mai lehngal hi a pawh thu chu ka'n sawi nawn leh ni sela.

Tin, Pu Speaker, kan Minister zahawm tak khan ni 21.3.2016 khan Referral chungchang kha a rawn sawi a, hei hi thil awm dan dik tak a ni a. Pu Speaker, i phalnain khawngaihni helai te hi nakinah demand i sawi hunah i chhang mai dawn nia min tih avangin i phalnain ka'n chhiar zawk ang e. "State Referral Hospital hi vantlang ram leh mimal ram engemaw zat lakhawmin Govt. letter no. (chhiar lo mai ila) 6.10.2000 angin land lease no. DLP 45 of 2000 pek an ni a. Chumi hnu ah chuan mimal ram engemawzat VC kal tlangin tlawmngaia

ram pek belh tura ngen an nih hnu ah tawngkain sorkar hnate inpek ni se tiin inremin hreh tak chungin VC kaltlang hian sorkar ngenna tihhlawhtlin a ni a. Chumi hnu ah chuan teh that leh a lo ni ta a, Referral Hospital cum Medical College at Falkawn Mizoram hmingin sorkar lehkha ni 25.8.2014 land lease no. 07 of 2014 pek a lo ni ta a ni. Land lease kum 2000-a pek a nih khan Pu Lalrinchhana Falkawn hi Referral Hospital ram chhungah a awm a, he ram hi ni 21.32016- a kan Minister zahawm takin a survey pawhin, an teh lai hian hospital hian land lease an lo neih tawh avangin June 2013-a Referral Hospital ram teh that leh a nih khan hospital ram chu sat hekin Pu Lalrinchhana, VC member khatih laia Congress Unit hruaitu ni bawk te tan hian pek ngei a ni tih chu Minister statement khan a tichiang a.

Nikum ni 9.7.2013 NOC pawh Health Department Secretary khan a ziah thu kan Minister khan a sawi a nih kha. Referral hospital ram hi mimal leh vantlang mi tlawnggai ten ram hmasawanna tur a ni tih hriain compensation bei tham tak pe a neih a ni a. Chutah chuan sorkar leh VC te pawh tawngkaa inremna angin VC ten an insawn chhuahna tur ram pe se chutah chuan sorkarin pawisa pe bawk sela. An intunnun nan sorkar hna nghet post khat theuh pe turin tawngkain an inrem nghe nghe a ni. Pu Lalrinchhana te pawh hian kum 2000 khan a pa Pu Lianpuia hmingin ₹ 2,04,830/- compensation pawh hemi atan hian an la tawh nghe nghe a ni. An lakna list pawh ka kawl nghe nghe a ni. Tunah hian in hmun an pek a hi an tiral tawh nghe nghe a ni.

Chuvang chuan helai ram inpek chungchangah hian note sheet-ah pawh Health Department-in an land lease atanga an pek chhuah tak avangin teh sak an ni ta a, chuan a pass ngeiah pawh hian Pu Speaker, a history ti hian a inziak a, 'he hmun hi Health Department-in an pek LSC siam sak an ni,' a ti thlap a ni. Chuvangin Health Department-in an pe ngei a ni tih hi chu pass

pawh hian a tichiang a ni, chu chu kan sawi ni sela. Chuvang chuan a Demand pawh hi han pass pui a huphurhawm khawp mai.

Tichuan helaiah hian (Speaker: a copy kha i dah a ngai ang)Speaker hnenah ka lo pe ang.

Demand dangah ka'n kal ang a, 21-naah hian NIT Mizorama thil thleng kha kan hriain ka ring a, a pawh khawp mai a, chutih lai chuan NIT hi India ram zirna tha a nihna angin kan hmang tangkai tawk lova a pawh khawp mai a. Hemi bakah hian Mizoram Women Polytechnic-ah hian drop out a sang khawp mai a. An subject a fuh lo nge heti lai hi chu enfiah a tul khawpin ka ring a ni. Tin, central service-ah te, service hrang hrangah Mizote kan tling tlem khawp mai a, chuvangin Education loan te, overseas scholarship / stipend ang chi te kha pek leh theih ni se kan zirnite hnenah hian a that ka ring a ni.

Tin, Art & Culture-ah hian public library tihchangtlun hi a tha hlein ka hria a. Tin, Chapchar Kut result kha kan hria a, tun ang zela kan kal a nih chuan kan kohhran te pawh hian min support lo mai ang tih te pawh hi ka hlau khawp mai a, kan inenlet a tul a.

Vanapa Hall erawh chu Pu Speaker, maintain a tul khawp mai, a thutnaah kan han thu a, inbukna a chuang ang mai kan ni a, kan inbuk luau luau mai a. Kan ke te keini ang palian tan pawh khai vu vu a ngai mai a, lei pawh kan rap pha mang lo a ni. Chuvang chuan helai hi chu ngaihtuah chian a ngai khawp mai. Ka'n kal zar zar ang e.

Tin, Demand No.12-na Parliamentary Affairs Department-ah hian kan Deputy Chief Whip zahawm tak hian Discretionary Fund pawh a neilo niin ka lo hria a, hengte hi ngaihtuah sak theih a ni ang em? Tin, Consultative Committee hi department

changtu Minister-teah hian thenkhat hi chu kan thu khat deuh ni te pawhin ka hria a. Chungte chu ka sawi tel duh a. Pu Speaker, ka hmanhmawh deuh hlek a.

Tin, Demand No.24-na Health & Family Welfare-ah khan hei Drug Control Act hi neih hlan kan nghakhlel khawp mai a, kan nei dawn hnai ni te pawhin a lang a, amaherawhchu hmanhmawh a tul khawp mai a. Chutih lai chuan food adulteration hi 'Burma Things' an tih mai Burma atangin China siam eitur chi hrang hrang a rawn chhuk a, naupang lamin an uar a. Heng ang chi hi kan pumin a tuar thei a, chuvang chuan ngaihtuahna kan hman chhoh zel a tulin ka hria.

Tin, Society leh Mission-ah te Fund kan transfer chak lova, MSACS ah thisen bag man kan han la a. Amaherawhchu, chutih lai chuan MSACS te an targetted intervention ho pawisa tur kan hreng rei lutuk te hi chu a fel lo khawpin ka hria. Health & Family Welfare Department hi damlo enkawltu an ni a, a dama te hi kan enkawl thiam lo nge, tan kan lak a ngai khawpin ka hria a.

Pu Speaker, ka zawhna pawh tun thlengin a rawn chhuak miah lova vawiin zing hian, a chhuak lo hlen dawn tihna a ni mai a, unstarred-ah min lehsak vek dawn tihna a ni a. Chu chu ka han sawi duh chu, nikum hmasaah pawh khan motor lian an lei tawh a ni, motor lian panga an lei tawh a, vawiin thleng pawh hian an la dawng lo nia mawle Pu Speaker, a zahthlak khawp mai. Khawiah nge kha pawisa kha a awm? A interest engzatnge? Engatinge tun thlenga motor lei tawh si la dawn loh tih hi ngaihtuahna a kal thui khawp mai a, eirukna lian tak a awm nge, enge ni tih hi hriat a tul.

Sawi tur neuh neuh a tam a kan sawi vek senglo ang a, kan department hi a nuihzatthlak angreng khawp mai a Pu Speaker. Kawng lehlamah chuan driver tura lak motor khalh thiamlo te pawh kan nei a ni awm asin le! Khatiang te kha kan ni a, kan chhangchhe ve deuh hlek a. Driver tura lak chuan motor a khalh thiam turah ka ngai a, professional driver an ni turah ka ngai baw a, chuti a nih loh chuan an phurh te tan an

motor khalhah chuan ngam a ni dawn lo a ni. Chung thleng chuan inenlet hi an mamawh tak zetin ka hria a.

Tin, ka bial chhungah Pu Speaker, Directorate building a awm a, motor kan han ti jam thin si a. Tin, chutih lai chuan Dawrpui Vengthar Sub-Centre khu a chung a inhlip deuh tituai mai, a rangva pakhat chu a thlawk a ni a. Khungte khu tihthat ran theih ni se a lawmawmin ka ring a.

Hei damdawiah Health Department-ah hian kan cheng reilo thei lova, chutah chuan damdawiin kan han nei a, District Hospital tih tlak pawh kan nei lo a ni te pawh kan han ti a, tan kan lak zual a ngai khawp mai a. Chutah chuan doctor kan neih loh piah lamah, damdawi awm lo tih te sub-centre lam chhanna a ni thin si a. (SPEAKER: Hun i hmang zo) Chutih lai chuan Pu Speaker, damdawiin berah damdawi a awm lova, chuti a nih si chuan kan damdawiin chu damdawiin pawh ni lovin damlo in ni awm zawk tak a ni. Damdawiin tihtlak pawh nilo khawpin damlo in nihna chen a awm a, chuvang chuan tan kan lak tlan a tul a. A lawmawm khawp mai a, kha ka hun kha min eisak zeuh zeuh avangin.... **(Pu LALSAWTA, MINISTER : Pu Speaker,** khawngaihin ka intervene hreh viau na a, member ten an sawi hi a pawimawh vek mai a, helai mi chauh lo pawh mi tam takin an lo ngaithla a. Driver motor khalhthiam lo tih te kha a sawi khan khami chinah khan a tawp ta mai a, a lo thlirtu tan chuan a dikah a ngaihloh theih loh a. A hming leh khawiah nge a thawh tih a sawifiah si loh chuan, hemi chin chauh lo ngaithla tan chuan sorkar department tawp tak kha a ni dawn tlat mai a. Chuvangin member zahawm tak khan khang kha sawifiah law law se, Minister tan pawh nakinah sawi ve duh pawh a nei maithei a, khalai te kha kan sawi lawk a ni.) A lawmawm khawp mai a, kha ka hun kha min eisak zeuh zeuh avangin minute 4, minute 5 vel chu han pel ta ila khawngaihin. Amaherawhchu, Minister zahawm tak te mawhphurhna a ni a, official te pawhin an hriain ka hria hei hi chu. A thawh mekna hmun pawh ka hre vek a, a hmaa a thawhna pawh ka hre vek tho a. Chuvang chuan a thawktute, a enkawltute khan an hre vek a ni. Chuvang chuan driver tura lak motor khalh

thiam lo leh learner license chauh nei chi kha sorkar a lak kha a rem lo in ka hria. Chuvang chuan kan inenlet kha a tul a ni ka ti a ni.

Pu Speaker, Demand No. 48-naah hian I.T. Act hi kan inzirtir a tul khawp mai a. Whatsapp te, social media te kan hmang nasa a, thudik tawk lo vawrhdarh tam tak a awm a ni. Tan kan lak a tul tak zet zetin ka hria. MLA te ngei pawh hi kan Minister zahawm tak hian eptu MLA-te tel vena IT training kha min buatsaih sak thei tawh lawm ni, i vei lam ami te tel hian tih kha Chair kaltlangin ka ngen duh a.

Tin, ka vei em em chu service provider ten an duh ang angin min bawlkual vel emaw chu tih mai turin fakna leh thil chi hrang hrang a tam khawp mai a, kan bill te pawh a sang thei khawp mai a. Chutiang chuan service provider te nen pawh hian mipui harsatna hi sawiho fo se a thain ka ring.

A tawp berah chuan Pu Speaker, tawngkam khat lek in, Higher & Technical Education-ah hian RUSA kha ka sawi nawn leh duh a, RUSA hi a pawimawh tak zetin ka hria a. Kan zirna tihhmasawanna tur a nih avangin. Chuvang chuan RUSA hmangte pawh hian infrastucture development kan college te pawh hian an neih ngei ka ring a, ka beisei tlat a. Chutihlai chuan NEC te, NLCPR atang ten fund kan han hmu a, kan college building sak rei lutuk te hi a beidawnthlak rum rumin ka hria. Ka bial chhung ngeiah pawh khuan Aizawl West College an sa a, a rei tawh khawp mai a, college sak avangin traffic jam te pawh kan tawng nasa a, khungte khu min enzui sak se a thain ka hria a, chungte chu Pu Speaker, ka sawi a ni e. Ka lawm e.

Pu T.T.ZOTHANSANGA : Pu Speaker, tawite rawn sawi ve ka duh a. Kan opposition ho hi an khat thei khawp mai a, kei pawh ka hriat zawng zawng sawi ka tum lai te kha ka rilru ah hian a awm a. Keini lamah hi chuan han sawi tehchiam tur hi a awm lohna chin a awm a. Ruling ah hi chuan kan Minister hote nen hian kan sawi ho deuh mai thin avang hian a tam zawk hi helaia han au chhuahpui vak vak tur hi a tam lem lo a.

Chuti chung chuan helaia kan sawi duh chu Health & Family Welfare chungchangah hian kan Minister zahawm tak in Rabung-ah damdawiin min pek dawn avangin lawmthu ka sawi a, tunah hian sak that turin ruahmanna a awm mek a ni.

Tin, kan session hmasa khan Rabung-ah doctor kan neih loh avangin harsatna kan tawk tih ka sawi a, Rabunga dah tur in nei a nih chuanrawn thehlut la, kan lo dah dawn nia a ti a. Vanneihthlak takin Rabung khaw mi doctor thiam tak mai kan nei a, doctor minrawn pek avangin lawmthu ka sawi tel duh bawk a. Tin, kan bial khi a chengker hlawm khawp mai a, rinai hian Health Worker hi kan mamawh hnem khawp mai. Kan session hmasa ah tho khan Tualpui-ah kan nei lova, ‘Tualpui tlangval thiam tak kan nei e,’ tiin session-ah khan ka sawi a, ‘E,rawn dil ula, kan lo dah mai ang chu’ a ti a, tichuan min lo pe leh bawk a, lawmthu ka sawi tel bawk a ni.

Health Worker hi kan mamawh hnem khawp mai a, hmeichhia leh mipa khawtinah khian dah an ngai si a. Tunah khian hmun thenkhata kan buaina ah chuan mipa chauh an awm a, a lo thingtlang si a, mipa in nau an chhar dawn hian an ngam tlat lo mai a ni. Thingtlangah hi chuan Health Worker hmeichhia hi hmun tinah nei thei ila tih kha kan duhtusam a ni. Tin, Health Worker tun hnaiah kan la dawn niin ka hria a, ka lawm khawp mai a. Nichina kan member zahawm tak Pu P.C. Zoram Sangliana khan aiawh intirh theih ni sela, aiawh kal theih ni se tih te kha a sawi ri deuh thuk thuk a. Mahse, Health chungchangah hi chuan aikal lak hi a tha em aw tih ka ngaihtuah a, ka rilru zawkah chuan thingtlang ami te hi weightage pe ta zawk ila, appointment an hmuh hnu thla hnih thla thum vela Aizawlarawn in sawn tum lem lo, thingtlang ami ngei hi an awm a nih chuan anmahni awmna khua ami, in sawn dil dil lo tur hi kan lakluh a tul tih ngaituahna min hmanpui se ka duh a. A chhan chu hmun tam takah kan bialah hna anrawn hmu a, reilote ah insawn an dil a, biak that tur an hre si a, an lo thiam bawk si a, an in sawn zung zung mai a. A dik tak chuan Minister te tan pawh hian ninawm kan chang a ni. Kan bial mipui ten an mamawh miao si a, thil ti thei tak tak an lo tling leh si a, fair competition kan tih hi a fair lo kan ti a ni keini chuan.

SSA-te pawh han sawi mai ila, a hun a ni lo na a. Zirtirtu kan neih lohna ah chuan special teacher kha tlemte hlawhin an rawn appoint mai a. Kha kha thingtlang chuan kan duh em em mai a ni. Chutiang chuan Health Sub – Centre-a thawk tur pawh hian Health Worker hi a khaw mite an awm a nih chuan mark 10 te emaw kha weightage han pe leh ta ila, (kan term hmasaa kan Education Minister in zirtirtu kan lak a 10% weightage a pek ang deuh khan), chu chuan min siam tha thui khawp in ka ring a, chu chu ka rilru ah a awm a. A khaw mi ngei an awm chuan min duhsak hram rawh u ka ti a ni.

Tin, Malaria lam atangin thosilen kan sem thin a, ka hriat sual loh chuan bial tin a inang deuh hlekin an chawh rualin ka hria a, kan han dil tam deuh dawn pawhin, ‘ruahmanna inang tlang deuhin kan ti,’ an ti deuh thin a. Malaria tamna area hi chu chhinchhiah deuh a ngai a ni. Keini bial te khi chu Tiau dungte a ni a, phai leilet a tam si a, khitiangah khian kan mamawh hnem si a, Aizawl North te nen angkhata min pek chuan buaithlak deuh tur a ni a. Chuvangin a prone area deuh hlek kha min thlirpui a, thosilen sem ah pawh khan min duhsak kha ka duh a ni.

Tin, Champhai Hospital chungchangah kan Minister te nen kan sawi tam a, thil tam tak ka sawi lo ang. Amaherawhchu, sawi duh pahnih khat ka neih erwah chu tunlai khawvelah accident te a tam tawh a, Ortho lam specialist hi kan mamawh a ni. Ruh lam specialist hi kan mamawh khawp mai a. Tin, chubakah naupang doctor khi kan mamawh bawh a, naupang doctor leh Ortho hi min pe se chuan kan mamawh zawng zawng chu kan nei hauh lo na in, dam khat chuan kan dam in ka ring, chu lai te chu min lo chhinchhiah sak hram se ka duh a.

A pumpui thu ah nurse kan indaih lova, Health Worker kan indaih lova, office lama kan sawi tawhte kan ring tawh mai ang a, ka sawi thui lovang a. Ka’n sawi tel leh hram duh chu NEIHGRIMS, Shillong ami tho, nichin khan kan thianten an rawn sawi tawh a. Kei pawh nikum hmasaa ka zu kalin Cardiology-a an Department head nen

darkar hnih dawn lai kan inkawm a. India ram hmun dang zawng zawnga an tih theih zawng zawng chu kan tithei vek a ni an ti tawp mai a ni.

Tin, department dangah pawh an changlung khawp mai. An tlem si a, a hnai si a. Mizo tan tlang ram a lo ni bawk si a, a harsa bawk si lova. Khulaia in refer tam dan khu ngaihtuah teh ang u tih kha ka rawn sawi duh bawk a.

Tin, doctor seniority chungchangah khan kan member Pu Beichhua khan an Director hunah seniority a buaithlak awm mang e a ti a. Mahse, kha kha chu kan buai lutuk lo turah ka'n ngai a. Kan la sorkar zui zel turah ka'n ngai a. Tun tum chu kan opposition ho in vannei tihna deuh mai ka nei a. Kum 5 dang an han opposition leh chuan thil hi an hrechiang dawn khawpin ka hria a.

Tin, Department nuh ti za tih kha chu a fel lo ka ti a. Eng Department mah hi nuh ti za a awm hian ka hre lo. Health Department hian kan nuh a lo tiza a nih chuan kum 10 vel atanga lo intan tawh kha a niin ka ring. A chhan chu toilet van 20 cheng nuai 126-a kan han lei laite kha nui duh tan chuan nuhna tham a ni. Tin, thingtlang hospital-a hman tur cheng nuai 281 kha Aizawl Civil Hospital-ah te kan han bel sak mai a. Khatih hun lai khan thingtlang mite kha min hmusit a ni kan ti thin a ni. Mahse, thingtlang mite kan nuh a za lo a ni.

Tin, chubakah Bajaj Alliance-a sum tih te, dam lo der in rawih chawp han tih zawng zawngte kha rilruah hian a awm a. Chuvangin eng department mah hian nuh an tiza hran lova. Kan duhthusam loh an nih pawhin tlang takin sawi mai ila. Ama'rawhchu, fiamthu rawng kai deuh a hetianza in tih hi a tha lovin ka hria. Mizote zingah hei hi kan rorelna pui berah kan ngai a. Kan tawngkam pawh hi kan fimkhur hram hram a tha in ka hria. Nakin lawka sorkar ve mai tur an ni a, Home Minister te, Health Minister te pawh an la ni maithei. Khatiang hunah khan tuna an thusawi hi an hre let em em ang tih kha ka rilruah a awm a. (tam tak chu lo peng duh an awm alawm,

helama an lo kal hunah an sawrkar hun ah, thenkhat te chu sawm ila puan pawh an la hman nang)

Tin, Pu Speaker, Higher & Technical chungchangah khan tlem sawi duh ka neih chu, vanneithlak takin Champhai-ah khian Mizorama College tha berte zing ami kan Chief Minister min phurpuina avangin kan nei thei a. Khi khi hawn kan chak tawh khawp mai a. Chu chu Higher ho khan min lo nawrpui dawn nge ka hre lova. Crore 9.51-a kan sak khi electrification tunah kan la ti lova, khimi avang khian kan la hawng thei lova. Ama'rawhchu, kan College pangngai a chhiat tawh em avangin practical-in a building te chu a theih ang ang kan lo luah ringawt tawh mai a ni. Electrification bak ah han tuai hnum tur tam tak a la awm a. Khi khi min tih ran sak thei se kan lawm khawp ang tih kha ka'n sawi duh a.

Tin, zirtirtu lam hi ka ngai pawimawh khawp mai. Education hi mihring insiamthatna tak tak, nakina kan ram hruaina hna nakin lawka la enkawltu turte kan enkawl chhohna a ni a. Kan ram rohlu ber, human resource development a ni a. Kan fate pawh hetah sikul tha ber berah kan thiam ang tawk tawkin kan enkawl chho a. Nursery level atangin Primary-ah, Middle-ah, High Sikul ah kan theihtawpin kan han tichhuak chho a. Amarawhchu, an thiamna tak tak leh an hmawrbawkna college level-ah zirtirtu tha kan neih loh chuan a buaithlak a ni. Bul tan tha hle mah ila a tawpa kan zuih si chuan a buaithlak tlat. Dik chiah chuan sawi ila hna kan han la a, SSA zirtirtu te, RMSA zirtirtu te kan han la dawn a, M.A te, B.A te an tam lutuk, a zahthlak a ni. Ka bialah chuan M.A in SSA zirtirtu hna a rawn dil vaih chuan ka hau mai zel a, "in tum a hniam lutuk" te hi ka ti a. Mahse kawng lehlamah chuan college-ah hian zirtirtu hi kan lo nei tha lo em a, competition hi an lo ti ngam lo aniang a! tih te hi ka ngaihtuah leh hnuhnawh a. Chuvangin kan nau college zirlaite hi ka khawngaih a ni. Tunah hian eng stream-ah mah mah khian Mizorama college chu ka hrechiang lo, ka hriatchian chhunah chuan Champhai-ah hian kan indaih lo khawp mai a. Hetiang indaih lohna puhruk tur hian hlawh tlem deuh tal, sing hnih khat hlawh tal pawhin kan hotute khan min han

ruahman sak sela ka duh a. Zirtirtute hmanhmawh phelengin an awm a, training-in an kal reng a, an buai reng mai bawk si a. Chutih lai karah zirlaiten an dawn tur ang an dawng si lova. Kan infuihna berah chuan, 'zirtirtute leh zirlaite hian kan ram awm dan zel turah hian college chhungah hian ruahmanna in siam a ni, kan ram awm dan zel tur hi in duang a ni,' kan ti thin a. Kha an duanna kawngah khan zirtirtute an indaih lohna hi kan tuar dawn. Chuvang chuan kei chu human resource hi ka ngai pawimawh a. Kan fa te hneh taka kan zirtir na na na chuan kan ram pawh hi tunah kan duhthusamin awm lo mah sela a la dam hrim hrim ang.

A tawp berah chuan Pu Speaker, Art & Culture te han sawi ka chak a, mahse tam tak ka sawi lovang a. Vawiinah hian kan Demand hrang hrangte kan han sawi hi a lawmawm ka ti a. Art & Culture bikah chuan ka'n sawi duh chu originality lai tak mai hi khawi hmunah pawh maintain hram hram dan hi zawng ila tha ka ti a. Kan hmun pawimawh kan tih te pawh a then chuan motor kawnga laih tlang hram hi kan tum thin a. Motor kawng lai tlang lovin km 1, km chanve tal hi chu kea kal ngai hi ni vek sela ka ti a, chu chu tawite in ka'n sawi leh a ni. Kan Minister pahnihte demand hi lawm takin ka rawn support e.

Pu VANLALZAWMA : Pu Speaker, ka lawm e. Sawi tur tam tak ka nei lova. A chhan chu kan member ten an sawi tha em em a, an sawi kha bengvarthlak tak tak leh a demand neitute pawhin an rawn ngaih pawimawh tur hlawm niin ka hria a.

A hmasa bera ka'n sawi duh chu, Demand No. 21-na, Higher & Technical Education Department-ah khan kan college te hi Principal nghet nei hi kan awm reng reng lova. Tin, Directorate lamte pawh charge la hian kan kal nasa lutuk a, Higher Education-ah hian. Hei hi tunah hian kan sorkar hian theihtawp chhuahin hma a la tih chu ka hria a. Amarawhchu, Principal tur atana Recruitment Rules an siam dan hi thian ten min hrilh hlawm a, Mizo tan chuan an duh dan, an rawn tih dan hi a buaithlak khawp mai, tih hi an sawi a ni. A chhan chu Mizoram chu kan society kalphungte kan hre vek a,

Ph.D pawh ni tehreng ila, publication han tih zui vak vak hi kan lo ti hleitheih reng reng lo mai a. Chutia publication te a that loh em em lai chuan kawng lehlama ngaihtuah chuan kohhran lama kan ruihhlo dona te, khawtlang tana tlawmngai pawla rawng kan lo bawlna te hi administrative power a awm hunah hian a lo tangkai em em mai hi a lo nia. Experience tha em em mai hi kan lo zirchhuak vek mai a. Chutih mek lai chuan UGC leh khu lam in an han tih chuan chutiang khatiang chuan international journal-ah chumi khami chu a publish tawh tur a ni, state level journal, national level-ah tih te kha an ngaihtuahna ah a awm thin a. Mahse chutiang chu Mizoramah kan tih hleihtheih loh a nih rualin chutiang ti hleitheih lo Principal atana tling si ho kha mifel tak tak, khawtlang pawhin kan chung en leh zir laite pawhin an chhoh en tur mihring hi kan ngah em em a ni. Khangho luh theihna tur ah khan keimahni state chhunga sorkar college chhunga Principal tur leh a dang dang tur atan khan dah thiam ve hi thain ka hria a. Tuna kan neih mek ah hian Mizo nilo an lo lut teuh theih tih hi kan hotu thenkhatin min hrilh a. Chu chu Higher Education Department lam pawh hian ngaih pawimawh ah nei ta ila. Mizorama quality nei tam tak hi khulamin an hriatthiam chuan an pawmpui viau zel a ni. Point khat lek, college-a ka thawh ve lai khan NSS Programme Officer hi ka ni ve a. Tahchuan, IIT Kharakpur-ah Programme Officer training hi orientation training course-in ka zu kal ve a. Chuta ka zu hmuhchian em em chu, zir lai ten lehkha an zir ang a. Anmahni tan theihtawpin an zir a, an kal zel hunah midang te tan an service ve hunah khan midang te hrethiam takin an service theih tur a ni.

NSS hi kan hre vek a. An motto pawh 'Not me but you' tih kha a ni. NSS-a kan training laia min zirtir zawng zawng kha midang te tana rawngbawlna hi a ni vek a ni. Chuvangin khulamin Principal a an duh tam tak hi society a kan in hmanna ah te, mipui tana kan inhmanna ah te hian kha qualification kha kan lo achieve vek a ni. Kan ngaihtuahna hi zau zawkin hmanng ta ila. Mizote mamawhna hi a siam theihin ka ring a, chu chu ka sawi zau pah duh a ni.

Tin, education qualification kan sawi lai hian Mizoram University kan neih te , College kan neih te central sorkar ta chu a ni tih mai mai. Mahse, state sorkar hi hei aia nasa leh zual hian a inrawlh theih a ni, kan tih tur pawh a ni. He state ta hi a ni , kan ram leh hnam tana din hi a ni a. Nakinah Vety a ni emaw, Horticulture college te pawh kan la nei dawn a, MZU ang deuh hi. Kan ram tana lo dahchhuah milin keimahni tan remchanga kan lo hman te pawh a tul a ni. Chumi tur chuan kan hotute pawhin ngaihtuahna hman a tulin ka hria a. Nichinah member te pawh khan an rawn kai zawk a. Mobile service provider kan tih ang te pawh hian kan ram mamawh dan azirin an ti ve tur a ni. Heng ah hian in rawlh a kan va intahluh ve hi kan sorkar tih tur a ni. Central subject a ni a, inthlahrun ngawt tur a ni lo tih hi ka sawi duh a. Chumi tur chuan kan hotuten ngaihtuahna an hman a thain ka hria a. Chu chu duhtawk mai ila.

Demand No. 12 Parliamentary Affairs Department-a ka sawi duh pakhat leh chu, a hminga MLA chu, kum 2 kal ta velah khan Consultative Committee member ah min rawn vuah thluah mai a ni. Ka hriat sual loh chuan kohna ka hmuh loh vang nge ni, Consultative Committee-a ka tel vena ho hi an la ko reng reng lo mai a. A committee dintu pawh kan Parliamentary Affairs Minister a ni a, a chairman chu minister te an ni a, committee an koh loh pawhin Parliamentary Affairs Minister khan a va tur tur a ni dawn lawm ni? Hei hi enge a awmzia ka hrethiam lo ang reng a. Minister te nen an chanpual, an department chanpual han sawi te pawh kha a chakawm ve reng reng a, ram tan leh mahni tui zawng a lo nih phei chuan. Parliamentary Affairs Minister khan Pu Speaker, a wind up-naah min sawi sak se tih kha ka sawi duh a.

Tin, Health Department-ah khan han kal ta ila. An sawi teuh tawh a. Hmanni deuh Civil Hospital tihtet tih zawhna ah khan tihtet na a awm lo, a ngaiin kan kal dawn, Consultative Committee tih changtlunna ah chuan, tih a sawi a. Chutih mek lai chuan February ni 2, 2016-a Civil Hospital-a khum 200 atana tihna order/notification hi tih danglam a awm em aw, tih hi ka zawt pah ni sela. Nakinah wind up hunah min chhang se. Kan ti te a nih loh chuan Civil Hospital sawn khum 300 an kalpui mek kha a

ni a. Khum 200 awmna order / notification kha chhuah a ni a. ‘Cancel a ni, tihtet a ni lo,’ tih kha kan Health Minister khan a sawi tawhin ka hria a. He House-ah hian a sawi tawhin ka hria a. Chu chu ka sawi leh duh a.

Hmanniah pawh ka sawi zawk tawh a, Health Care Scheme kan tih, smart card kan tih te kha a hmang te 40% vel an lo ni a, 60% velin an hmang lo. Chutih mek lai chuan hmannia kan sawi zawk ang khan a mamawh te smart card lo siam tir loh, register loh a ni fo mai a. Hengho hi chawpchilh deuh taka tih theih dan hi a la awm em? Campaign kan neih tha tawh loh nge ni hemi ti tur hian tih nachang hre lo ho hi chuan an ti leh chuang kher lo maithei a. Chung avang chuan kan dam loh khan a hminga MLA te min han pur leh lo thei bawh si lova. Pu Speaker, i ding lam ami te pawh khan an tawh ve chu ka ring a. Chutah chuan chawpchilh deuha han tih pawhin a tih dan, a nachang pawh lo hre lo, mamawh si, dam lo si ho te tih dan kha a awm thei em tih te kha vawiinniah sawilan ka duh a. Inzirtir inzirtir mah ila, YMA mic-ah pawh puang puang mah ila, V/C te pawhin khawtlangah puang puang pawh ni ila, ngaihsak lo khan an awm hle hle dawn. Khawvel kalphung te pawh hi a ni deuh em aw, ka ti a. Chuvang chuan an dam loh takah khan an lo thlen a, kan tih a ngai si, a buaithlak khawp mai. Chuvangchuan chawpchilh taka special package ang deuhin, special case ang deuha tih theih dan a awm em tih kha ka sawi duh a.

Tin, ICT lam kha tlem ka sawi duh leh bawh a. Hei hi a pawimawh khawp mai a. Tunlai khawvelah hian he lampang hi kan vei chho nasa a, chuvang chuan kan invawn zel loh chuan khawvel hi kan um pha lo viau mai dawnin a lang a. Chutih mek laia tihngaihna hriat si loh, kan vaia kan vei tlan engtinngge tih kan hriat loh hian Mizo te hian mobile hman man hi kan seng hnem lutuk em aw, a bikin thalai te, a hman hi a lo nuam si a. Engtin chuan kan ti dawn ni maw? sorkar order ang hian tih chi hi a ni dawn pawhin ka hre lova. Hei hi engtia tih tur nge ka hre thiam reng reng lova, helai-a pawisa lut hnem lutuk lai hi engtinngge maw kan tih dawn, vei tlang ila eng tia tih tur nge ni? Tul loah chuan hmanglo ila kan ti dawn nge ka hrethiam chiah lova. Engpawhnisela a

tangkaina lamah a tangkai ropui si a, kan hmang tangkai a, engemaw chen ah kan thatpui bawk a, heng social media te pawh, a nih loh chuan kan hmang hian min ti khawlo nasa lutuk hi engtinngge ni ang aw tih hi ka ngaihtuah thin a. Tumkhat thingtlang kan kal tum in nghawngkawl te reuhte nalh deuh hi min lo present a, a khaw hming chu sawi kherlo ila, kan Education Minister zahawm tak bial lam khi a nia. Kei chuan ngaihtuah mang hleilo hian ‘nghawngkawl chu in phur ngai tawh bik lo ang a’, kan tih ngawt a. Mahse, ‘e, kan la phur nasa lutuk,’ an ti a, chutih mek lai chuan MP fund min dilna lehkha chu computer hian nalh em em hian an lo chhu thlap mai a. Chu, nghawngkawl leh computer kha kan pawh zawm roh a, Mizoramah hian a khawi-amah kha kan la dah thei si lova, khalai kha har em em hi a awm a ni, chunglai te chu engtia han tih tur nge ka hre thiam lova. Amaherawhchu helam ICT lamah hian sum leh pai dah hnem ila, inzirtir dan te pawh a awm ang a, a tangkai zawnga hman dan te pawh a awm ang a, in zirtir tam ni ta se. Tunah hi chuan kan hman uar ngaihtuah hian a tangkai zawng aiin ho mai mai ah, fiamthu engemaw mai mai ah leh engemaw thil belhchian dawl manglo theh darh na atante hian kan hmang nasa a. Heng hi ngaih pawimawh a tul mang e tih kha Pu Speaker, ka’n sawi duh a. A dang kha chu sawi tur tam tak la awm bawk mahsela ka sawi tawhlo mai ang a, a chhan chu nichinah kan member zahawm tak tak ten an sawi teuh tawh a, kha hun min han pe a, ka’n sawi ve nual a, khang kha ka sawi theih tawk ni mai teh se. Ka lawm e.

S P E A K E R : Awle, kan sawihona chu duh tawk tawh mai ila a tha ang e. Tunah hian kan Minister zahawm tak Pu R. Romawia wind up turin kan sawm ang a, clarification ngaite a sawi fiah ang a, chumi zawhah chuan a demand hrang hrangte passrawn dil nghal tawh mai sela a tha ang e. Tunah i sawm tawh mai ang.

Pu R. ROMAWIA, MINISTER : Pu Speaker, minute 10 maw khaikhawm nan min pek a, khaikhawm nan a van chep deuh awm ve. Awle, Pu Speaker, ka demand hrang hrang pali vawiinah hian kan sawi hova, thahnemngai takin member 18 lain ka demand chante rawn lamri in thahnemngaihna ri kan ngaithla a, a lawmawm hlein ka

hria a. Kha duh khawp lohna te pawh a lo lang a, mahse heng te pawh hi thil tha zawk beisei leh duh vang ni maiin ka hria a. Sum harsat kan hre tlang a, sum lampang harsa e ti lo chuan ka sawi duh pakhat chu sum harsat leh mirethei leh mihausa kar a kak zau tawlh tawlh kan tih lai hian, kohhran thawhlawm hi a tam tawlh tawlh mai si lai hi kan ram chu chhui chian chu a ngai mang e aw! ‘Sorkarin sum a nei lova, bazar nuho pawhin engmah an hralh thei lo,’ kan tih luai luai lai hian engatinge kohhran thawhlawm hi a pun zel mai theih aw tih te ka ngaihtuahna ah a awm a.

Engpawhnise kan sawi dan chu kan sawi dan ni ta sela, sorkar ah department dang duhthawhna lam te pawh hi sum lam indaih lohna avang te pawh a ni bawk thin a ni tih te pawh kha kan hriat a thain ka hria a. A demand zawng pawh hian rawn tih tehchiam pawh ka tum lova.

Demand No 12-na PAD kha member 2 khan in rawn sawi a, Consultative Committee chungchang kha PAD lam hian kan initiate chu a ni ngei a, mahse Speaker te phalna ah member te an awm double lohna atan thil kal a ni a. Department te hian Consultative Committee kan nei thliah thliah a, chu chu kan mamawh huna kan MLA te ko khawm a sawiho tur a ni a. Heng te hi Department changtu lam pawhin ngai pawimawh tlang thei sela thil lawmawm tak a ni in ka hria a. Tin, chulovah chuan kan Govt. Deputy Chief Whip hi discretionary fund kha kan lo ti lova, a pawh hle a. Amaherawhchu hei hi dan anga pass ngai emaw kan ti a, kan Assembly Secretariat lamin ‘Cabinet-in rem tih a hetiang a in tih te chuan a tawh mai alawm,’ an ti a. Chuvangin Parliamentary Secretary te kan tih ang zul khan tih kan tum mek a ni tih kha kan sawi duh a ni.

Tin, Demand No. 21-Higher & Technical Education Department chungchangah hian MZU campus chungchang hi Lunglei District lam, chhim lamah awm tura tih kha a ni a. Keini pawhin kan nghakhlel em em a, Mizoram University pawh hian theihtawp chuan a buaipui ve chuan kan hria a, mahse UGC lam tur a nih

avang hian vawiin thlengin kan beisei angin a la hlawhtling lova. Tin, NIT buaina chungchang House-a member tam tak ten in han sawi kha kei chuan ka hriat vawi khat-na a lo ni a. Engpawhnise central lam deuh tak an nih avang hian keini Higher and Technical nen pawh hian kan in zen zawm vak lo in ka hria a, an harsatna pawh hi kan hnen lamah hian an rawn sawi bawk lova. Keini pawh in an quota atang hian, 'kan naute hi lo dah lut ve rawh u,' pawh hi kan ti chuanglo in ka hria. Khatiang vel khan in connect lo deuh hian kan awm a. Engpawhnise hetiang riva a lo awm takah chuan kan ram interest leh kan zirilaite interest a nih avangin naktuk lamah hian kan Director te pawh han leng sela. Thil awm dan an tih te pawh kha han bengvar ve sela, thil kan tih theih awm te a awm chuan kan ti ve ang kan ti a ni.

Tin, Polytechnic hi kan rualawt hle a, general line a BA, MA mithiam kan neih teuh ai pawh hian heng eizawna tinzawn lam hi kan ram mamawh nia kan hriat tlan a ni a. District 8-ah khan Polytechnic lam din theihna turte an rawn tih avang khan kan hotute an lawm em em a. Chutiang chuan kan neih tawhsa bak ah District la neih lohnaah hian Polytechnic kha din ni se ti khan ministry hmasa ah khan phur taka hma lak ani a. Central lamin pawisa min rawn pek ang ang kha infrastructure build-up na tur kha a ni a, a teaching staff lam kha a tel lova. Tichuan Kolasib District lam tan Thingdawl-ah building sak zawh tawh a ni a. Champhai District lam tan Tlangsam-ah sak zawh tawh a ni a. Mamit-ah sak zawh thawthang a ni a. Tin Chhiahtlang lam Serchhip District-ah khan sak tan tum mek a ni a, engemaw neuh neuh avangin kan la tan mai thei lova, Saiha lamah pawh engemaw ram chungchangah harsatna deuh hlek a awm avang in kan la tan mai theilo deuh a. Chutiang chuan hengte pawh hi luah theih thuai kan nghakhlel hle a. Nichina member zahawm tak Tuirial bialtu in a rawn sawiah khan ka rilruah thil lo lang zawk a awm a. Building an sa zo va, electric wiring leh thil engkimte pawh an ti tawh ta a, a chhe leh vek tawh tih te han ngaihthlak khanin ka rilru a rum hle a ni. Kan hnam hi thil tha tichhe tura piang emaw kan nih le tih ka rilru ah a lo awm a. Kan thalaite hi thil chhia ti turin nu leh pa ten an hrin emaw ni le? Kan Kristianna leh kan hnam zia hi ngaihtuah a va ngai em Tunge mawhphur ? Keini member 40 te chauh hi em ni ang? A

bak kan Kohhran zawng zawng leh Mizoram nu leh pa zawng zawngte pawh hi kan mawhphurhna a va lian dawn em tih kha ka ngaihtuahna-ah a awm a. Chutiang chuan building te pawh hi kan luah nghal vat loh chuan tihchhiat a lo ni mai hi a pawh em em thin a. Chutiang chuan hei pawh hi hmalak tum mek a ni a, hawn theih hlan kan nghakhlel hle a. Sum a harsa hle chung khan kumin chho te hi chuan Champhai lam leh Kolasib te hi chu kan tih theih ang ang chuan tan te pawh kan la tum ve mek a ni.

Tin, college building chhia leh hostel chungchangte pawh kha, kan college te hi a dik takin hmun awm leh awm lo-ah rual awhna avangin Aizawl khawpuiah chuan kan han din a ni a. Tin, khuti lamah sum zuk beisei dawn in detailed project report a lo ngai a, chutah chuan ram neih a lo ngai a. Chung avang chuan harsatna tam tak hi kan tawh a. Hmun kan neih chhunah te rual kan awh avangin college te pawh hi kan han din ve tawp a ni a. A building te pawh hi naupang tam zawk han lawi nan te a tawh lo em em a. Chuti chungin theih ang tawh khan hma kan han la ve tang tang zel a. Tin, hostel te pawh hi a pawimawh em em a. Girls hostel leh boys hostel atan te pawh a ram kan neih phawt chuan sum engemaw zat zuk ngen theih a ni a. Chutiangah te chuan hma chu kan sawn chho ve hret hret zel a ni.

Tin, college Principal chungchang sawi kha a awm a. UGC norms angin 2010 a UGC in India ram college hrang hrang quality education tur atana a rawn zam kha keini ram pawhin kan han zawm ve a. Amaherawhchu, a thenah chuan relaxation tih loh theih a ni lova. A thenah kum 62-a pension tur kha kum 60-a pension tura relax a ngai a. Tin, eng eng emaw pawh relaxation kha kan han tih ve a ngai ang a. Mahse, chuti chungin quality education a nih avang hian Ph.D leh mithiamte ngei hian institution hi UGC in a tih ang hian khai se ti a rualawhna thilah M.A pawh an ni ang a, an fel zawk daih maithei. Ama'rawhchu, education lamah chuan hei hi a pawimawh ve a. Chuvangin, Ph.D ngei, Doctorate Degree ngei kha kan han ti a. Ama'rawhchu, chutah pawh chuan thil kal tlang tur tam tak a la awm tho a. Vawiin thlenga kan han advertise na-ah chuan, (MPSC lak tur kha a ni a) kan hotuten in hlauhthawn ang kha chuan

Mizoram pawn lam ami chu diltu kan nei lovin ka hria a. Chutiang chuan a diltu-ho pawh tihfel theih loh tlem kan la neih avang khan MPSC ten min rawn zawt let leh a. Keini department khan Finance lam ah te, DP&AR lam ah te chinfel loh tlem kan nei a. Hei pawh hi chinfel thuai kan beisei a. Chuvangin, UGC norms in a phut ang tak mai leh khang ang te kan han hmuh khan Principal nghet kan neih chuan quality education lamah te, discipline leh kawng hrang hrangah hmasawna kan inbeisei a. Dik takin tuna kan kalphung mekah chuan a senior apiangte kan ti lem lo. Minister tan chuan nuam deuh a ni, ka ngaih mawh zawng zawng kha ka va dah thei ang hial a ni zawk a.

Tuna kan dah dan hi Ad-hoc Principal tih a ni a, mahse, hei hi a fel lo em em mai a ni. Chuvangin, chutiang chu ni se kan tih mai mai ang chi te hi a tha lova. Mi an qualification in a tlin leh a efficiency in tawng ngei te hi an tha a. Chuvangin, tunah hian kan Principal te hi adhoc Principal mai an ni a, a nghet nei kan ni lova, a nghet chu college pathum ah emaw chauh kan nei a. Chu chu provincialise kan nih lai atanga Principal ni tura kan chhawm luhte kha an ni a. Saiha te, Khawzawl te kha khatiang kha a ni mai a. Chutiang lo chu a dang hi chu (Pu K.SANGTHUAMA : Pu Speaker, Principal chungchang sawi lai khan MPSC-ah khan Mizo tawng pawl ruk standard te an thiam tur a ni tih kha a awm khan ka hria a. Kha kha min hrilhfiah nghal thei se a lawmawm ang.) Kan ti hran lova, UGCS norms-ah khan Principal hi kum nga atan a ni ta hrim hrim a. Kum nga chhungah khan ram pawn lama ei hmu ve tho tham kha chu an rawn ti a, kum nga term tawp a kir leh tur ang te khan. Diltu chu kan nei rih lova. (Pu K.SANGTHUAMA : Pu Speaker, a Principal nikher lo ah pawh khan Mizoram sorkar ah hna dil tur tan chuan pawl ruk standard tal Mizotawng an thiam tur a ni tih kha a awm a. Chu chu a nia ka'n zawh ni, kha kha ziakin a awm a.) Heti laiah an thawhna ram ami te nena relation an neih theih nan leh engemaw atan kha chuan a ngai maithei a. Tin, chu chu a awm lo a nih pawhin thiam tir ngei tulna lai tak pawh a awm a. a vang chu, kan Assembly House ngeiah te pawh Mizotawng ngei kan hman avangin, heti laia kan officer pawimawh lo thu ve te pawh.....(Pu K.SANGTHUAMA : Pu Speaker, khawngaihin Judicial Officer lak dawn pawh khan rei tak inhnia na a awm avang khan khu lam khan

an pawm thei lawk lova. Mahse, khami kha pawm thei tura in tih tak avang khan, an pawm tak avang khan, Judiciary) Chu chu a dik thei a. Chuvang chuan UGC norms khan kan kal tawp phawt mai a ni. UGC kha kan adopt tawh a, kan adopt chin khan kan kal tawh a ni. Ama'rawhchu, tuna i rawn sawi kha chu thil pawimawh ni a ngaihna a lo awm chuan, khami bikah khan Mizoram sorkar-ah relaxation kan va dil leh a, khami RR kha kan siam leh te te a ngai dawn a ni. Chuvangin, tunah chuan UGC in a rawn tih ang ang khan kan kal phawt lo thei lova. UGC in a rawn tih angin kan kal ang a, mahse, nakinah chuan tuna i hlauhthawn ang khan hlauhthawwna te kan nei a nih chuan tunah erawh chuan ka sawi tawh ang khan hlauhthawwna kan nei hran lova, hlauhthawnawm tur te a awm a nih chuan Mizoram sorkar ah bawk, Cabinet-ah bawk relaxation kan dil leh ang a, RR pawh kan la duang leh mai tur a ni a, tunah chuan R.R. awmsa UGC ami ang khan kan kal phawt ang. (Pu VANLALZAWMA : Pu Speaker, vawi khat lawk, hlawh kha UGC in a tih ang chiah Principal kha kan pe thei dawn em ?) Le, chu chu College leh Principal chungchang chu ni sela, stipend leh book grant kha hmannah khan kan inchhang fel viau tawh emaw ka ti a, '2012 ah daih tawh khan stipend leh book grant hi sum harsat avang khan kan ti hleithe tawh lova,' ti khan kan sawi tawh a, kan chhang tawh a. Chutah chuan vawiin thleng khan a la ni zel a. NEC lam atang hian book grant leh stipend hi a lo kal ve ta thung tho si a, chuvang chuan keini kan ti hleithe ta lo a ni a.

Tin, scholarship hrim hrim te pawh hi Ministry of Tribal Affairs leh Ministry of Minority leh NEC atangin a lo thleng a, a lo thlen hian naupang hian a lo thlen ni hian an hre mai thin a. Mahse, sorkar kalphung/procedure a awm a, kar hnih vel te, kar thum laiah te pawh Finance lam in min handover te a ngai thin a. Chutiang chuan keini pawhin kan han nawr char char thin a. Tlai lo thei ang bera han sem te kan tum a, chutiang chu kan kalphung a ni a. Hengah te pawh hian kan sorkar in a do let tur thil te pawh a awm a.

Tin, Higher & Technical-ah kha chuan hmasawn mekna kawng RUSA chungchangah te pawh, sum kan harsat em avangin kal tluang turin RUSA kan beisei a, kan beisei angin thil a awm mai lova, tunah chuan a rawn lang det det a. Central-ah sorkarna a inthlak a, kan sawi fo angin sorkar hmasa thiltih te an chhonzawm dawn nge dawn lo tih kha kan chiang lova, 'Su' tih beisei khan 'Se' kan ti mai awm mang e kan ti a, hlauthawng takin kan thlir a. Amaherawhchu, tunah chuan engemawchen sum an rawn dah lut ve ta a. A zel tur kha kan hrethei lo naa tun dinhmunah chuan RUSA lam chuan Higher Education lama kan tlakhniamna kha min rawn tuamhlawm thei ve deuh turah kan ngai a. Amaherawhchu, a tir atang pawha kan beisei ber, dingdihlipa kan lo thlir ber RMSA-ah te pawh High School-ah zirtirtu indaihlo lutukah te chuan zirtirtu pek belhna te emaw an nei ang khan zirtirtu hi regulara lak tur a ni a. Contract a lak mai tur emaw in kan sorkarin sum kan neih loh avanga part time thleng pawh a kan lak loh theih loh avang khan hetianga RUSA lamin sum te min rawn pek theih chuan, chung chuan zirtirtute pawh kan lak belh ve ang a, kan indaih phah deuh ang kan tih kha. Khatilaia field staff tana sum rawn siam kha vawiin thlengin min la rawn tih sak thei lova. Mahse, kan bei a la dawng chuang lova, kan la dil ve zel a ni. Chutiang te a nih chuan zirtirtu indaihlo em em te kha kan phuhruk theih kan beisei a, chu chu tuna kan dinhmun a ni a. Le,tilaiah hian kan chhinchhiah a, kan lo en zel ang a, a zavai pawhin ka rawn ti vek lo maithei a.

Tin, Art & Culture chungchangah khan tunah hian Archeological Survey of India-in Tripura leh Mizoram bial turin Aizawl-ah Circle Office rawn hawn an tum a, a tir lamah an hmun turte kan hmuh sak hma chuan Aizawla Art & Culture Office chung lamah thawktute kan dah mai ang a. Tin, kan Museum saw kan la hawng thei lova, sawtilaiah chuan kan member te duhthusam ang hmun ualau zau tawk kha a ni thei lo reng reng a. New Capital Complex-ah sawn kawngthlangah a awm a, pawisa nuai 80 vel kan la mamawh avangin kan la insawn thei lova. Sum kan nei dawnin kan hria a. Tuna khiti lam High School tlang lama Mc Donald Hill lama kan han dah mai khi, khi khi chu engemaw hun chhung mai atan khan a ni e.

Tin, kan Mizote kut pui ber (Mizo in kut pui pathum kan nei a, Chapchar Kut leh Mim Kut leh Pawl Kut kan nei a, a pathum chuan kan hmang hlei thei lova). Chapchar Kut, kut ropui ber, inremna kut, mi zawng zawng hlim taka awm na tur kut a ni a. Chutiangah chuan mi zawng zawng hlimna kut ropui ber Chapchar Kut hi chu hmang thei hram hram ila kan han ti a. Kan duh dan chu Mizo taka hman hi a ni. Mizo takin vai lam thiam emaw, sap lam thiam emaw, Korea lam thiam emaw mamawh kan inti lova, Mizo taka hman hi kan duh mai a ni. Chuvangin mi hip tur ang ringawt a, tute emaw tourist hip tur ang ringawt kha chu kan rilruah a awm lo a ni. Mizo takin kan awm ang a, kan Mizo zia dik tak kan lantir kha min rawn hmu duh ve an awm a nih chuan min rawn hmu ve mai rawh se. Min hmu duh lo a nih chuan a pawl chuang lo. Mizo kan awm a, Mizo takin kan kal mawp mawp mai ang tih kha tuna kan thu rolum deuh a nih pawhin tih mai tur.

Amaherawhchu, Tourism Department lamin sum tam tak kan nei a, central lam atangin Tourism tihhmasawna turin sum tam tak an rawn pe thin a. Chung chu tam tak an rawn pekah chuan tourist attraction zawng pawhin engpawh an ti ang a, sap lam emaw, Korean lam emaw, a mihlim lam pawhin engpawh an show tawh ang a. Kha kha erawhchu a huap vek tawh a ni. Keini erawh chuan Mizo takin, Mizo ze dik taka, kan tlem emaw, kan tam emaw hman mai hi kan la tum dan a ni a. Nakinah ngaihtuahna thar a awm a nih erawh chuan chu chu kan sawi thei lova, chungte chu ka'n sawi duh a.

Tin, kan puan mawi tak taka zeh lamah te pawh hian Hmar-am te Kawppui zik zial tih te, Sakei zang zia tih te, Disul tih ang neuh neuhah pawh hian geographical indication, khang te patent-ship kan tih mai ang chu kan han bei ve a, mahse, rin aiin a lo awlai bik vak lova. Tunah hian kan han bei chho ve mek a, hlawhtlin thuai kan inbeisei a, mahse, kan beisei lai tak ang kha chu kan ti thei rih lo ang a. A vang chu, rin aiin thil hmuh chhuah patent ship hi (miin damdawi an hmuchhuak a, thuruk kha a lo nia) thuruk engemaw te avang khan a hmuchhuak tu te hi

a lo ngai reuh a. Kan Kawppui zik zial te pawh hi a hmuchhuaktu tih te pawh kha a lo ngai a, tichuan a hmuchhuak tu, Disul hmuchhuak tu tih vel kha rin ai khan a buaithlak ve a, eng eng emaw vel kha han ngaihtuaktu vel a lo ngai thin a. Hma kan la la ve ngar ngar a ni tih kha ka'n sawi duh a.

Tin, hla hlui leh a thluk te record mumal tak tih kha ka beng a verh khawp mai, kha kha a tha ka ti khawp mai a. Er. Lalrinawma rawn sawi kha. Engpawhnise sawtilaiah 'Kut pui kan ur' kan han ti bung bung a. Mahse, kan nau te/kan thangtharte chuan an hre tawh reng reng lo a ni. Hei hi eng zai ber nge tih kha an hre miah tawh lova. Heng ang a zaithiam te hi a record mumal tak kawl a, chumi zai, chumi zai tih kha a ngai a. A vang chu hmanlai chuan 'Zai' an ti a, 'zai' khan thluk a keng nghal vek a ni. Awithangpa zai tih chuan Awithangpa chuan a thluk a ni ber zawk a, Lalvunga zai chuan a thluk kha a keng a. Tunlaiah erawh chuan a solfa atanga hla a ni tawh a, hla zawng zawng khan thluk hrang hrang a nei ta chauh zawk a. Hmanlai chuan zai pakhat khan hla tam tak a keng ta a, a thluk intawm khan hla tam tak a piang tihna a nih chu. Khang kha humhalh dan ngaihtuah chu a tha khawp mai. Amaherawhchu, pi pu tuikhur kan in mai ang tih chu hlauhawm tak a ni, kristian kan nih tawh hnu ah hian.

Tin, Rajaram Mohan Roy Library Foundation atanga sum min rawn pek hmanga theih ang anga YMA library an han sa ve thliah thliah te hi khaw hrang hrangah an lo lawm thiam em em a. Keini department pawhin nuam kan ti a, nuai 6 kha a limit a ni mai a. Nuai 6 te khan an han sa a, chuta tangin library lam thil tur lehkhabu a lo nih pawh in uluk takin hnam nun chawm tur te, kan nun chawm tur te ngaihtuah in kan sum neih tlem te te in kan han lei a. Chu chu YMA Library hrang hrangah te kan han pe leh diat diat a. Khatiang kha kan kalphung a ni a. Amaherawhchu, a sum tlem ngaihtuah in Zoram dung leh vangah hna a thawk nasa a, lawmawm kan ti hle a. Hengte pawh hi sum tam zawk neih theih ni se, kan sorkar ngei pawh hi kan dinhmun tha se chuan hengah hian min han support thei pheih se chuan hma han zauh te pawh hi a chakawm khawp a. Chung hun chu Tuirial te kan han khuap tling ang a, kan leihnuai hausakna te kan han

laichhuak ve tawh ang a. Tahchuan kutdawh kan nih loh hunah chuan kan hma a la eng duak duak ang tih kha kan beisei a ni. Mahse, chu chu a rei tawh lovang, a ngaihna hria ten hetilai Chair an luah chhung hi chuan hun ropui kha a herchhuak thuai ang tih kan beisei tlat a ni.

Tin, Land Revenue kha a ni lah tak a, Land Revenue hi a hlu khawp a. Ro pahnih a awm an ti a, lak sawn theih leh lak sawn theih loh ro. Lak sawn theih ro chu tangka te, motor te a ni mai a. Lak sawn theih loh ro chu leilung nena into zawm lei hi a ni mai a. ‘Lei hi Lalpa, i thilthlawn pek hmasa a ni’, tih hla phuahtu in a tih ang kha a ni a. Pathian thilthlawnpek ropui a ni a, a hlu khawp mai. Chuvangin, ram hlutna hi kan hre tawlh tawlh a. Hnam a changkang tawlh tawlh a, ram hlutna kan hre tawlh tawlh a. Sum kang thei, sum bo thei aiin ram kha sum bo thei lo, sum nghet a ni tih hi kan hrechiang ta tawlh tawlh a, ram inchuh te a na in ram duhamna te a nasa em em a. Tunah chuan thubuaiah kan la in la leih leih a ni a, nakin lawkah chuan kan in thah hnemna ber tur a nih hi ka ring tlat a ni. A vang chu rambuai lai khan jail-ah kan tang a, kum 20 tang ho kha kawrtial ha ho kan ti mai a. ‘E, thianpa, engnge i tan ve chhan le?’ han tih kha chuan an thin a ur mai a ni. ‘Ka pa fa ka ni lo em ni? Mipa ka ni lo em ni?’ an ti mai a. ‘E, khaih khaih, thianpa, chuti zawngin kan zawt lo che. Hei, keini chu Mizoram a buai a, hetiang hian kan rawn tang lut a. Nangni hetilaia lo awm hmasa engnge in tan ve chhan ni le, kan ti mai a ni,’ tih chuan ‘Ka pu atanga kan ram, ka pa atang kan ram, engahnge min rawn chuh. Chuvangin, ka pa fa ka ni lo em ni ? Mipa ka ni lo em ni?’ an ti mai a ni. Ram inchuh a inthah kha a lo tam ber a ni. Tun thleng pawh in Mizoramah chuan thikthu a inthahna a tam deuh ber a. Khungah chuan ram a pung tawh si lo va, mihring an pung si a. Ram kha an nunna nena in zawm tlat a nih kha an chiang em em a. Ram an neih loh chuan ei an nei dawn lo, riltamin an thi dawn a ni. Chuvang chuan, ram hlutna an hriatchian em em tawh avangin ram inchuh kha an inthahna ber a nih chu. Tunah pawh hian Mizoram pawh hian kan hnaih mek a ni, kan her dik loh chuan. Ram enkawl dan hi kan tih dik loh chuan kan hnaih mek a ni. Vawiiinah pawh Revenue Department-in thubuai 100 chuang lai kan nei a ni. Hengte pawh tam takah chuan Revenue min khinna

te a ni a. Anmahni leh anmahni an la in khin lai kha chuan engpawh a ni a. High Court-ah te thubuai a awm a, hetilai Court hniam zawkah te a awm a ni. Chuvangin tunge ti dik lo, a kaikuang zuk zawn chhuah kha thil har tak a ni tawh thin a. A pawimawh ber erawh chu kan duham vang a ni, kan kristian loh vang. 'He lei hi ka in a ni lo, thlaler hrehawm a ni, ti si a,' he leia ro nghet siam kan tum vang a ni mai a. Kan kristian na ah pawh kan nghet lo va, kan pi leh pu ziaah pawh kan nghet lo va. Chuvangin, khatiang kha kan tawng a ni mai a, a paw em em a ni.

Hetilaiah hian Pu Speaker, sawina remchangah, (sawi rei min ti ang tih chu ka hlau hle na a) hei hi ka sawi duh tlat a ni. Heta Speaker ka nih lai ka hun hnuhnung berah khan, ram zau tak tak nei, min an retheih luat avanga ram an rawn lei tir che u ang te kha. Nangni chu dinhmun tha zawkah ram neitu chu in la awm fan a. Chuvangin, in ram hmun 3 a then a hmun 1 tal emaw kha khatilaia in va leisak, wawiin a ram nei ta lo, rethei te te te hnenah khan in pe kir leh phal lom ni ? Kan ram hian jubilee hi kan puang thei dawn lom ni ? ka tih kha. Israel faten jubilee an puang a, kum 60 a lo nih chuan an ram lo hawh tawh zawng zawng an in pe kir vek a. Ram thut chhan in an thu far a, mahni thiam ang ang in an ram atangin ei an dap chho a ni. Chutiang chuan, Mizo fate pawh hian jubilee kan puang thei dawn lom ni ti khan, a zavai vai ni lovin. Harsat luat avanga ram an va zawrh, an fapa nupui neih dawn, an fanu pasal neih dawn emaw, an pa lungphun dawn emaw avanga an va zawrh a te kha. Khami te ai kha chuan a leitu na na na kha chu a la khawsa thei zawk a. Chuvangin, ram kha kan in pe let leh thei dawn lawm ni, jubilee kan puang thei dawn lawm ni, tiin thinlung takin Chair atang khan ka sawi a ni. Chu chu Pu Speaker, ka dinhmun a la pangngai reng. Ram hi Lalpa ta a ni. Chuvangin, ram hi a pian belh tawh si lo a, mihring kan pun belh si a. Ram hi Lalpa ta a ni a, ram hi chiahpum emaw khehpum emaw, sum siam na atana hman mai mai hi Lalpa thinurna a ni. Lalpa mit naute khawih na a ni. Chuvangin, veng tinah pawh kal chiah ula, in veng ram hralh hnem ber ber te kha, 'ram a hralh hnem bawk a, an dingchhuak tawh khawp mai', tih tur an awm miah lovang, Lalpa'n a awih lo. Chuvangin, ram hralh hralh te kha kan in hralh hausa tak tak lo, an chhungkua an hlim

tak tak chuang lo. Leilung kha kan zavaia kan chan ho tura kan tana Lalpan a thilthlawn pek a ni a. Ram chu Lalpa ta a ni. Chuvangin, ram hralh hralh a, thawkrimlo-a ti te (tam tak chuan kan Revenue surveyor te pawh hi in sawi, a dik ang) chu, an tana pawh mai a ni, khang kha. Ram tan a pawh aimahin anmahni tan a pawh a ni. ‘Engmah lova sum hmuh chu engmah lovah hman ral a ni’ a kan Bible-in a ti a ni. Chuvangin, hetilaiah tu ram emaw tu hmingin emaw an inpe a, an inpe zel a, an inpe zel a lo nih pawhin kha kha hralhsumah an hmang a, cheng singli singnga an lo nei a, ‘Engmah lova sum hmuh chu engmah lovah a ral’ Bible-in a ti. Chuvangchuan ei loh loh tur an ei a, in loh loh tur an in a, fate puitlin hman lovin, pension nghak hman lovin an liam zung zung mai a ni. Liam chhan chu engpawh ni se BP sang pawh a ni thei, thi a luak pawh a ni thei, zunthlum pawh a ni thei, engpawh ni selangin pension nghak thleng lovin an liam zung zung a ni. Drugs ti chi chu thlah nei hman lovin an liam a, zu ti chi chu fa te puitlin hman lovin an liam tih evangelist Vanlalngjakan a sawi kha a takin kan tawng reng tawh a ni. Chuvangin, rama duham te hi Lalpa mitnaute khawihna a ni a. Engpawhnise, compensation-a duham vak vak te pawh hi a tul lo tih te pawh hi kan hriat a thain ka hria a. Zoram mipuite hnenah he ka thil vei em em sawina remchang ka neih avangin Pu Speaker, ka lawm khawp mai.

Pass inthuah tih te pawh hi kan department hotute fel tawh loh vang te pawh a ni ang a, inthuah reng tura an tih chu ka ring miah lova, tihpalh a nih ka ring a. Heng te pawh hi kan danah chuan a ram nei hmasatu a lal tur a nih avangin chutilaiah chuan a transfer-na te kan inzawnsak leh thin a ni a. Tin, chutiang zel chuan kan land value te pawh hi..(pulpit tlang emaw kan ti tawh mai a nih hi, pulpit aiin a pulpit zawk)

Engpawhnise, border fencing chungchang hi Home lam tih deuh daih kha a ni a, keini Revenue erawh chu ram va ti fel tur khan min han ti ve khan ka hria a. Kan member zahawm tak pawh kha theih ang tawh chuan Revenue atang chuan tan kan han lakpui a, mahse kori tuk a har khawp mai a, central lam atanga policy rawn kal chho kha a ni a.

Tin, tunhma atanga ram inpe kha tunah chuan nichina kan member zahawm takten an sawi ang khan ram chungchangah pawh hian kan fel ve hret hret tawh a, khawl kan nei tha ve tawh a. Tunhma kha chuan hemi leh chumi feet chuti a nih hi, metre chuti a nih hi tih mai mai te kha a lo awm thin a. Tunah a takin an han teh tawh a uluk taka kan han teh khan ram kha a boundary kan sawi kha pangngai mah se a area kha a lo inang lo fo tawh thin a. Chutah chuan ram inthuah te emaw, inthuah lo te emaw, an patta aia ram zau zawk lo nei emaw khatiangte pawh kha a lo piang a, chutiangte pawh chu kan han chingfel mek zel a.

Tin , ram hlutna, land value chungchangah hian tunhma khan thlai hlutna kan D.C (Deputy Commisioner) te, hmun hrang hrang atang khan an han ti a. Tichuan, land value felfai zawk siam tur hian India Stamp Act, 1899 tlawhchhan in Land Value Committee Pu Speaker, i hruainain ni 3-ah emaw hian he amendment hi kan sawiho ka ring a, member-ten min pass pui chuan khatatang khan Land Valuation Committee te kan siam ang a. Avang chu helaiah hian land valuation han siam ringawt ah khan dap chian, dap uluk kha a ngai a. Khutah ramri a lawm ti ringawt ila Vairengte depah te leilet hmun tha pui pui a lo ni a. Champhai lam hi chu a hlu lovang han ti ringawt ila Farkawn velah te, khatilai kha anni tan chuan ram hlu ber, khutilai Kolasib aia hlu daih a lo ni a. Chuvang chuan ram kha keinin dawhkan atanga hei hi chu a hlu lo deuh ang, a rate tihnam ang, hei chu a hlu deuh ang, a rate ti sang ang' tih ringawt chi a nih loh avangin uluk kha a ngai em em a. Land Valuation Committee te pawh siam ngaiin kan hria a. Chumi Land Valuation Committee kan neih huna chung atanga an han siam hunah chuan compensation rate pawh fel zawk leh rualkhai zawka kan kalpui theih kan ring a.

Tunah erawh hi chuan Pu Speaker, kan hriat ang khan thil buaithlak em em mai kan tawk ta thin a, court kha independent a lo ni bawk si a, mi an zualko a, court hotute nen engtin nge ni thu an han sawiho kan hre lova. Keini 'square feet khatah ₹ 60 rel kawngah te pawh a ni e, a tawk hle e', kan han tih lai khan court khan ₹ 200 tur a ni min han ti khauh mai si a. Khatiang chho kha kan kalphung a nih avang khan hei hi kan

la buai laih laih a. Nakinah chuan dan mumal leh fel fak, khang anga land valuation tuktute an awm hunah chuan kan zia chhoh kan beisei a. Chuvangin hei pawh hi a nghahhlelhawm hle a ni.

Tin, kan MLA zahawm tak Pu Ruatkima'n a vei em em kha, damdawi in ram lo ni tawh sa tu emaw duhsak avanga lo sahthlak ni ang chuan kei hian ngai ila a haw ber tur, a thinur ber tur ka ni. Sorkar ram sahthlaka tu emaw pek hi ka huatzawng tak a ni. Chuvang chuan kan map en te, kan department lam kha document ah a inngat lo thei lova. Kan department khan a han teh hmasakah khan damdawi in area hi bigha 119.16, hectare 15.94, hei hi a acre ang zawng khan ka hre lova, acre 40 vel turah chuan ka'n ngai a. Mahse, han teh that leh kha a awm ta a, an han teh that leh khan July, 2014 ni 18, 19, 21, 22, 23, 28 ah khan kan surveyor-ten an va teh ta ngar ngar a. Tichuan, damdawi in ram pawh kha pillar luiin Fangfar lui a fin a; tin, Tuikhur luiin Fangfar lui a zuk fin a, khatianga kawngpui hrulah khatia an han tih khan kan Referral Hospital area pawh kha a lo zau ta khawp mai a. A hmaa bigha 119 kha bigha 254.84 a ni a. Hetatanga han en chuan a chan tet lam ai khan a pek belh teuh si avang khan Minister dawhkan atang hi chuan tute emaw sat hek lam kha a ang ta lova, tute emaw pek belh lam kha a nih tawh zawk si ah khan sat hek ta ila chuan 119.16 atangin 117 velah te chhuk awm tak tih kha ngaihtuahnaah a awm lo thei lova. Mahse, chutih mek lai chuan 119 atang khan 254-ah kan Referral Hospital area hi tuna kan ramri keini Land Revenue Department leh Health and Family Welfare Secretary-in a kawl land lease-ah chuan hei hi kan map dik tak a nih avang khan tumah sahthlak emaw duhsaka han tih kha a lang lem tlat lova. Engpawhnise, (PU LALRUATKIMA : Khawngaihni Pu Speaker, sorkar hian hospital leh a area a ram, inluah lai chan te hi mi 13 kha ram a lak belh a ni, khami redemarkation-ah khan, chu chu an VCP pawh hian 8.7.2013 khan sorkar thuneitu, Director, Hospital & Medical Education-ah an thehlut nghe nghe a ni. Pek belh leh a awm tak teuh avang khan a zau ta a ni.) (SPEAKER : Office lamah in fiah mai dawn nia, House-a sawifiah chi a ni lo, thilhriat a inang lova)... a lo awm emaw compensation pek te an lo awm tawh a, compensation pe si a an ti leh a nih chuan, ka ngaihndan chuan

sorkar pawisa ruk sak ang chiah an ni a. Sorkar-in pawisa a pe tawh a, sorkar ram a ni tawh alawm, ka ram a ni tawh lo ti thei lova, hei hi ka ram a ni ti leh an awm chuan sorkar pawisa ruk sak ang chiah an ni a. Chuvangin, a thu kha a theuneu lo a ni, cheng 10 lek pawh ni rawh se, cheng sang pawh ni rawh se, nuai 2/5 pawh ni se. Chuvang chuan, enchian a ngai a. Enchiana kan thu hmuh chhuah ang in a tul anga dan ang taka thil tih a ni ang. Amaherawhchu, helaiiah lehkhaa in pe phal mang si lova kil tawp atanga kil lehlam in bomb nghek nghek mai ang chi hi chu... (PU LALRUATKIMA : Pu Speaker, lehkha kha chu ka pe alawm, kan Minister zahawm tak khan min lo hriatpui sela. Speaker hnenah documents awm ang kha chu ka pe a, sorkar documents-ah pawh khan a awm tho mai).

Sorkar document a a awm pawh ka lo hre lova. Kan nauten min pek zingah chuan a awm lova. Engpawhnise keiin 'kan lo enfiah ang' ka ti tawh a, 'kan enfiah ang a, a tul angin hma kan la ang,' kan tih tawh kha duh tawk ila. (PU VANLALZAWMA : Pu Speaker, khawngaihni ka lo inrawlh lawk. Khalai ram buai kha helam, i veilam ami te hian fel tawklo a awm hian kan hre deuh a. Tuna kan tih ang kha Minister-in assurance min pe tihna em ni? 'Kan lo enfiah ang' tih lai tak kha).

Aw, kan enfiah ang. In rawn tih hma khan kan office-ah te pheii chuan 'lo enfiah rawh u' ka ti vek tawh zawk. (PU VANLALZAWMA : Aw, chulaitak chu House-ah min tiam a nih chuan a lawmawmin ka hria a, chu chu ka'n zawt chiang duh a ni, Pu Speaker). Hmanni khan MLA khan thinrim deuh mai a a'n pawh teh hmiah hmiah mai kha chuan a inkhawm ngai tawh lo mai awm mang e tih mai tura a'n chet kha chuan.... (PU LALRUATKIMA : Pu Speaker, ni e, khalaiah khan thil awmdan kha kan sawi chiang thawkhat chuan ka hria a..... sorkar zawk ber hian enchianna hun kha in ngah si a, in la enchiang lova tun thleng hian. Chuvang chuan, khalai kha chu file pawh kha in ko thei tho va).

A pu ber heta ka thut reng a ngai a..... (PU LALRUATKIMA : ‘He ram hi Health Deptt. ram a ni a, LSC siamsak a ni’ tiin a inziak thlap a, notesheet-ah pawh a in ziaak zel a.....). (PU K.SANGTHUAMA : Pu Speaker, land lease hmasa ah khan a tel a, a hnua in siam leh ah khan a tel ta lo ni in a lang a. Chu chu a buaina chu a ni. In enchian fe loh chuan tunah pawh hian keini chuan pass pui loh che u kan duh a. Land lease hmasa a tel si, a hnuhnunga paih leh taka land lease a telh loh tak a kha a fair lo hle a). (SPEAKER : Chu chu enchian tur chu a ni ta a ni).

Chuti a nih chuan pek belh teuh kha a ni tawh bawh si a tiraw? (PU K.SANGTHUAMA : Midang khan an pek belh alawm, midang ram nei khan an pek belh ta a ni). Kan tih zen zen loh deuh mai kha kan nauten lo tih an nei a, keipawn ka’n hmuh khan ka phu zawk a. Hetiang hian mi registration ah khan kan ziaak ngai lovin ka hria a. Mahse, tun tumah hian ‘history’ a ti ta a. Sign pawh sign miah lovin, ‘History, he hmun hi Lalfamkima hnen atanga a lei, LSC siam a ni’ an ti ta phawt mai a ni. Pakhatmah kan naute khan hming an sign lova. Dawihzep thiltih, tute hnen emawa zualkona remchangah tih ni awm tak.

Ti hian a lo awm leh ta a ni Pu Speaker, ‘ History’ a ti leh ta a ni. ‘He hmun hi Health Deptt.in an pek, LSC siamsak a ni’ a ti leh ta a ni. Dawihzep thiltih bawh. Hming sign awm lo, seal awm lo. Hei hi opposition-te hnenah pek lo ni ta in, opposition khan Revenue Minister kha a chhuanche thei ang bera tih nan an hmang dawn ta a. Engpawhnise, helai hi chu kan lo enzui ang e Pu Speaker.

(Er.LALRINAWMA : Pu Speaker, khawngaihin. Helai a inziak zawng zawng hi a tawpa hming sign tu hian a pawmpui lo tihna em ni tih ka zawt e). An pawmpui emaw, pawmpui lo emaw, an sign tawh hnua ziaak pawh a ni thei, chu tak chu kan chhui chian a ngai. (Pu LALRUATKIMA : Pu Speaker, notesheet-ah hian Sl.no.1 Lalrinchhana ram hi, i remtihna in.....)

SPEAKER : Ka remti tawh lo. A fiah theih tawh loh avangin Minister-in “Karawn enfiah ang” a ti tawh a tibuai tawh suh u.

Pu R.ROMAWIA, MINISTER : Pu Speaker, ka Demand No.6-na Land Revenue & Settlement Department, Demand No.12-na Parliamentary Affairs Department, Demand No.21-na Higher & Tech. Edn. Department Demand No. 23-na Art & Culture Deptt. A vaiin ₹2,19,37,46,000/- hi House-in lungrual taka min pass sak turin karawn ngen e. Ka lawm e.

Pu VANLALZAWMA : Pu Speaker, thu kam khat lek. Nichina kan senior-in a sawi ang deuh khan, kan Minister zahawm takin House-ah assurance a pe a. Kan lo tum dan chuan pass pui loh hi kan lo tum deuh a, amaherawhchu, Minister zahawm takin khatia a tih tak avang khan lawm takin kan pass pui ang e tih kha ka'n sawi duh a ni e.

SPEAKER : Kan pass dawn leh dawn loh kan la rel rih lova. Mahse, in lo inhrilh lawk a, a lawmawm lamah ngai ila. Kan Minister zahawm tak Pu R. Romawia'n a Demand hrang hrang demand no. 6, 12, 21 leh 23, kum 2016-2017 chhunga pawisa hman tura ruahman, a vaia belhkhawm ₹ 2,19,37,46,000/- chu he House-in pass sak turin arawn dil a. Pass remti zawng “Remti” ti ru le. (MEMBERS : Remti) Remti lo kan awm lo. In sawi vek a. Remti lo kan awm em? Awm lo a. Tichuan, Pu R. Romawia Demand No. 6, 12, 21 leh 23 a pawisa 2016-2017 chhunga hman tur, a vaia belhkhawm ₹ 2,19,37,46,000/- chu he House hian lungrual takin a pass ta e.(Pu R. ROMAWIA, MINISTER : Pu Speaker, ka lawm e.)

Tunah chuan Minister zahawm tak Pu Lal Thanzara'n a demand sawihona kha han wind up sela. Tin, sawifiah ngaite a sawifiah anga, a demand hrang hrang pawisa ruahmanna pass turin rawn dil nghal tawh mai rawh se, amah i sawm ang.

Pu LAL THANZARA, MINISTER : Pu Speaker, ka lawm e. Ka demand hi member 18-ten min sawipui a, tin, han sawifiah leh han chhan tur tam tak a awm hranpa lova. A tam zawk phei chuan ka demand no.24-na Health & Family Welfare-ah hian sorkar hmalakna te min thlawp thu leh min fak thu te an sawi kha a tam zawk a ni a. Amaherawhchu, member pakhat erawh chuan, vanduaithlak takin, Health & Family Welfare hi chu a nuihsawh hle a, han chhan atan pawh a tha viauin ka hria a. Amaherawhchu, kei aia chhang thiam zawk, Pu T.T.Zothansanga'n min chhan sak kha ka chhannaah ka pawm nghal mai ni se.

Pu LALRUATKIMA : Pu Speaker, khawngaihin, kan Minister zahawm tak kha nuihsawh hle lam a ni lova. Driver tura lak, driver hna thiam si lo kha chu a dik thei lo a ni.

Pu P.C.ZORAM SANGLIANA : Pu Speaker, Minister demand sawi laia mawng vawm ba ang maia chet chhen te chu. Pu Speaker, min khap sak teh. Chair atanga min khapsak kan phut ve ruling atangin, MLA vawi khat nih tuma a hre ber ang maia min hrilh min hrilh kan ngailo hrim hrim, hei hi chu a ninawm lutuk..

Pu LAL THANZARA, MINISTER : He Deptt. chungchang a sawi paha, 'A nuihzatthlak khawp mai' an ti kha chu a changtu Minister nih chuan, in nuihsawhna ah chuan a ngaih loh theih loh a ni. Pu Speaker, member zahawm tak Pu Hmingdailova Khiangte in Department fakna leh lawmthu engemaw zat a sawi rualin, Lungmuat khaw nula Health Worker training zo tawh, hna la hmu lo, sawlaih kan indaih si lova, a lak mai theih lawm ni a tih kha NHM lam atangte hian lak theih dan a awm a nih chuan lak kan tum dawn nia.

Tin, Thingdawl Nurse Training Centre kha thawktute kan la indaih loh avangin a la hawn mai theih rih lova.

Tin, member zahawm tak Pu Nihar Kanti Chakma in Tlabung Sub-Division Hospital a rawn ngaih pawimawh thu kha, hei chiang taka record a ni a. A tih changtlun nan thahnemngai taka a rawn sawite kha a theih ang anga hmalak kan tum ang a. Tin, X-Ray Technician hi tunah hian kan indaih loh avangin kan dah mai thei lova. Tin, malaria-prone area a nihna angin an area-ah hian thosilen te pawh duhsak bik an ni a ni. Blood Bank dah a rawn ngen kha chu state thuneihna a ni lova, central lam thuneihna a ni a. Amaherawhchu, blood storage erawh chu a remchang hmasa ah dah sak kan tum dawn nia.

Tin, Er. Lalrinawma khan RSBY chungchang kha a rawn sawi a, toll free chungchangte a rawn sawi a. Toll free number hi keimahni thu a tih theih mai a ni lova, BSNL-te nena tih a ngai a, anmahni hnenah pawh kan dil tawh a. Mahse, keimahni tan a hranpa in min pe thei lova. Tin, zu chungchangah, alcohol-related hrim hrim kha, RSBY hnuaiia enkawl theih loh chungchang a vei thu kha vawiinah a rawn sawi nawn leh a, hmannah a sawi tawh baw k a. Amaherawhchu, hei hi MoU-a Mizoram sorkar leh a insurer ten kan ziah dana condition an dah dan a ni a. Chuvang chuan han tihdanglam ngawt theih a nih loh rualin, doctor concern-ten helaiah hian thiam taka an ziah erawh chuan helam a harsatna neite pawh hi enkawl na chu pek theih dan kawng a awm thei a ni.

Tin, nichinah a zawhna ka chhan theih loh kha chhan ka'n tum ang a. Mizoram Health Care Scheme hnuaiiah hian natna hrang hrang enkawl nan package rate a awm a, medical bill-te leh he an bill ang diak diak a pek a ni lo, a scheme-in a approve rate bak a pelh theih loh a ni. Tin, Mizoram Health Care Scheme hnuaiiah hian government body, Chief Minister Chair-na hnuaiiah a awm a, chumi pawmpui chuan package rate hi siam thin a ni. Tin, NHM hnuaiia nurse-te engzat nge an hlawh tih kha nichin khan ka'n sawi thei mai lova, sawi theih mai chi pawh a lo ni lova. Heng nurse-te hi an thawhna hmun azir leh a programme azir leh lak dan azir zela an hlawh hi siamsak an ni a. Hengte hi nakinah, ziaka a copy ka neih hi amah ka la pe dawn a ni.

Tin, Pi Vanlalawmpuii'n Health Department a rawn faknaah khan lawmthu ka sawi a.

Er. LALRINAWMA :Pu Speaker, khawngaih takin, helaia RSBY guideline min pek ah hian RSBY hnuiaia bill theih loh natna tih a rawn ziah 8-na ah hian mahni intihnatna, zu leh drugs nghei duh avanga in enkawlina (Detox) te tih hi mipui min hrilh si a, hetia a tak taka han kalpui hian nghei tum vanga lut ni lem lo, mahni intihnat pawh ni lem lova, entirnan hmana kan sawi tawh ang khan, an zu lo nam lai, rulchuk ang chi thleng kha min bill sak theih ta lo kha a nia ka'n sawi lai a chu, kha kha agreement ah engang chiah in nge a in ziah tih lai kha a ni e. Pu Speaker, ka lawm e.

Pu LAL THANZARA, MINISTER : Khalai kha ni e, kan sawi tak ang khan doctor duty te pawhin a ziah dan thiam turin kan lo hrilh dawn nia.

Tin, Pu S. Laldinglana, member zahawm tak khan, amah pawhin harsatna a tawh cancer natna, TATA Hospital, Mumbai-ah cheng vaibelchhe khat chuang leiba kan neih, pek an nih chuan credit facilities te pawh hi tih sak leh theih in ni ang a tih kha Parliamentary Secretary, Finance te nen kan sawiho tawh a. Hei hi kumthar ah chuan pek tlak dan kan ngaihtuah dawn nia tih kha min hrilh dan a ni.

Tin, Hospital tih changtlung nan hian theihtawpin sorkarin hma a la a, tunhma ngaihtuah chuan tunhnai ah hian nasatakin tihchangtlun a ni tawh a, mahse sawi leh sawi hnu, mihring leh sum leh pai indaih lohna avangin thil a tih zung zung theih loh a. Tin, Health Care-a thlalatute hian an kalna khua hi tlawh chipchiar deuh sela tih hi, wawiin ah chuan thlalatute tur hi keimahni Mizo local mi leh a khaw mite ngei rawih kan tum a. Chuvang chuan tunhma ai chuan kimchang zawka tlawhtir theih kan tum a ni tih kha kan chhanna ni sela.

Tin, member zahawm tak Pu R. Vanlalvena'n Generic Drugs Store tihlen ni se a tih kha tihlen mai nilo in hetiang Generic Drugs Store hi district tin ah neih kan tum a ni. Tin, hemi bakah hian free drugs, mi harsa zual ten man chawi lova damdawi an neih theihna tur pawh tunah hian hma chak taka lak a ni a. A thawktu tur kan la indaih loh avangin duh angin kan la ti thei lo mai zawk a. Tin, Generic Drugs Policy hi siam a ni a, Law phei chuan an vet tawh a, Finance lama la thawn kual tur a ni bawka ni.

Tin, sorkarin damdawiin a recognize certificate lak chungchangah hian provisional certificate pek thin an ni a. Tin, medical re-imburement atan sum tam tak sen thin hi member dangte pawhin an rawn sawi chhuak a. Hei hi C.S. Chairman-na hnuaiyah review committee siam a ni a, chumi te chuan rawt na an siam tawh a, tun atanga reilote ah medical re-imburement a sorkarin sum leh pai a sen vak vak thin hi tihtlem theih kan in beisei a ni.

Tin, Drugs Testing Laboratory hi RIPAN in an neih saw hman tawm pui ve tur atan kan va dil a, anni pawhin rem an lo ti a. Tichuan, tunah hian chumi chu hmang tangkai turin RIPAN-a an Assistant Professor pakhat hi Ghaziabad-ah ni 5.4.2016 leh ni 5.5.2016 thlenga training turin kal tura ruahman mek a ni a. Ani rawn chhuah hunah chuan sawlai saw keimahni puala kan neih hma chuan hman tangkai kan tum a ni.

Tin, member zahawm tak Pu K. Sangthuama khan lawmthu tam tak a rawn sawi bak ah, a bial Sairang Hospital a doctor kan dah in Aizawl atanga langin a zu vil thin a ni tih a sawi a, hemi chanchin hi keipawhin ka lo hre tawh a. Langa kal tura ngaih hi an ni lova; tin, an lang dawn a nih pawhin office hun pangngai ah thlengin office hun pangai thlenga awm tura ngaih an ni a, chutiang chuan an awm theihna turin hma kan lo la dawn a ni.

Tin, Pu R.L. Pianmawia'n medical treatment atana sum dah tam a ngaimawh thu te arawn sawi a. Tin, Sub-Centre sakna tur pahnih chiah a lang a tih kha hei hi budget ah khatiang lampang kha tihlan tam vak a ni ngai lo a, hemi lo lang pawh hi keimah tak pheichuan ka lo hrethiam manglo zawk a. Sub-centre sakna tura sum a hranpa in kan nei a, 13th Finance Commission atangin, chuta tang chuan hman phalna kan dil mek a, heng atangte hian Sub-Centre sakna tur leh quarter vel sakna tur in tunah hian hma lak mek a ni a. Khawi khua khua ah nge sak a nih ang tih te pawh tunah hian thliarfel mek a ni.

Sakawrdai doctor khawngaihthlak, khawngaih ngailo minrawn pe sela tih kha kan lo endik ang a. A lehlahmah chuan kan hria a, khilai hmun khi mi nazawngin an han kal tihna lai deuh a nih avangin, khilai hmuna in dah tur hi sorkar tan harsatna chin te a awm ve thin a. Amaherawhchu, arawn ngen ang khan kan lo enzui dawn a ni.

Member zahawm tak Pu Chalrosanga'n NEIGHRIMS lamah hian sum leh pai senso a tlem a, chuvangin khulam ah khuan damlo te hi in refer tam zawk ila, sorkar leh a damlo te hian sum leh pai an seng tlem zawk ang tih rawtna arawn siam kha member dang engemawzat in anrawn thlawp in anrawn sawilang a. Kha kha keimah mimal tak pawhin helai atanga an refer loh private ka lo refer ve hi pahnih/pathum keima pocket atangin ka lo tihsak tawh a. Nuai thum vel seng tura in ngai khan singthum vel ten an zuk tlingtla thei a ni. Chuvang chuan NEIGHRIMS lam ah department tha an neih ang ang ah chuan damlo tam zawk hi member zahawm tak rawtna ang hian refer kan lo tum thin dawn nia.

Member zahawm tak Pu T. Sangkunga'n RSBY hmang an tlem a, recognition rule te siamthat ni se a tih hi hma lak mek a ni tih ka'n hriattir duh

a. Tin, ani pawhin NEIGHRIMS a rawn sawi mawi a, tuna ka rawn sawi tak ang khan NEIGHRIMS lamah hian damlo tam zawk in refer kan tum dawn a ni.

Tin, Pu John Siamkungan' Hnahthial-a an damdawi in sak mek chungchang ah hmalak pui tura min rawn sawm kha, sawlaia kan pawisa hmuh dan saw tlem in a chianguang lo deuh hlek a, kan hmuh chhun ang ang kan hman zawh hnu ah 2nd installment hi a lokal thei ta lo a. Engpawhnise hei hi hmalak pui kan tum ang a.

Tin, Cancer hospital-ah simulator khawl te ala awm lo a tih kha, tunah hian lei a ni tawh a, tangkai taka hman mek a ni tih ka'n sawi duh bawk a ni.

Tin, Pu P.C. Zoram Sangliana'n Health Worker indaih loh na ah a theih hram chuan aikal te pawh hi a in tirh mai theih lawm ni, chutiang zawng te chuan hma lak sak mai ni se an ti a, kha kha erawh chu sorkar hian aikal lak a phal loh lai a ni a. Engpawhnise tunah hian Health Worker 234 post ruak hi fill up kan dil mek a, chutiang chuan hma chak taka lak mek a ni a. Tin, ama harsatna dialysis lak chungchangah pawh nephrology lampang ah doctor leh nurse te a remchan dan ang in training tur tirh kan lo tum dawn nia. Tin, dialysis khawl hi tunah hian engemaw zat lei turin hma kan la mek bawk a ni.

Tin, MCON library in an nei lo tih chungchangah khan library an nei a, librarian an nei bawk a. Tun hnai khan lehkhabu lei nan cheng nuai 4,80000 Departmental Purchase Advisory Board in an pe a ni. Tin, hemi bakah hian Aizawl Civil Hospital-ah sawn State Medical Library hawn peih vek tawh a ni a, lehkhabu pawh order tawh a ni a, heng te pawh hi MCON zirlai te hian an la hmang tangkai thei dawn a ni.

Tin, member zahawm tak Pu Robiaka khan Health Care Scheme chungchanga thlalatute an kal tha peih lo tih a rawn sawi a. Nichina ka sawi tak ang khan kumin hi chuan chipchiar taka kaltir dan kan ngaihtuah a. Tin, malaria prone area a nihna angin hnathawktu te pawh tam zawk min pe se tih a rawn ngenna kha kan indaih dan azirin kan lo enzui dawn nia.

Tin, member zahawm tak Dr. K. Beichhua'n Medical College compound chungchang a sawi kha chu, keima lam atang chuan sawi tur ka nei lo ah ngai ila. Doctor 88 lak te nakinah an la buai ang e tih kha chu, nia a hun lo thleng sela, kha kha chu tihfel mai turah ngai ila. District lam hi kan ngaihthah lo a, hengah hian kan theih ang ang in staff te kan sem rual mek zel a. Tin, nurse pawh tunah hian 25 lak thar turin hma chhawp a awm mek a. MPSC-in kohna an siam thuai kan beisei.

Tin, Saiha-a basic requirements, sawlaia han ti mai thei tur an awm loh chungchang te hi kan lo enzui ang a. Tin, ICU 2/3 tal awm theih na dah ni se tih te pawh hi Department angin keini pawh kan duhtusam a ni a. Amaherawhchu kan la tih theih lohna chhan hi sum leh pai indaih loh na avang bawk a ni.

Tin, Civil Hospital Cabin-ah mi hausa te an awm thin a, khilai a rent mai bakah treatment te hi private hospital te nen a inang deuh thuak a, hei hi Minister-in lo enfel se tih hi kan lo enfel ang a. Tin, Civil Hospital Cabin-ah khian mi hausa lo mirethei tak tak te pawh seat a ruah dan leh an lo reserve tawh dan azirin dah thin an ni tih kha ka'n sawi duh a.

Tin, Medical College kan neih turah hian 1st year class engatinge kan tan mai loh tih hi, Medical Council of India-in an la rawn tlawh lo a, an rawn tlawh hunah an remtihna dan ang zel in hei hi chu hma lak chhoh tur a ni a. Tin, ani pawh khan nichina zawhna hunah ka chhan mai theih loh kha ka'n

chhang dawn ang a. Ziakin min pe se a ti a, ka chhanna hi nakinah ziakin ka la pe tho ang a. Private hospital-te RSBY adopt ngei tura tih an ni em tih chhanna chu, state chhunga private hospital te hi Mizoram sorkar chuan sorkar hnathawk te medical treatment lak theih nan empanel vek a, RSBY scheme adopt tur hian Health Department pawh in a request vek a. Heng hospital te hian an pawm (adopt) duh lo, a pawm te nen chuan agreement sign a ni. A pawm lo te chu 1-na Adventist Hospital, Seventh Day tlang, 2-na Aizawl Hospital, Khatla, Aizawl, 3-na Care, Vaivenga Hospital, Dawrpui, Aizawl. 4-na Nazareth Hospital, Ramhlun a ni a. Private Hospital te hian kum 2016-2017 atang chuan RSBY scheme hi an adopt vek theih nan hmalak mek a ni tih a ni. Kha lo kha nichinah khan kan department hotute hnenah an mi zawhna ang ang kha ziaka rawn buatsaih turin ka ti a, an rawn buatsaih a, chu pawh chu nakinah kan la pe ang a.

Tin, helaiah hian State Medical Council vawi engzat nge an thut tawh? Kum 1-ah vawi 4 thut tur tih a ni a, a chhanna chu State Medical Council hian vawi 5 meeting an nei tawh a, council hi constitute anih atanga meeting hnuhnung ber phei chu ni 25.3.2015 khan neih a ni tih a ni. Tutenge member te tih zawhna chhanna chu, Pu R. Lianzama, Dr. James Zohmingthanga, Dr. T. Lalzawmliana, Dr. Lallawma, Dr. K. Lalbiakzuala, Dr. R. Tlangkunga, Dr. Eric Zomawia, Dr. Lalbiakkima, Dr. Vanlalruata, Director of Health Services, Director, Hospital & Medical Education Dr. Prof. Jaghdiv Prasad te an ni a. Dr. R. Lianzama kha President a ni a, Dr. James Zohmingthanga kha Vice President a ni a, Dr. T. Lalzawmliana kha Secretary cum Registrar a ni. Tin, Dr Ritunath Deokota hi representative of MCI a ni. Mizoram State Medical Council hi ni 24.4.2010-ah The Mizoram Medical Council Act, 2010-ah kan nei, ni 2.7.2013-ah Mizoram State Medical Council Rules gazetted a ni tih kha nichina ka chhan theih mai loh ka chhannate ni sela.

Tin, member zahawm tak Pu Lalruatkima'n mission fund kan transfer chaklo lutuk a, chuvang chuan NGO ten an tuar a tih kha a dik a. Keini pawhin transfer chak hi kan duh a, mahse a system hi a fuh loh bakah state Finance lamah harsatna te kan neih avangin kan duh angin kan transfer thei lova. Amaherawhchu, MSACS bik erawh hi chu kumthar atang hi chuan direct in keimahni kutah lut tawh turin central hotuten min hrih dan a ni a, chutianga a rawn luh chuan NGO te pawh an duh ang hunah pek theih tawh kan in beisei a ni.

Tin, driver tura lak, motor khalh thiamlo an awm a nih chuan a hming leh a thawhna te rawn sawi sela, a sawi hi a dik a nih chuan kan ban nghal ang.

Opposition Group leader Pu Zawma'n Civil Hospital tih tet tum a nilo tiha khum 200 awmna tura 2nd February-a order kha sut a ni tawh em tih kha - sut a la nilo a ni. Tin, tih tet kan tum lova, sut kan tum rih lo. Chutih rual chuan Civil Hospital khi tih changtlun zawk kan tum a, Genetic Ward khum 10(sawm) nei dahna tur tunah khian sak mek a ni a, chumi building-ah chuan cabin pawh dah belh tum a ni. Tin, Dental Ward khum 6 (paruk) awmna tunah hian ruahman a ni a, Naupang ICU khum 12 (sawmpahnih) awmna ruahman a ni a, Cardiology-ah khum 10 (sawm) dah belh a ni tawh a. Tin, Trauma Centre siam tum a ni a, Angeography khawl pawh generator kan neih veleh tihnuna Civil Hospital khi tih changtlun tum a ni.

Khum lam erawh hi chu kan hmuh leh kan hriat angin khum inhnaih lutukin kan dah a, duty tan leh a veivak tan pawh harsatna awm thei khawpin kan khumte a inhnaih a, chu chu Medical Council norm pawh a nih loh bakah, zunin bulah te damlote mut tir an ni a, chung chu senghawi an ni a ni. Chuvangin, tunah hian khum 200(zahnih) awm turin khilai bikah chuan kan han ruahman a,

chumi bakah chuan nichina ka rawn sawi tak ang khan, khilai khi thawm changtlun zel kan tum a ni. Referral Hospital lamah Medical College siam kan tum avangin hlamchhiah kan tum chuang lova, a dawrtu mipuite, nau neia han riakte pawh an neih ni la la a chhuah ngai thinte kha chhuah an ngaih tawh lohna turin ruahmanna siamthat a ni zawk a ni tih kha ka'n sawi ni sela.

Tin, smart card siam lo, mamawh si ten an mamawh hian chawpchilh deuhin tanpui an ngai leh si a, hengte hi tih sak mai dan a awm lawm ni tih chu - amah pawhin a rawn sawi ang khan vawi engemawzat tlangau te kan tir a, khatianga kan ngen pawha tih nachang hre lo leh tih tumlo kha chu department ang chuan tih sak kan chak vaklo a ni. An mamawh hma khan an mamawh hun atana lo in hmakhawsuih ve tura beisei an ni a ni.

Pu LALRUATKIMA : Pu Speaker, khawngaihin kan Minister zahawm tak khan min lo hrethiam sela. Nikum hmasaa motor lian leina tur, pawisa pawh pek vek tawh si, vawiin thlenga la dawn loh kha enge chanchin le tih kha ka'n zawt a ni.

Pu LAL THANZARA, MINISTER : Ka hre hauhlo mai a, kha kha. A hretu tur Director-te ka lo zawt ang a, thil awmdan ka rawn hriattir leh dawn che nia.

Tichuan, ka Demand No. 26-na Information & Public Relations hi kan sawi tam vak lova. Pu T. Sangkunga'n a rawn sawi a, officer an tlem a, function neih pawhin min cover tur hi an awm thin lova, a ti a. Kan neih ang ang hi chuan kan VIP-te hi theih ang tawk chuan kan cover ve a ni, kan cover dan pawh 2015-2016 ah hian number of coverage done by officer tih hi 1749 a ni a, video & sound coverage tih hi 1010, steel photo coverages 634, number of steel photo printed & distributed 25000, number of press conference 32, press release

issued 3310 a ni a, advertisement issue classified and display hi 1483, press briefing hi 1053 a ni a, heng bakah hian painting te, films te leh thil dang dangah kan theih ang ang chuan hma kan la ve a ni tih kha ka'n sawi ni sela.

Tin, officer stagnation hi a nasa a, hei hi sorkar lamah pawh kan thlen tawh a, helamah hian chak zawka hma lak mek zel a ni a. Tin, officer-te motor indaih lohna pawh hi NLUP lam atangte pawhin puhruk an ni a, heng hi sorkar hmalakna mek a ni.

Tin, hmannah khan Er. Lalrinawma khan accredited journalist hi engzatnge awm, enge a criteria a tih kha hmanni khan ka chhang mai thei lova, chhanna chu - Accreditation Rules, 1984 hi a hlui tawh avangin khatih laia I & PR changtu Chief Minister zahawm takin revise turin 2013 khan a ti a. Tichuan, Rules siamthar tura duan kha a kaltluang lova, siamthat leh thin a ni a, 2014-ah tihchhuah a ni a, sawiselna a awm leh avangin 2015-ah post pakhat paih leh a ni a. Tichuan, tunah hian dilna an thehlut mek a, chung diltute chu thlitfim leh an ni ang a, chutatang chuan la thlan tur an ni. Chuvangin, tunah hi chuan accredited journalist kan nei rihlo a ni. Tin, a criteria pawh kha tuna han sawi mai theih chi a ni lova, a duh a nih chuan heng hi an peihfel hunah a copy kan pe thei ang tih kha kan sawi duh a.

Tin, Pu Robiaka khan motor lampanga an harsatna te hriatpuiin, thahnemngaiin a rawn sawipui a, chungte pawh chu vawiinah hian ngaihtuah pui mek an ni.

Ka Demand No. 48-na Information & Communication Technology kha member 5 (panga) velin in rawn sawi a, Pu K. Sangthuama leh Pu Chalrosanga te khan he department atana pawisa dah hi tlem min tihpui a. He department hi

kum2008-a din a ni a. Tunah hian thawktu 40 an awm a, heng zing ah hian mi 14 te hi a ngheta lak an ni a, contract employee hi 17, MR hi 12 an ni a ni.

Tin, kumthar 2016-2017 a kan budget hian nikum 2015-2016 budget kan phak lohna hi ₹ 610 lakhs a ni a. Kan phak lohna chhan hi ZENICS-a kumtin ₹ 172.29 lakhs kan pek thin leh early retirement rules hnuaiia employee te tuam damna atana pawisa ₹ 380.80 lakhs kan neih tawh loh bakah NEC atanga fund ₹ 100.97 lakhs kan dawn tawh loh vangin nikum budget kan phak lo a ni.

Tin, Pu Robiaka leh Pu John Siamkunga te hian RIK chungchang an rawn sawi a. Nia rural information KIOSK hi hmun 300-ah din tur a nih laiin 292-ah din tawh a ngaih a ni a. A hmun thenkhat ah satellite V-SAT a that loh thin avangin harsatna tawh thin a ni. Tangkai zawka hman a nih theih nan hma lak zel a ni a.

Tin, social media chungchang rawn tarlan a ni a. Hei hi Pu John Siamkunga te leh midang dang te pawh khan an rawn sawi a. Social media hman fimkhur na lam awareness programme hi Central YMA, MJA leh Kohhran hrang hrang kal tlangin neih thin a ni a. A hman dan pawh kan thiam sawt hle in kan hria a ni. Mobile service provider te nen hian thawhhona tha tak neih a ni a. Service tha zawk an neih theihna turin radiation hriselna atana hlauhawm anga ngaihdan dik loh avangin tower dahna hmun turah duh angin kan hmu hlei thei lova. Mahse, chu harsatna chu sorkar in sorkar building te hman theih a nihna turin order a chhuah tawh a. Sorkar building-ah te tower kan dah theih chuan mobile service provider te pawhin tha zawka service min pek theih kan beisei a ni.

Tin, Pu John Siamkunga khan capacity building chungchang te a rawn sawi a. Capacity building under E-governance CSS hnuaiiah ₹ 1216 lakh dah hi capacity building atan chauh ni lovin, CSS project hrang hrang atan a hlawma dah a ni bawk a ni. Khang te kha tuna ka'n han react theih mai te chu a ni e.

Pu Speaker, heng ka Demand No.24-na Health & Family Welfare department ₹ 4,14,28,26,000/-; No.26 Information & Public Relations department ₹ 14,19,96,000/-; No.48 Information & Communication Technology ₹ 14,21,13,000/- A vaiin ₹ 4,42,69,35,000/- hi he House hian min pawmpui turin ka'n ngen in kan dil a ni e.

S P E A K E R : Le, kan minister zahawm tak Pu Lal Thanzara, a department chan Demand No.24, 26 leh 48 hnuaiia kum 2016-2017 chhunga pawisa hman tura ruahman a vaia belhkhawm ₹ 4,42,69,35,000/- chu pass turin House a dil a, pass remti zawngin 'remti' ti ru le. Remti lo kan awm em? Kan awm lo. Tichuan, Demand No.24, 26, 48 hnuaiia department hrang hranga pawisa hman tur a zavaia belhkhawm ₹ 4,42,69,35,000/- chu he House hian lungrual takin a pass a ni.

Pu LAL THANZARA, MINISTER : Pu Speaker, ka lawm e.

S P E A K E R : Awle, a lawmawm ngawt mai. Lungrual taka thil kan tih thin te hi Pathian zar a ni, lawm nachang hria ila. Tichuan, naktuk tahrik ni 29 Thawhlejni zing dar 10:30-a kalkhawm leh turin tunah chuan kan bang rih dawn a ni.

The sitting is adjourned.

Sitting adjourned at 5:41 Pm